

JESUS JXKAAHNISAWE'SX DXUS YUWE'S PTA'SXNI

Dxus Espiritu's kaajxa' neeyũuni

¹ Jesusa' nyafxte kīhwa kaapiya'jna kījkihwa ew yũuk cielute tejkapkaçx txã'sna, Teofxilo, idxna pta'sxna adx libru nyafxte fxi'th.

² Txã' cielun u'jmeý, piçthē'jwe'sxtxi txhitxhku jxkaajxa', sa' ma'wēçxah yũuwa'ja'swa kaapiya'kh Dxus Espiritu pu'çxte.

³ Sa' uuniijũ ki' itxi kiiteçxa', nyafxíi na'wēyçxáak petx kakwe yã'jçxa txãawe'sxtxi vxyaana ũsu' kuarenta entepkaçx. Txã'wē itxi yuuyuhga sũhna ew jiyukahnu txã'wē vxyaana ũsu', sa' Dxus ma'wē jxkaahwa'ja'swa pta'sxnak ũsu'.

⁴ Sa' cielun u'jya'waçxa', txajx txhitxhni-sawe'sx yakh nee ũsí, Jesusa' neewe'wek Jerusalen çxhabuh u'jmée ũskahn na'jina:

—Mũyhaswe, adx Tata kaajxa' neeyũuk txã's jxpa'gapkaçx, adx i'kwe'sxtxi pta'sxthu txã'sna.

⁵ I'kwe'sxa' jii i'kwe Juana' naasáa yu'teçxáak akhna bautisaĩ'. Nawa i'kwe'sxa' Dxus Espiritute yuu bautisãyni yuune'kwe jxukaysa ja'daçxah txaçxmeyna jĩnak we'we.

Jesus cielun sxawedni

⁶ Txajũ' Jesus txhitxhni-sawe'sxa' txãa yakh ũsçxa', paapējxtxi:

—Ăçxha' idx wáa naa ensu Israelwe'sxtxi ro-manowe'sx kuseju nwe'wewa'jsane'ga jĩte',

7 Jesus pasçxa':

—I'kwe'sxa' jiyuwa'jsamée i'kwe Israelwe'sxtxi nwe'wewa'j en bagaçxtewa. Dxus kwe'sx Tata yuuçxáa txã'wě yūuwa'j ena's jiia'.

8 Nawa Dxus Espiritu kīhte', txāa yu's jxpa'gawa'jsa yuji'kwe, kīhtewa jxuka ājaya'. Sa' txã'wě yūunijū kasehçxa u'jwene'kwe adxa's tuuthe'jya' Jerusalente, Judea kiwesu, vxite' Samaria kiwesu mtee mtee maa kiwetewa jxuka jīnak jxkaah.

9 Txã'wě we'wena jxã'jnijū txaçxmeyna, txāawe'sx thegna ũsiyna Jesusa' ēete kiisnik yuu cielun pe'jna u'jya'. Naapkaçxha' tāaph kūhçxa aphku, aça' peena yu' vxyaame'.

10 Txã'wě Jesusa's cielun pe'jna u'jweçte', txāawe'sxa' cielute pagayna ũsiyna, e'z piçthē'j ropa çxihmesa athçxa txāawe'sx pukatetx vxyaa.

11 Txã'wě vxyaaçxa', na'wētx we'we:

—Galileajuwe'sx, ¿kīh yuupa'ga cielute pagayna ũskwe? Jesusa' i'kwe'sx ksxavxyuh ma'wě cielun u'jweçtekwe uy, txã'wěyçxáa ki'kin kīijana txāaíçxáa jīnatx pta'sx.

Judas pa'gate Matias txhitxhni

12 Txajū' thā'j Oliwos yaasesaju u'jtx Jerusalen çxhabna sxawedna. (Txāa Oliwos vxīça' Jerusalen utxak yu' teeçx kilometroçxáak āh jxu'j neeyū'.)

13 Jerusalente pa'jçxa', txāawe'sx paadeeni ēe yatte tejkatx Pedro, Jakobo, Juan, Adres, Fxelipe, Tomás, Bartolomé, Mateo, Jakobo Alfxeo nçxi'k,

Simon kananista ju'gusa, vxite' Judas Jakobo nyakh txãawe'stxxi yu'.

14 Txãawe'sxa' kxteetx tahtatey pkhaakhe' Dxus yakh puutx we'weya' jxukaysa yakh, Jesus nyakhwe'sx vxite' njĩ'j Maria, txã'wëy vxite u'ywe'sx yã'jçxa.

15 Txãn ensuk Pedro' kxtee pkhaakhesawe'sx ciento weinte ksxavxyte yujuçxa na'jĩ:

16 —Yakhthë'jwe'sx mjiyuwe: Judas ewmée yũuwa'ja's Davxida' fxi'kh Dxus Espiritu kaaũusuthe'jni's Dxus librute txã' kxtey yuuwa'jsa yuh yu'ne'. Txajĩik Judasa' Jesusa's preesu'jwa'jsatx pe'jna kũhçxa dukh.

17 Judasa' kwe'sx yakh u'jusak yu', txãasak kwe'sx na'wëy mjĩwa'jsa yu'.

18 Nawa Jesusa's txweyni vxyuju kiwek wey, sa' kxteek tēekhēe dxiktheju sutenus wete, açã' meetu'ja' jxuka ubuk.

19 Txajũ' Jerusalentewe'sxa' txã'wë yũuni's jiyuçxa', txãa kiwe's Akéldama yasetx ki'p, txãawe'sx yuwete yu' Ee pkawni kiwe jĩnik yu'.

20 Judas uuwa'ja's we'weçxak Salmo librute na'jĩ':

Txãa yatte u'pwa'jsa kim yuhwa neeyũumeetxna,

Açã' txajx yata' namu ji'phmée peekx neeyũuna jĩ'k.

Vxite ajkhēwa na'wë fxi'jni':

Txajx mjĩwa'ja's vxite tee mjĩ jĩna fxi'jni'.

21 Txãa pa'ga kwe'sx ksxavxyte piçthë'j ũsta' kwe'stxxi jxpe'jsa Jesus makwe txaçxne' kwe'sx yakh ũsu' txagaçxhĩ txutemée pi'kxna u'jusa.

22 Txãawe'sxa' Jesusa's Juan bautisãynijũjx uyya' takhçxa cielun u'phkaçx uysaata' txãatx teeçx txhitxhiga, Jesus itxi yuuni's tuuthe'jna kwe'sx yakh fxi'zewa'jsa jĩk.

23 Txajũ' e'ztxi pakweçxa ki'p, José Barsabás yaasesa's txã'sna íçxáa Justo jĩnatx kxsusu', vxite' Matiasna.

24 Sa' na'wêtx Dxus yakh puutx we'we:

—Idxa' maa maa nasa ũus yaakxni'swa jiig. Kwe'sxtxi meen mkhiyu'j naa e'zsatx maaçxahtxga txhitxh,

25 Judas pa'gatewe'sx, na'wê Judas txajx mjĩia's nvxihtçxa vxituk txajx pka'pa'ga txãa mjĩia's jxp'a'gawa'jsa jĩnatx Dxus yakh puutx we'we.

26 Txajũ' swerte kaatx kiim yase kasehtewa jiyuya', aça' Matias yasek kaseh. Txajũjx Matiasa' oncesawe'sx yakh utxaak pi'kxna u'juya'.

2

Dxus Espiritu kĩini

1 Pentekostes fxiesta en ãhte', jxukaysa kx-teeçxaçxáatx pkaakheçxa ũsu'.

2 Naapkaçxha' cieluju wejxaa wala na'wê susna kĩhçxa txãawe'sx ũsni yatte jxuka utak.

3 Naapkaçxha' ipx beeni na'wêsatx jxukaysa kajkwesu vxyaa.

4 Aça' jxukaysa ja'daçxah txãawe'sx ũuste Dxus Espiritu yuuçxaçxáa jxuka khêete', txã'sna jxp'a'gaçxa maa nasa we'weni yuwe'swa we'weya' ãjatx, Dxus Espiritu maa yuweju we'wewa'ja's jxkaathe' txãaju.

5 Txān ensu' Dxus jxkaahni's nwēese'jsa judiuwe'sx maa maa kiwejūwa pa'jçxatx ūsu' Jerusalente.

6 Txajū' txāa seena' susni's wēse'jçxa', nasa jxukaysa pkhaakhetx. Sa' txā'wē teeçxa na'wēçxah txāawe'sx we'weni yuweju we'weni's jiyuçxa', wala kuh yajkxna neeyūtx

7 ¿Ma'wēçxaki'tx txā'wē yūu? sūhna. Sa' txāawe'sx pwe'sx na'jīnatx puutx paapēyi':

—Na'wē we'wena ūsta' txāawe'sxa' jxukay ¿Galileajūwe'sxmeetxná'?

8 Sa' ¿ma'wēçxata nasa iisa kwe'sx yuweju we'weya' āja'?

9 Ayte ūstha'w Partiajūwe'sx, Mediajūwe'sx, Elamjūwe'sx, Mesopotamiajūwe'sx, Judeajūwe'sx, Kapadociajūwe'sx, Pontojūwe'sx, Asia kiwejūwe'sx,

10 Fxrigia vxite' Panfxilia kiwejūwe'sx, Egipto vxite' Afxrika Cirene kiwetewe'sx, txā'wēy Romajūwe'sxwa ayte ūstha'w. Maai' yu' up-xhíi judiuwe'sxtha'w, aç'a' vxite' judiumeeçxawa judiuwe'sx na'wēy Dxus jxkaahni's nwēese'jsa ūstha'w.

11 Txā'wēy Kretajuwe'sx vxite' Arabiajuwe'sxwa ūstha'w. Nawa jxukaysa Dxus yuwe zhiçxkwesa'stha'w wēse'je', kwe'sx we'weni yuweju pta'sxpa'ga jī'tx.

12 Txā'wē yūuni's jxukaysa wala kuh jwed we'wena ūsu'tx na'jīna:

—¿Kīh yūuya' txā'wē yuuçki? jī'tx.

13 Naapkaçxha' vxite yu' açewe'wena npeevxysijkana na'jī'tx:

—Naawe'sxa' vxino pus tudxçxa tũuçxa txã'wẽ we'wen ũsta' jĩ'tx.

Pedro nyafxçxah nasatx we'weni

14 Txajũ' Pedro' Jesus jxkaahnisawe'sx oncesa yakh yujuçxa sus we'wena na'jĩk:

—Judeatewe'sx vxite' Jerusalentewe'sx i'kwe'sxa' ew jiyuçxa neeyũuya' ew mwẽese'jwe adx pta'sxya'wath txã'sna:

15 Naa piçthẽ'jwe'sxa' tũunitxna jĩ'i'kwe nawa txã'wẽ meeta'. Kusii las nweweçxá' aça' ¿ma'wẽ tũuni yuukxtha'w?

16 Na'wẽ yuuk txã' Dxus yuwe pta'sxsa Joel we'wek txãak kxtey yuu. Txã' na'jĩ'k:

17 Dxus we'weçxa':

Nmeh ensu', adx Espiritu's naa kiwete nasa jxukaysatx makwewa ũsu'nja,

Aça' i'kwe'sx nçxi'k i'kwe'sx niisa txãawe'sxa' adx yuwe's pta'sxixna.

Naapkaçxha' piçtakxwe'sxa' cieluju zhiçxkwesa vxyaani's uyuutxna,

Aça' thẽ'jsawe'sxa' ewsa ksxa'utxna.

18 Sa' adxa's selpisaawe'sxtxi piçthẽ'j ma'k yuu meeçxa' u'y ma'k yuu nawa txãawe'sxtxi adx Espiritu's makwewa ũsu'nja, adx yuwe's pta'sxkahn.

19 Txajũ' cielujũ kim yuhwa uynimeesa zhiçxkwesa kaavxya'ja'ja'nja:

Sa' naa kiwete' ũukhũukhsa kaavxya'ja'ja'nja: ee, ipx wala, aah wala txã'wẽsatx.

20 Aça' seka' kus na'wẽ çxhi'dxina, a'tewa ee na'wẽ beh yuuna.

Nawa kwe'sxtxi nwe'wesa kiiwa'j en zhiçxkwesa
ãhmeyna txã'wẽ yuuna.

21 Aça' maawa jxukaysa Dxusa's neewe'wena
fxi'zesa' txãa ente' nwe'weni yuutxna jĩ'k.

22 ãçxa' Israelwe'sx mwẽese'jwe
na'jĩya'wath: Jesus Nasarethũwe'sx Dxus
kaahnisa i'kwe'sx ksxavxysu kĩjkĩhwa
ewsaxaxçáanak kaavxya'ja'j açã'satx
nuykatxhina, uusaatx itxĩ vxitna Dxus pu'çxte,
Jesukristo' txã'wẽk yũu. Txã'wẽ yũuni's
jiiyã'jne'kwe.

23 Nawa txã'sa' kluuste fxuççxa ikhkahn
i'kwe'sxa' dukhi'kwe nasa ewmeesa kusete.
Txã'wẽ uuwa'ja's Dxusne' txhitxhçxa nvxiht
txãniitey, txãa pa'ga i'kwe txã'wẽ yũu.

24 Nawa Dxusa' ki' itxi vxitçxa uuní
seena' ũukhũukhsaju kutxi'kh, txãa pa'gatey
ikhxa' bagaçxtewa uuniiçxáa ji'phuya' yu'
ãjawa'jsameek yu' naa pa'ga.

25 Jesus uuçxa ki' itxi yuuwa'ja's Davxida'
na'jĩnak pta'sx:

Adxna jxpe'jsa' bagaçxte yuhwa pu'vxitumée adx
yakh nesku yu'.

Txã' adx pukate ũsa' paçu ju'gte, kĩh yuhnawa
ũukhkahmén adxa's nwe'wena.

26 Txãa pa'gak adx ũuste txakwe wala
weçxweçxa ũusuthe', açã' weçxaawa'j
yuuçxá'sthu we'we'.

Txãa pa'ga adx kakwe' ki' itxi kiiteena sũhnaçxáa
skhẽwu'nja,

27 Txãa pa'gatey idxa' adx ũusa's uusaawe'sx
ũsnite nvxihtmeene'ga,

Sa' idxa's selpisáa kakwe'swa suweepkaçx yu' khikhmeene'ga.

28 Pçuwa'jmée itxi ũswa'the pa'jwa'ja's kaapiya'jg,

Sa' iidx ũsnite weçxana ũswa'ja's yuuçxáa ũsune'ga jĩna fxi'jni'.

29 Yakthê'jwe'sx ew mjiyuwe: Na'wê kwe'sx yaçgawe'sx Davxid we'wek txã' peekx uuwa'ja'siúçxáa txã'jĩçme'. Txã'wêmeete iúçxáa Davxid uute' pedaatx, aça' txajx kakwe' txkaa ũsa' pedaní açxpkaçx.

30 Nawa Davxida' Dxus yuwe pta'sxsak yu'. Txãasak jii yu' Dxusa' teeçx ũsya' puutx we'wek txajx ji'thewe'sx txã' Kristok yu' Davxid na'wêy jxkaahwa'jsa txã'snak jii yu'.

31 Kristo uuçxa itxi kiíteçte uyna ũssa na'wêk pta'sx Davxida'. Txãasak na'jĩ: txajx ũusa' uusaawe'sx ũsnite neeyũumeena, aça' txajx kakwe kha'txwa suweemeena.

32 Davxid we'we'k Jesus txã'snak Dxusa' uu-niijũwa ki' itxi vxit, aça' kwe'sxa' jxukaysa uysaatha'w, txãasa ew jiitha'w.

33 Sa' txãa Jesusiik Dxus pukate paçu ju'gte kãhpkaçx pe'jna u'jni yuu. Sa' kxte' Ney ũsya' neeyũuk txajx Espiritu's txã'sa' jxpa'gaçxak txãa Espiritu's kwe'sxtxi makwewa ũs. Aça' txã'si'kwe i'kwe'sxa' jxuka uyna wêse'j.

34 Davxid txã'wê cielute tejkame', txajjik Davx-idiíwa na'jĩ':

Dxusa' adxna jxpe'jsa's na'jĩk:
Adx pukate paçu ju'gte mkaaçx,

35 Idxna açesatx idxçxaçxá's nwêese'jwa'ja's vxitna jxã'phkaçx jĩk.

³⁶ Israelwe'sx jxukaysa ew mjiyuwe: Naa Jesusa's i'kwe'sxa' kluuste kaafxuçu'ji'kwe txã'snak Dxusa' Kristo jxkaahwa'jsa vxit.

³⁷ Txã'jĩna pta'sxte wēse'jçxa', ũuste wala nxus yajkxtxi. Sa' Pedrowe'sxtxi pějxtxi:

—Yakhthē'jwe'sx, ãçxha' ¿ma'wē
yũukxtha'w? jĩte',

³⁸ Pedro pasçxa':

—I'kwe'sx pkaltxi nvxihtçxa, Dxus tasxte misxawedwe, sa' Jesukristo's ũuste jxpa'gaçxa yu'tewa ya'bautisãywe, kxah i'kwe'sx pkaltxi peltunãyni yuuna. Txã'wē yũute', i'kwe'sxtxiwa Dxusa' txajx Espiritu's ũsuna.

³⁹ Txãa pa'gatey Dxusa' txajx Espiritu's ũsya' neeyũuk txã' i'kwe'sx jĩi petx i'kwe'sx luuçx jĩi yã'jçxa', sa' maazkuēesa majũwe'sxwa ũstxna Dxus pa'yanisa txãawe'sxwa jxpa'gatxna jĩ'k.

⁴⁰ Txã'wē we'wena wala yu'kxpejk Pedro' na'jĩna:

—Nasa ewmeesa ksxavxyte jxpubana fxi'zemée Dxus tasxte mutxaawe ewte neeyũuya' jĩnak pta'sx.

⁴¹ Aça' Pedro pta'sxni's nwēese'jçxa yu'te ya'bautisãytxi. Txãa ente' tekx mil ähtx Kristo's jxpa'ga.

⁴² Sa' Pedrowe'sx kaapiya'jni's piyaçxa', jxukaysa Dxusa's çxhãçxha yajkxnatx neeyũu. Sa' txutemée kxteeçxahtx pkhaakhena fxi'ze', Dxus yakh puutx we'wena, ũ'wa'ja'swa kxteeçxah ũ'na.

Puutx kxteeçxah ewçxáa fxi'zeni

43 Txajũ' nasa jxukaysa wala kuh yajkxna ũsu'tx, naapkaçxha' Pedrowe'sxa' aça'satx nuykatxhina kim yuhwa ağanimeesa'swa kaavxya'ja'jnatz ũsu'.

44 Jxukaysa Kristo's jxpa'gasa' txutemeetx kxteeçxah fxi'ze', sa' kîh ji'phuni'swa ja'daçxaçxáatx puutx peesu'sna fxi'ze'.

45 Sa' txãawe'sx ji'phuni's txweyçxa vxyu's kxteeçxah pkhakhçxatx peejiina fxi'zesatx peesu' txãawe'sx peejini's pu'çxna.

46 Een isatx dxuus yatte pkhaakhe', sa' ũ'wa'ja's yu' yat iisatx pi'ki' ũusuh jxuka weçxana,

47 sa' Dxusnawa txã'wěy weçxana. Txã'wě yũute', nasa' txãawe'sxtxi' wala ew we'we'tx. Aça' Dxusa' een isak txajx luuçxtxi' nuypelnana u'jwe' ewte neeyũuwa'jsatx.

3

U'juya' aǰãsamée dxuus yat vxitxte katxhini

1 Teeçx ente' Pedro Juan yakhtxi dxuus yatte kũjuç yu', kusuçte las treste Dxus yakh puutx we'wewa'j orate.

2 Kxte' teeçx piçthē'j upxhî çxida puuple u'juya' aǰasameek u'p yu'. Txã'sa' een isatx yakhna kũhçxa dxuus yat Vxitx Zhiçxkwesa jînisu pukate ki'pu' kxtee nasa u'kasatx lmusxnu pe'wna u'pkahn.

3 Txãa puuple' Pedro Juan yakh dxuus yatte u'kaya' kũjuçte uyçxa', lmusxnu thãasku.

4 Aça' Pedrowe'sxa' txãa puuple dxi'pte ew thegçxa', Pedro' na'jîk:

—Mtheg kwe'sxtxi jïte',

⁵ txãa puuple' ¿kĩh peesya'watski? sũhna ewku txãawe'sx dxi'pte theg.

⁶ Aça' Pedro we'weçxa':

—Vxyu yu' kĩh yuhwa ji'phmeeth. Nawa adx ji'pthu txã'sçxáawa peesu'nja: Jesukristo Nasarethũwe'sx idxa's ãçxhíi nuykatxhina aça' kiiteçxa ew mneeyũu jĩna'wa,

⁷ Pedro' paçu kusete uwena' pu'kisku, aça' naa dudtey fxidxa' ku'lete', çxida' jxuka ewtxi neeyũu.

⁸ Txajũ' txãa ãça'sa' ũphçxak kiite, sa' u'juya' ãjaçxa txãawe'sx yakhíi dxuus yatte u'kak, ũphũuphna Dxusna weçxana tuuthe'jna.

⁹ Txajũ' txãa çxida puuple' txã'wẽ ũphũuphna Dxusna weçxana yuute nasa jxukaysa uyçxa', kuh yajkxna ũukhtxi.

¹⁰ Txãa nasa' çxida puuple's jïitx yu' txã'wẽ dxuus yat Vxixt Zhixkkesa jĩnisa pukate kaççxa lmusxnu thãasna u'psate.

Dxus yuwe's Pedro pta'sxni

¹¹ Çxida puuple u'juya' ãjasameeçxawa katxhiyã'jçxa', Pedrowe'sxtxi uweçxa txhweetemée u'jute', nasa jxukaysa wala kuh yajkxna Pedrowe'sxtxi thegya' seena' wala kuh pkhaakhetx dxuus yat pwa' Salomon jĩ jĩ'tx kxtee.

¹² Txã'wẽ nasa pkhaakhete', Pedro' na'jĩk:

—Israelwe'sx, ¿kĩh yuupa'gakwe i'kwe'sxa' txã'wẽ ũukh we'wena kuh yaaki'? Naa

piçthê'ja's kwe'sx txã'wê Dxus na'wê nuykatx-hiçxa ew u'juwa'ja's peesuçthas i'kwe yajkxna kwe'sxtxi thegu'.

13 Mwêese'jwe: Kwe'sx yaçgawe'sx Abrahan, Isaak, Jakob txãawe'sx Dxusa' txajx Nçxi'k Jesusa's cielute seena' jxtuhthesa vxitku na'wê i'kwe'sx yu' ahçeçxa jxkaahsa Pilato kusete dukhi'kwe. Aça' Pilato yu' txhweeteya' yajkx-tewa, i'kwe'sx yu' kaatxhweete'jmée i'kwe,

14 wejxwa kîhwa yuuwemeesa', mitxhwete jîpkaçxte, i'kwe'sx yu' teeçx piçthê'j wala yu-uwesa ewmeesaçxá's i'kwe txhweete kaah.

15 Txã'wê yûuçxa i'kwe'sxa' Jesus îtxi kaafxî'ze'jwa'jsa yu'sa' kiikhe'ji'kwe. Nawa Dxusa' txã'sa' kî' îtxi vxitni's kwe'sxa' uysaatha'w, txãasa jîitha'w.

16 Txãasatha'w Jesusa' nuykatxhina sũhçxa txajx yase's kxsusna pi'kx, naa piçthê'j i'kwe'sx jiyunisa's nuykatxhikahn. Txãa Jesus nuykatx-hipa'ga yuuçxáa naa piçthê'ja' jxuka ew katx-hite', i'kwe'sx jxukaysa uyna ũsi'kwe.

17 Yakthê'jwe'sx, txã'wê yûui'kwe nawa jimeeçxane'kwe txã'wê yûu sũju'th, txã'wêy jxkaahsawe'sxwa jiimeene'ta yu'.

18 Nawa i'kwe'sx txã'wê yûuwa'ja's Dxusa' yaçtey pta'sxku txajx yuwee pta'sxsawe'sxtxi na'jîna: Kristo' wala pxthaa pa'ga yuuna jîna aça' txã' kxtey yuukahn i'kwe txã'wê ikh.

19 Txã'wê yûupa'ga Dxus tasxte sxawedçxa i'kwe'sx pkalpa'ga perdon mpêjxwe txãa pkaltxi khûkhni yuuya'. Txã'wê yûuçxa' weçxana ũswa'j ena's jî'phune'kwe,

20 Dxus kaahni Kristo Jesus jxkaajxa' kîhte.

Txã' i'kwe'sxtxi ew yũuwa'jsa' jĩnik yu' txãní entey.

²¹ Æçxhíi yu' Jesukristo' cieluteçxáa ũswa'jsa', Dxus naa kiwete kíhnawa jxuka pheu'phkaçx. Nyafx entey Dxus yuwe pta'sxsawe'sx txã'wẽtx Kristo' naa kiwete jxkaajxa' kíiwa'jsa' jĩna pta'sx naa pa'ga txã' kxtey yuuna.

²² Txã'wẽy Moiseswa na'jĩk: Dxusa' i'kwe'sx jĩi teeçx kaajxa'wa' i'kwe'sx ji'thewe'sx txajx yuwe's pta'sxwa'jsa, adxa's ma'wẽga kaah txã'wẽy. Txã's mwẽese'jwe, ma'wẽ jxkaathewa jxuka kxtey yuuna.

²³ Txã'wẽme', maawa Dxus yuwe pta'sxsa's nwẽese'jsame', Israelwe'sx tasxuh txudeni neeyũuçxa jxukaysa vxituwa'tha' jĩk.

²⁴ Ew mjiiyuwe: Dxus yuwe pta'sxsa Samwel fxi'zenijũjxwe'sx jxukaysatx æçxh naa ensu Kristo kíiwa'ja'sçxaçxáa we'wena pta'sx.

²⁵ Aça' i'kwe'sxa' Dxus yuwee pta'sxsawe'sx ji'j'kwe, sa' txã'wẽy Dxusa' txãniitey Abrahan yakhwa puutx we'wek i'kwe'sxtxi ew yũuwa'ja's na'jĩna: Naa kiwete nasa' jxukaysa bediciona's jxpa'gatxna iidx ji'j pa'gate jĩna we'wek txã'snawa jxpa'gasai'kwe.

²⁶ Txajjĩk Dxusa' txajx Nçxi'ka's nyafxte' i'kwe'sx tasxte khuẽ'yku kaah i'kwe'sxtxi nwe'wekahn, kxah i'kwe'sxa' teeçxsa na'wẽçxah ewmée yũuni's nvxiitkahnku txã'wẽ yũu jĩk.

4

Pedro Juan yakh judiu npiičthẽ'jwe'sx tasxte kuutxa'jni

1 Pedro Juan yakh nasatx we'wena ũsiyna, sacerdotewe'sx vxite' dxuus yatte thegsawe'sx npiiçthê'j vxite' saduceo txãawe'sx pa'jtx tud-ya'.

2 Txã'wê Jesuswa ma'wêga îtxi yuu txã'wêy uusaawe'sxwa îtxi yuuwa'ja' jîna Pedrowe'sxa' nasatx kaapiya'jna ũste jiyuçxatx wala ũusaçxana pa'jçxa,

3 preesu'jçxa karcelte kxuuph kuskuuspkaçx, kusuçyã'kh yu' naa pa'ga.

4 Nawa Pedrowe'sx pta'sxni's wêse'jçxa Kristo's jxpa'gasa yu' seena' wala kuh yu'tx, piçthê'jçxáatx isani cinko miltxi yu'.

5 Kuskuus enkhê' judiuwe'sx npiiçthê'jwe'sx vxite' judiu nthê'jsawe'sx vxite' Dxus ley kaapiya'jsa

6 vxite' sacerdote npiiçthê'j Anas vxite' Kaifxas, Juan, Alejandro vxite' jxukaysa sacerdote npiiçthê'j nwe'sxwa pkhaakhetx Jerusalente.

7 Sa' Pedrowe'sxtxi pe'jya' kaahçxa txãawe'sx ksxavxYTE txahçxa paapêjxtxi:

—¿Kim pu'çxtekwe na'wê yũuya' äja'? meeçxawa ¿kimga jxkaah? jîte',

8 Pedro' txajx ũuste Dxus Espiritu's jxuka ji'phçxa', na'wêk pas:

—Judiu npiiçthê'jwe'sx, Israel nthê'jsawe'sx:

9 I'kwe'sxa' paapêyi'i'kwe kwe'sx ma'wê yũuçxa naa äça'sa's nuykatxhitewa jiyuya'.

10 Aça' i'kwe'sx dxi'pte teehwed äate pta'sxiçtha'w, kxah Israelwe'sx jxuka jiyutxna. Naa piçthê'j ayte i'kwe'sx dxi'pte ũsa' txã' Jesukristo Nasarethũwe'sx nuykatxhini ũsa'. Txãa Jesukristo's i'kwe'sxa' kluuste

kaafxuçu'ji'kwe, nawa Dxusa' uuniijũ ki' itxi vxitku.

11 Txãa Jesusa's i'kwe'sxa' ahçei'kwe yat tx-aahsawe'sxwa ma'wêta: Naa kweta' selpime' jïçxa wãatahtewa txãái wejx selpisáa yuu txã'wêysak yu'.

12 Kim yuhwa txãa na'wêy nasatx nwe'weya' ãjawa'jsa yu' meea' naa kiwete, naasáa Dxus kaahni Jesus yuuçxáa kwe'sxtxi nwe'wewa'jsa' jïk Pedro'.

13 Pedrowe'sxa' kim yakh yuhwa piyana ùssamée naasáa Jesus yakh yuuçxáa piyana u'jusaçxawa weh yuhwa ùkhna sxiigmée we'wete', judiutx jxkaahsawe'sx wêse'jçxa' kuhtx yajkx.

14 Txãapkaçxha' katxhisa piçthê'ja' txãawe'sx yakh ijk ùsu', açá' ewmée yũuna ùsi'kwe jïya' ãjameeta'.

15 Txajũ' Pedrowe'sxtxi' eka kaseh kahtx txãawe'sx pwe'sxçxáa puutx we'weya'.

16 Sa' na'wêtx puutx we'we:

—¿Kïh yũukxtha'w naa e'z piçthê'jwe'sxtxi'? Txãawe'sxa' naa ãça'sa's txã'wê nuykatxhini's maa maawa Jerusalentewe'sx jxuka jïita', açá' kwe'sxa' txã'wê nuykatxhimeeta' jïya' ãjame'nja'w.

17 Nawa mtee mteewa nasatx jwee tuuthe'khamen juuna' we'we'nja'w, kxah peena yu' Jesus kaapiya'jni's pta'sxmeetxna jïçxa',

18 Pedrowe'sxtxi' ki' pa'yaçxa, wala juuna' we'wetx:

—Ãçxha' peena yu' bagaçxte yuhwa Jesus kaapiya'jni's kaapiya'jmeene'kwe jïte',

19 Pedrowe'sxa' na'wētx pas:

—I'kwe'sx ũus miijajkxwe. ¿I'kwe'sx jxkaah-niçxá's nwēese'jçxa', Dxus jxkaahni yu'sa' nwēese'jmeete wáa ewna?

20 Kĩjkĩhwa kwe'sx yafxju yuu uyna wēse'jna yuuni's weh yuhwa sxuuna' yuuya' ājame'nja'w jĩte',

21 judiutx jxkaahsawe'sxa' ma'wē yuhwa kaapeçxukwe'jya' ājameeçxa', juuna' we'weçxaçxáa kaatxhweete'jtx. Txã'wēme', nasa' jxukay Dxusçxáanatx tuuthe'jna ũsu' txã'wē āça'sa katxhipa'ga.

22 Txãa katxhisa' kuarenta anxu jxthaakwek ji'phu'.

Dxus yuwe's ũukhmée pta'sxwaja's pēyni

23 Txajũ' Pedrowe'sxa' txhweetení yuuçxa', u'jtx txãawe'stxi pi'kxna u'jusawe'sx tasxna. Kxte pa'jçxa', jxuka pta'stxi judiutx jxkaah-sawe'sx ma'wē we'wete txã'wēy.

24 Aça' txã'jĩni's wēse'jçxa', jxukaysa Dxus yakh na'jĩnatx puutx we'we:

—Cielu, kiwe, ĩkh wala, kxte kĩjkĩhçxah ũstxna txãatx jxuka vxit-sa Dxus,

25 na'wēg kwe'we'j idxna selpisáa Davxida's: ¿Kĩh yuupa'gata vxite nasa majũwe'sxwa tx-akwe ũusaçxana suste', nasa' kxulçxáawa ma'wē yũuwa'ja'swa pakwé'?

26 Naa kiwete jxkaahsa' weeçxi'tx, Aça' çxhabte npiiçthē'j pkhaakheçxa, Dxusa's ahçeçxa txã'wēy Nçxi'knawa açe'tx jĩ'k.

27 Txã'jĩni kxtey yuuk. Txãa pa'gatx Herodes vxite' Poncio Pilato kxtee Israelwe'sx petx vxite

nasa yã'jçxa iidx Nçxi'k Jesus kîh pkal yuhwa ji'phmeesa's kaag txã'sna ahçeçxa naa çxhabte pkhaakhe,

²⁸ ma'wẽ yũuwa'ja'swa idx ma'wẽne'ga vx-itçxa nvxiht txãnii entey txã'sa' jxuka kxtey yuuya'.

²⁹ Nawa idxa' txãawe'sx ewmée yũuya' yaakxnijũ nwe'weçxa kwe'sxtxi meen kçxhãaçxa'j, kxah iidx yuwe's kîhte yuhwa ũukhmée pta'sxi'nja'w.

³⁰ Sa' idx pu'çxte', ãça'satxwa nuykatxhiçxa kîjkîhwa kaavxya'ja'ja'nja'w iidx Nçxi'k Jesusa's pi'kxçxa.

³¹ Txã'jîna Dxus yakh puutx we'wena jxã'jaçpkaçxa', txãawe'sx pkhaakhenite' ehd u'kh, naapkaçxa' Dxus Espiritu' txãawe'sx ũuste khêete', Dxus yuwe's ũukhméetx pta'sxi'.

Txãawe'sx ji'phuni's kxteeçxah ji'phuni

³² Kristo's ũuste jxpaga'sa' teeçxsa ma'wẽ yũuwa'ja's yajkxte', jxukaysa txã'wẽçxaçxáa yũuwa'ja'sçxáatx yaaki'. Maa yuhwa na' adx jî jîmeetx fxi'ze'. Kîhwa ji'phuni'sa' jxukaysa ja'daçxaçxáatx jxtxude'.

³³ Jesus jxkaahnisawe'sxa' jweeíçxáatx ũukhmée pta'sxi' Jesus uuçxawa ki' îtxi yuuni's, aç'a' Dxusa' jxukaysatx wala pu'çxhi'k.

³⁴ Txãawe'sx ksxavxyte kim yuhwa jxpee-jxsameetx yu'. Txã'wẽ maawa txãawe'sx kiwe vxite' yat txã'wẽsatx txweyçxa vxyu's jxũna pa'jçxa,

³⁵ Jesus jxkaahnisawe'sx kusetetx dukhe', aça' txãawe'sxa' maaçxah jxpeejxtewa txãawe'sxtxi txudeede'tx.

³⁶ Txã ensu' teexç piçthê'j levxita José yaasesa ũsu'k, Çxipre kiwete upxa. Aça' Jesus jxkaahnisawe'sxa' Bernabé yasetx ki'p. Txãa yase yu', Kvxiiisxa'jsa jïni'.

³⁷ Txãa piçthê'ja' txajx kiwe's txweyçxa vxyu's jxûna pa'jçxa Jesus jxkaahnisawe'sxtxi dukhku.

5

Ananiaswe'sx ptam ïsxiini

¹ Txã'wëy Ananiaswe'sx ptamwa txãawe'sx kiwe's txweytxi.

² Ananiasa' kiwee txweyni vxyu's pxãhnçxáak jxûna u'jçxa jxuka dukheçthu jïna Jesus jxkaahnisawe'sx kusete nvxiht. Txã'wë ïsxiiwa'ja's ptamíi puutx we'weçxatx txã'wë yûu.

³ Aça' Pedro' na'wëk we'we Ananiasa's:

—Eçxthê'ja's çkïjxa'ga iidx ũuste ka'ga'jna ũsu', txã'wë kiwee txweyni vxyu's pxãhnçxáa dukheçxa jxuka dukheçthu jïna Dxus Espiritu's ïsxiikahn?

⁴ Kiwe' iidx jïine' yu', aça' txweyte' vxyuuwa iidx jïine' yu'. Aça' çkïjxa'ga tehwed isasaçxá's pta'sxmée ïsxiiya' yajkx? Kwe'sxtxiçxáa ïsxiimée, Dxusnawa ïsxiig jïk.

⁵ Txã'jïni's wëse'jna'wa, Ananiasa' uuniik wete. Aça' txã'wë yûuni's nasa maawa jxuka jiyusa' seena' wala ũukhwa'ja's ji'phutx.

⁶ Txajũ' piçtakxwe'sx kühçxa, txãa uuníi kakwe's yapçxa pedaaya' jxûna u'jtx.

⁷ Txã'wě yũuni tekx ora skhẽuuçpkaçxha', Ananias nyu Safxirawa pa'kh, nmi' uuni's jĩimée.

⁸ Aça' Pedro' pějxku:

—Mpeeta'sxwe, ¿i'kwe'sx kiwe's kxaz pa'gateçxáa dxih txweykwe'? jĩna pějxte', txãa u'y pasçxa':

—Isa, txã'wěteçxáa yuh txweythaw jĩnak pas.

⁹ Txajũ' Pedro' na'jĩnak we'we:

—I'kwe'sxa' ¿kĩjxa'kwe Dxus Espiritu's ĩsxiwa'ja's ptamĩi puutx we'we'? I'kwe nmi'a' txã'wě ĩsxiipa'ga uute', txã'sna pedasáa açxhçxáa kũjuçta', sa' i'kwenawa jxũna u'jwetxna pedaaya'

¹⁰ jĩçpkaçxha', txãa u'ywa Pedro tasxga uuniik wete. Aça' Ananiasna pedasáa piçtakxwe'sx kũhçxa, Safxirawa uuniĩ ũste uyçxa', jxũna u'jçxa nmi' pukasuy pedaatx.

¹¹ Aça' Dxus yakh fxi'zesawe'sx txã'wěy vxite nasawa txã'wě seena' yũuni's jiyuçxa', wala ũukhwa'j jĩ'phutx.

Kim yuhwa ājanimeesatx wala kaavxya'ja'jni

¹² Jesus jxkaahnisawe'sxa' kim yuhwa ājānimeesa's kījkiħwa kaavxya'ja'jnatx ũsu' çxhabe nasaa ksxavxysu. Sa' Dxus yakh fxi'zesawe'sx txãawe'sx pwe'sx yu' dxuus yat pwa'tetx pkhaakhe' Salomon jĩ jĩ'tx kxtee.

¹³ Nawa Dxus yakhmée fxi'zesa yu' kim yuhwa txãawe'sx yakh pkhaakhena utxa'çmeeta', txã'wě seena' yũute ũukhçxa. Nawa txãawe'sxa' ekaju yu' Dxus yakh fxi'zesatx wala ewçxáa we'wena fxi'ze'tx.

14 Txã'wētewa piçthē'j petx u'y yã'jçxa Kristo's txãawe'sx ũuste jxpa'gasa jweeliçxaatx seena' wala pehnana u'j.

15 Txãjũ' aç'a'satx aadaste kutxi'jçxa Pedro skhēuwa'jsutx khikhe', kxah Pedro psxũ'ju'niçxá'swa jxpa'gasa' katxhitxna sũhçxatx txã'wē yũ'.

16 Jerusalen peeku'jsuwe'sxwa nasa seena' wala pa'jtx, txãawe'sx aç'a'satx pe'jçxa vxite' eçx iiyamunisatxwa pe'jçxa, sa' jxukay nuykatx-hinitx neeyũ'.

Pedro Juanwe'sxtxi ahçeçxa ikh wēeni

17 Txajũ' sacerdote npiiçthē'ja' kxtee ũssa saduceowe'sx yakh seena' wala ahçeçxa

18 Jesus jxkaahnisawe'sxtxi' tudçxa karcelte txahtx.

19 Nawa Dxus angel kus kũhçxa karcel vxitxa's phaadeçxa na'jĩçxak eka kutxi'j:

20 —Dxus yatna ki' u'jçxa nasatxi' pta'sxine'kwe Dxus yakh fxi'zewa'ja's jĩte',

21 wala kusĩtey Dxus yatna u'jçxa pta'sxya' takhtxi. Naapkaçxha' sacerdote npiiçthē'j vxite' kxtee ũssa judiu nthē'jsawe'sx jxukaysa pkhaakheçxa Jesus jxkaahnisawe'sxtxi' karceluh kutxi'jya' kaahtx.

22 Aç'a' policiawe'sxa' karcelte uymeeçxa', pta'sxya' ki' sxawedtxi:

23 —Karcel vxitxa' wala ew aphni ũsa', aç'a' kxtee thegsawa vxitxte lajxmxéetx ũs yu'. Aç'a' kwe'sx kũhçxa vxitxa's phaadete', Pedrowe'sxa' meetx yu' jĩtx.

²⁴ Txã'jĩna pta'sxte', sacerdote npiĩthẽ'jwe'sx vxite' kxtee dxuus yatte thegsawe'sx npiĩthẽ'j jxukaysa na'wẽtx yaaki': Naa yuwe' ¿ma'wẽ yũuwa'jsakx? sũjuçpkaçxa',

²⁵ teeçx piçthẽ'j pta'sxna kũjk:

—Kancelte ktxaja'ji'kwe txãawe'sxa' dxuus yatte yã'j ki' kaapiya'jna ũsta' nasatx jĩk.

²⁶ Txajũ' dxuus yatte thegsawe'sx npiĩthẽ'ja' policia yakh u'jçxa jxũna kũhtx kĩhwa pkx-umée, Pedrowe'sx ju'gusa nasa' ũusaçxaçxa kwet wãatatahwe'sxte.

²⁷ Sa' judiu nthẽ'jsawe'sx tasxte jxũna kũhte', sacerdote npiĩthẽ'ja' na'wẽk pẽjx:

²⁸ —Kwe'sxa' i'kwe'sxtxi' bagaçxte yuhwa peena yu' pta'sx kaahmeetha'w Jesus kaapiya'jni's. Aça' i'kwe'sxa' ¿kĩjkwe yuu? Naa Jerusalente mtee mteewa jxuka i'kwe'sx kaapiya'jni's yuutaçxa kwe'sxtxi yuuwesa vxit ya'wai'kwe Jesus uuni's.

²⁹ Txã'jĩte', Pedrowe'sx paççxa':

—Kwe'sxa' nasaa jxkaahni yuutxi' nwẽese'jwa'j ji'phmeetha'w, naasáa Dxusçxáana nwẽese'jwa'jsatha'w.

³⁰ Kwe'sx yaççawe'sx txãawe'sx Dxusa' Jesusa's ki' ĩtxi vxitku kluuskhẽ a'kxçxa i'kwe'sx ikhni's.

³¹ Dxusa' txã'wẽ yũuçxa cielute txajx pukate paçu ju'gte ki'pçxa Jxkaahwa'jsak vxit, kxah Israelwe'sxa' txãawe'sx pkaltxi nvxihtçxa Dxus tasxte sxawedte, Jesusa' nwe'wena.

³² Txã'wẽ yũuni's kwe'sxa' jiitha'w, aça' Dxusa' txajx Espiritu's ũsku txã'sna nwẽese'jsatx txãa Espirituwa jiia' jĩte',

³³ judiu nthě'jsawe'sx jweeíçxáa ũusaçxaçxa Pedrowe'sxtxi ikhya'watx yu'.

³⁴ Nawa kxtee txãawe'sx ksxavxyte teeçx fxariseo Gamaliel yaasesa u'pu'k, Dxus leya's kaapiya'jsa wala jxtuhthesa. Txã' Jesus jxkaahnisawe'sxtxi eka dudte kutxi'khaahçxa,

³⁵ judiu nthě'jsawe'sxtxi na'wëk we'we yu-juçxa:

—Israelwe'sx, naa piçthě'jwe'sxtxi na'wë yũuya'wai'kwe txã'sa' mpa'yajkxwe.

³⁶ I'kwe'sxa' miyajkxwe: teeçx ente' vxyaak teeçx piçthě'j Teudas yaasesa wala çxhãçxhasath jĩna, aça' txajx ju'gu u'jsa kuartocientos nasatx yu'. Nawa txãa npiiçthě'ja's ikhnik yuu, aça' txajx nasa' jxuka pũsxite', txãa yuwe' pçuuk.

³⁷ Txã'wë yũuni e'su, nasatx eçte ãsx ente', teeçx piçthě'j txã'wëy vxyaak, Judas Galileajũwe'sx, aça' txajx ju'gusa nasa wala kuh utxaatx. Nawa txãa Judasa's ikhte', txajx ju'gusawa jxuka pũsxitx.

³⁸ Txãa pa'ga naa piçthě'jwe'sxtxi' kuçx yuunuwe. Naa yuwe' piçthě'jwe'sxçxáa we'weniçxa yu', kĩhwa yũumeetewa pçuuna.

³⁹ Nawa Dxus jĩi wáana aça' txã'sa' i'kwe'sxa' ivxiituya' ãjãmeene'kwe. Dxus yakh puisáa yuuya'mée mpa'yajkxwe jĩte',

⁴⁰ Isa yuh we'wek sũhnatx neeyũu jxukaysa. Txajũ' Jesus jxkaahnisawe'sxtxi pa'yaçxa': ãçxha' peena yu' Jesus kaapiya'jni's pta'sxmeene'kwe jĩna we'weçxa, wala peçxujkweçxaçxáa txhwetetx.

⁴¹ Aça' Jesus jxkaahnisawe'sxa' judiu

nthē'jsawe'sx tasxuh wala weçxana kasehtx txã'wē Jesus kaapiya'jni's pta'sxpa'ga pxthaa yuuwa'ja's ji'phutha'w sūhna.

⁴² Maa ente yuhwa sxuuna' fxi'zemée een isa Dxus yuwe's kaapiya'jna txã'wēy Jesukristo itxi yuuni'swa pta'sxna pekūhna nestxi yu' yat-su vxite' dxuus yatte.

6

Dxuus yatte thegwa'jsa siete nasa txhitxhni

¹ Txãa ensu' Kristo's jxpa'gasawe'sx wala pehnate', kxtee griego yuweju we'wesawe'sxa' judiu yuweju we'wesawe'sxtxi ūusçxa we'wewa'j uytxi kwe'sx ji'j vxiuda yuutxi' ew sã'jīmée ūsta' een isa peesni ũ'a's jīte',

² Jesus jxkaahnisawe'sx docesa jiyuçxa', Kristo's jxpa'gasawe'sxtxi jxuka pkhakhçxa na'jītx:

—Dxus yuwe's pta'sxmée, sã'jīwa'jçxá's jx-thaakwe pa'pçxuya' yu' ãjāme'nja'w kwe'sxa'.

³ Txã'wē yūuya'mée i'kwe'sx yakh ūssa yakthē'jwe'sx siete piçthē'j mtxhiitxhwe, Dxus dxi'pte ew fxi'zesa, Dxus Espiritu's ūuste jxpa'gasa, ma'wē yūuwa'ja'swa ew jiisatx. Txã'wē yuuçxa txāawe'sxtxi dukhe'nja'w sã'jīna ūswa'j mjīia's.

⁴ Aça' kwe'sxa' Dxus yuwe's kaapiya'jwa'jçxá's thegu'nja'w, Dxus yakh pu'vxitumée puutx we'wena jīte', jxukaysa txã'wē yūuwa'ja's yajkx-txi.

⁵ Sa' Dxus yakh jxpubamée fxi'zesa Estebana'stxi txhitxh Dxus Espiritu's ūuste ji'phsa.

Vxite' Fxelipe, Prókoro, Nikanor, Timón, Parmenas, Nikolas Antiokía çxhabuwe'sx txãawe'sxtxi txhitxhnisa neeyũu. Txãa Nikolasa' judi-umeeçxawa judiuwe'sx na'wëy yuuna fxi'zeya' utxasaak yu'.

⁶ Txãa piçthë'jtx txhitxhçxa', pe'jna u'jtx Jesus jxkaahnisawe'sx tasxte, açã' txãawe'sxa' dxikthesu peekizeçxa Dxus yakh puutx we'wetx txãawe'sx pa'gate.

⁷ Txajũ' Dxus yuwe' walaana u'kh, açã' Kristo's jxpa'gasawa Jerusalente seena' wala pehnak, txãa pa'ga kxtee judiuwe'sx sacerdote yuhwa Jesus kaapiya'jni's jxpa'gatx wala kuhsa.

Estebana's preesu'jni

⁸ Açã' Estebana' Dxus pu'çxte', kim yuhwa ãjanimeesa'swa kaavxya'ja'jnak fxi'ze' txãa çxhabte.

⁹ Txã'wë yũute', judiu vxite kiwejuwe'sx Cirene, Alejadría, Cilicia, Asia txãa kiwesuwe'sxa' Esteban yakh ũusçxa we'wena kasehtx. Txãawe'sxa' karceluh txhweetenisa txãawe'sx pwe'sxçxáa fxiitx pkhaakheni yat ji'phu'.

¹⁰ Nawa txãawe'sxa' pasya' ãja'çmeeta' Estebana' Dxus Espiritu kaaũusuthe'jni's we'wete'.

¹¹ Txajũ' vxitetx vxyu dukhtxi txã'wë Moisesa's açewe'wena Dxusnawa açe'k jĩna ĩsxiina pãatxhĩ'khkahn.

¹² Txã'wë yũuçxatx kaaũusçxa'j nasa eka-juwe'sx vxite' judiu nthë'jsawe'sx vxite' Dxus leya's kaapiya'jsawe'sxtxi. Sa' Estebana's tudçxa jxũna u'jtx judiu nthë'jsawe'sx tasxte.

¹³ Sa' pakwetx na'wě ĩsxiina pta'sxwa'jsa: Naa piçthē'ja' een isa dxuus yata's açewe'wena txā'wēy Dxus leya'swa açewe'wena nesku yu'.

¹⁴ Jesus Nasarethūwe'sxa' naa dxuus yata's ivxiituçxa, Moises kaapiya'jni'swa ivxiituwa'jsa' jīna kaapiya'jni's kwe'sxa' wēse'tha'w.

¹⁵ Txā'jīna ĩsxiite', judiu nthē'jsawe'sx vx-ite' kxtee pkhaakheçxa ũssa' Esteban dxi'pte thegçxa' Dxus angel na'wētetx uy.

7

Esteban pasni

¹ Txajū' sacerdote npiiçthē'ja' Estebana's pējxku:

—¿Na'wě pta'sxi'tx txā' jxuka isa yuhna'? jīte',

² Estebana' pta'sxya' takhku:

—Yakhthē'jwe'sx, na's mwēese'jwe: Kwe'sx Dxus cielutewe'sxa' yaçgathē'j Abrahana's vxyaak Harán kiwete u'pxa' u'jmey nee Mesopotamia kiwete ũsiyna.

³ Sa' na'wěk jxkaah: Iidx kiwe petx iidx nwe'sx jxuka nvxihtçxa me'j kiwe ũsya'wath kxtee.

⁴ Txā'jīte', Abrahana' Kaldea kiweju kasehçxa Harán kiwetek u'pxa' u'j. Txajū' Abraham neya' Harán kiwete uute', Dxusa' Abrahana's pe'jna yuwe'k naa kiwete aççh ũsi'kwe kxtee.

⁵ Nawa Dxusa' Abrahana's naa kiwete nuypa'jçxa', kiwe le'çxkuēçxáa yuhwa txagaçxhíi yu' ũsme'. Nawa idxa's e'suçxáawa naa kiwe's ũsu'nja, aç'a' idx uute', iidx luuçx jīi neeyūuna jīk. Txān ensu' Abrahana' luuçx

ji'phmeetewa txã'wěk iidx luuçx jïi jïna puutx we'we.

⁶ Abrahan ji'j ma'wě fxi'zewa'ja'swa Dxusa' pta'sxku: Iidx ji'jwe'sxa' vxite kiwesu pkxuuna jxpe'jni kuartocientos anxu fxi'zetxna.

⁷ Txã'wětewa txãa pkxuusawe'sxtxi' kasti-gaï'nja, kxah iidx ji'ja' txajũ kasehçxa naa kiwete adxa's selpiiya' yuwetxna jïk.

⁸ Dxusa' Abrahan yakh puutx we'weçxa', txãa puutx we'weni's peçxkanaya'mée jïçxa cirkuncidây kaakh txajx luuçxtxi'. Txãa pa'gak Abrahamana' txajx nçxi'k Isaak upxhni oçxo en äjaçpkaçxha', cirkuncidây. Txã'wěy Isaakwa txajx nçxi'k Jakoba's cirkuncidâyku. Aça' Jakobwa txajx nçxi'kwe'sx docesatx txã'wěyçxaçxáak yuu. Txãa Jakob nçxi'kwe'sx txã'wě Israelwe'sx ji'j docesa neywe'sxta'.

⁹ Txãa Jakob nçxi'kwe'sxa' nyakh Jose's ahçeçxa txweytxi, Egipto kiwen jxüna u'khan. Nawa Dxusa' José yakh txuteméek üsu' nxuste fxi'zeçtewa nwe'wena.

¹⁰ Txãasak Egiptote jxkaahsa Fxaraon dxi'pte ew fxi'zewa'ja's üs. Txã'wě yüute', Fxaraona' Jose's Egiptote ne'jwe'sx ki'pçxa jxkaahsa yata's thegwa'jsak nvxiht.

¹¹ Txãn ensu' Egipto kiwete jxuka Kanaan kiwete yã'jçxa wala wěje pa'kh kxüusu'jwa'jsa, aça' kwe'sx yaçgathê'ja' ü'wa'j uymeeta'.

¹² Nawa Jakoba' Egipto kiwete skuutxh txweywa'j üsa' jïni's jiyuçxa', txajx nçxi'k kwe'sx yaçgawe'sxtxi' kaakh. Txãa entetx nyafxçxah Egipto kiwen u'j.

13 E'su ki' u'the', Jose' pta'sxku: Adxa' i'kwe'sx nyakhthu jīna. Aça' Egipto kiwete jxkaahsa' jiyuk Jose' kiim ji'thewa.

14 Txajũ' Jose' txajx ney Jakob petx nwe'sx jxukaysatx yuukaakh. Txãawe'sxa' setenta y cinko âhtx yu'.

15 Txã'wē yūupa'gak Jakoba' Egipto kiwen u'pxa' u'jçxa kxtee uu, aça' kwe'sx ji'j nyafx-tewe'sxwa txãa kiwete uux.

16 Nawa e'su txaçxte', José dxi'thtxi jxūna yuhçxa Sikem kiwetetx pedáa, Abrahana' Hamor nçxi'kwe'sxtxi kiwe weyku uusaatx pedawa'j jĩçxa kxtee.

17 Dxusa' Abrahana's kiwe ũswa'j en ãjaçte', Israelwe'sx Egiptote ũssa wala pehnatx.

18 Naapkaçxha' Egipto kiwete jxkaahwa'jsa' Jose's jiimeesak u'ka.

19 Txãa jxkaahsa' kwe'sx yaçgawe'sxtxi ahçena pkuuuya' takhku, luuçx u'se upxsatx kthegu'jmée uukahn.

20 Naapkaçxha' txãa ensu' Moiseswa up-xku Dxus peeygãani wala zhiçxkwesa. Aça' neywe'sxa' yatte tekh a'te jxpe'jtx.

21 Nawa jwee yu' jxpe'jya' ãjameeçxa', yu'wala pukaga sũthte', jxkaahsa niisa uyçxa', txãak nuywala txajx luuçx na'wē vxitçxa.

22 Txãa pa'gak Moisesa' kĩhtewa jxuka kaapiya'jni yuu Egipto kiwetewe'sx na'wēy, sa' kĩhtewa jxtuhthesak yu'.

23 Moisesa' kuarenta anxu ji'phuçxa', txajx nwe'sx Israelwe'sx ũsnite thegya' u'jya' yajkxku.

24 Kxtee ũsçxa uyku teeçx Egiptotewe'sx txã'wē Israelwe'sx teeçxa's pkuuuna ũste, aça' Moi-

sesa' ähmeeekwesa ju'gu yuuçxa Egiptotewe'sxa's ikhku.

²⁵ Israelwe'sxa' Dxusne' kaah kwe'sxtxi nwe'weya' süjkahnku txã'wë yüu Moisesa', nawa txãawe'sxa' txãa sühmeeta'.

²⁶ Kuskuskhê' Moisesa' uyku e'z Israelitawe'sx puina üste, sa' na'jïnak nwe'we wëe: I'kwe'sxa' pxakhsai'kwe, sa' ¿kïjxa'kwe pui'? jïte',

²⁷ vxite's uyisá' Moisesa's çxatçxa na'jïk: ¿Kimga idxa's npiïçthê'jsa kwe'sxtxi nwe'wewa'jsa na'wë vxitçxa nvxiht'?

²⁸ Jü'na ma'wëga Egiptotewe'sxa's ikh ¿txã'wëy adxnawa ikhe'nja süjuwá'ga? jïte',

²⁹ Moisesa' txãa kiweju üphna u'jçxa Madian kiwenku u'j. Kxteek txajx kiwemeete pa'jçxa u'pu', sa' e'z luuçxku ji'phu.

³⁰ Txãa kiwete Sinai vxiç utxasu nasa u'pnimeete kuarenta anxu fxi'zeçte', çhüçh tasxte ipx behnak vxyaa. Txãa pxãhte Dxus angela'sku uy.

³¹ Txã'wë uyçxa', Moisesa' kuh yajkxna utxaak ew thegya'. Naapkaçxha' Dxus we'weni na'wëk pthüuse:

³² Adxa' iidx yaçgawe'sx Abraham, Isaak, Jakob txãawe'sx Dxusthu jïte', Moisesa' üukhna yayaçxa thegme'.

³³ Aça' Dxusa' Moisesa's we'weçxa': Iidx pel-gatxi's mpahde, ayte' kïh pkal yuhwa ji'phmeesa üsthu naa pa'ga.

³⁴ Sa' Egiptote adx nasa pxthaa yuuni's uythu, sa' pxthaa we'weni'swa wëse'th. Txãasath yuwé' nwe'weya'. Aça' adx jxkaahni's nwëese'jçxa Egipto kiwen u'jwene'ga jïk.

35 Israelwe'sxa' nyafxí' Moisesa's na'jĩnatx ahçe: ¿Kimga idxa's npiiçthē'jsa kwe'sxtxi nwe'wewa'jsa na'wē vxitçxa nvxiht? Txã'jĩna ahçetewa, Dxusa' çhũçh tasxte ipx ksxavxyuh vxyaaçxa', Moisesa's kaakh npiiçthē'jsa na'wē nwe'weya'.

36 Moisesku txã'wē kwe'sx yaçgawe'sxtxi Egipto kiwejuh kutxi'j txãa kiwete kījĩhwa seena'sa kaavxya'ja'jçxa. Txã'wēy Īkh Wala Behsajuwa kutxi'kh sa' nasa u'pnimeesu kuarenta anxuk txã'wē kim yuhwa ãjãnimeesa's kaavxya'ja'jna ũsu'.

37 Txãa Moisesiçxáak Israelwe'sxtxi na'wē pta'sx: I'kwe'sx ji'j teeçxsa's kutxi'jçxa Dxusa' kaajxa'wa' txajx yuwe's pta'sxkahn, na'wēk adx-nawa kaah txã'wēy. Aça' txã'sa' nwēese'jwa'j ji'phi'kwe jĩk Moisesa'.

38 Moisesku txã'wē nasa u'pnimée kiwete ũsu' kwe'sx yaçga Israelwe'sx yakh. Sa' Dxus angel yakhwa Sinaí vxiç walate puutx we'weçxa kwe'sx yaçgawe'sxtxi pta'sxku. Sa' Dxus jxkaahna kwet taplate fxi'jnıtxwa jxpa'gak kwe'sxtxi ũsya'.

39 Txã'wē yũutewa, kwe'sx yaçga Israelwe'sxa' Moisesa's nwēese'jmée ahçeçxa, Egipto kiweniı sxawedxa'watx yu'.

40 Txajũ' Aarona's na'wētx we'we: Kwe'sxtxi pe'jna u'jwa'jsa dxus na'wēsa mpheu'j. Txã'wēme' Moises Egipto kiwejũ kwe'sxtxi kutxi'jsa kĩhne' yuu nawa vxyaame'.

41 Txã'jĩçxa' txãawe'sx kuseju klaa luuçx na'wē pheu'jçxa txã'snatx wala weçxana tajkx ikhçxa

kab.

⁴² Txã'wẽ yũute', Dxusa' txãawe'sx tasxuh txuteek, ãe walasu estrelxa ũsta' txãaçxáatx neewe'wekahn. Txã'wẽ yũuwa'ja's Dxus yuwe pta'sxsawe'sx librute na'wẽ fxi'jni':

Israelwe'sxa' nasa u'pnimée kiwete kuarenta anxu ũşçxa',

¿adxna weçxaya'kwe tajkx ikhçxa kabna ũsu'á'?

⁴³ Weh yuhwa txã'wẽ yũumée adxna weçxapkaçxte,

Naasáa dxus itximeesa Molokçxáanai'kwe tx-aja',

Txã'wẽy estrelxa Renfxán yaasesa's i'kwe neewe'we' i'kwe'sx kuseju pheu'jnisatx.

Txãa pa'ga i'kwe'sxtxi naa kiwejũ kutxi'jçxa Babilonia kiwen kaajxa'wath jĩna fxi'jni'.

⁴⁴ Kwe'sx yaçgawe'sxa' nasa u'pnimée kiwete ũşçxa', Dxusna weçxana ũsni yat ji'phu'tx, Dxusa' ma'wẽne' Moisesa's vxitkaah txã'wẽy vx-itçxatx ji'phu'.

⁴⁵ Aça' txã'snatx kwe'sx yaçgawe'sx Joswé yakh yuusa' jxpa'gaçxa jxũna yuwé'. Sa' judiu ji'jmée vxite nasa ũsni kiwete ka'ga'jçxa, Davxid entepkaçxtxi ji'phu'. Txãa kiwe's Dxus pu'çxte vxite nasatx kutxi'jçxa txãawe'sxtxi iiyamu.

⁴⁶ Dxus peeygãanisa Davxida' teeç dxuus yat txaahwa'j pheu'kh kxtee Jakob ji'jwe'sx Dxus ũswa'j.

⁴⁷ Nawa txãa dxuus yata's Salomonku txah.

⁴⁸ Txã'wẽtewa, Dxus cielutewe'sxa' piçthẽ'jwe'sx txaahni yatte yu' ũswa'jsa yu'çme'. Txã'wẽçxaiik Dxusa' txajx yuwee pta'sxsas' na'wẽ kwe'we'j:

49 Cieluçxáa adx jxkaahna ũswa'ja',
Aça' kiwe' adx çxida txahwa'jçxáa vxitnisa'.
Txã'wête', ¿ma'wê adx ũswa'j yat txajaki'kwe
naa kiwete?

¿Teeçx ahte adx jxkaasewa'j adx vxitnimeesa
ũsmanx?

50 Nakwe seena' kĭjkĭhwa ũsta' nawa txã' jxuka
adx vxitnisaçxaçxáata' jĭ'k Dxusa'.

51 Txã'wête'wa, Dxus yuwe's i'kwe'sx ũuste
jxpa'gaya' wa'lçxa thũ'wê's aphçxa i'kwe fxi'ze'
Dxusa's jĭimée na'wê. Bagaçxtewa Dxus Espir-
itu's ahçenaçxáa ũsi'kwe i'kwe'sx yaçgawe'sx
na'wêy.

52 I'kwe'sx yaçgawe'sx ¿maaçxa' Dxus yuwe
pta'sxsawe'sxtxi pkuusamée ũstxmanx?
Teeçx yuja' kĭh pkal yuhwa ji'phmeesa jĭna
pta'sxsawe'sxtxi ikhtxi. Açxha' i'kwe'sxa' txãa
pkal ji'phmeesa's ahççxa ikhi'kwe.

53 Dxus angel i'kwe'sxtxi Dxus leya's ũstewa,
nwêese'je'çmée i'kwe jĭte',

54 txãawe'sxa' wêse'jçxa', ki'thtxi ksuusu'jnax
ũusaçxa Estebana's.

Estebana's ikhni

55 Txã'wête'wa, Estebana' Dxus Espiritu's ũuste
jxukak ji'ph yu', sa' cielute pagayçxa Dxus u'pni
seena' zhiçxkwesa's uyku, txã'wêy Jesuswa Dxus
pukate yujuçxa ũstek uy.

56 Sa' txã'wêsa's uyçxa' na'jĭk:

—Mthegwe, adxa' uyna ũsthu cielutewe'sx
Dxus Nçxi'k Nasa Yuusá' Ney pukate ũsa'
jĭçpkaçxha',

⁵⁷ txãawe'sxa' thũ'wētx yaaphçxa, sus weyçxa jxukaysa Estebana's āaphtxi ikhya'.

⁵⁸ Sa' çxhabuh kutxi'jçxa Estebana's açesawe'sxa' kwet wāatatahtx, txãawe'sx atxhtxi teeçx piçtakx Saulo yaasesa's kthegu'jçxa.

⁵⁹ Kwet wāatatajaçpkaçxa', Estebana' na'jīnak Dxus yakh puutx we'we:

—Jesus, adx ũusa's miipa'ga jīna'wa,

⁶⁰ peejxūkweçxa susku we'we na'jīna:

—Meen peltunaĩ na'wē yūuçta' txãawe'sxtxi'.

Txã'wē we'wena'wa uuk Estebana'.

8

Dxus yakh fxi'zesawe'sxtxi Saulo ahçeçxa pakwení

¹ Estebana's ikheçte', Saulo' weçxanak ũsu'.

Isa txān entetx iiméh seena' ahçeya' takh Dxus yakh fxi'zesa Jerusalente'wē'sxtxi. Txã'wē yūute', jxukaysa pūsxitx Judea kiwesu vxite' Samariasu, naasáa Jesus jxkaahnisawe'sxçxáatx neeyūu Jerusente.

² Estebana's ikhte', pedaaya' jxūna u'jtx Dxus yakh fxi'zesa yakthē'jwe'sx wala ũ'nena.

³ Naapkaçxha' Saulo' Dxus yakh fxi'zesawe'sxtxi ahçeçxa yat iisak pakwena u'j txajū juuna' yuuna kutxi'jçxa karcelte ktxaaja'jya' piçthē'j petx u'y yā'jçxa.

⁴ Nawa Jerusalen çxhabu ũphna u'jsa yu', Dxus yuwe's mteewa iipta'sxtxi u'jwe'.

Dxus yuwe's Samariate pta'sxni

⁵ Txajũ' Fxelipe' Samaria kiwete teeçx çxhabte pa'jçxa Kristo' kintewa pta'sxku.

⁶ Aça' kxtee nasa pkhaakhesa' Fxelipe we'weni's wala jxpa'yajkx wëse'jtx, sa' kim yuhwa ãjãnimeesa's kaavxya'ja'jni'swa uytxi.

⁷ Txã'wë maazkuëe nasawa katxhinitx neeyũ' txã'wë txãawe'sx ùuste eçx ewmeesa sus weyna kasehte. Sa' txã'wëy ëseya' ãjasamée vxite' çxida puuple u'juya' ãjasameewa katxhitx.

⁸ Txã'wë yũute', txãa çxhabte nasa jxukaysa wala weçxana ùsu'tx.

⁹ Txãa çxhabte' teeçx dxijxuusáa Simon yaas-esa' Samariate nasatx wala kaypuba'jna ùsu'k, adxa' kíhtewa jxuka jiisath jïna.

¹⁰ Aça' txã'snaçxaçxáatx nwëese'jna weçxana ùsu' luuçx ma'k yuu thë'jsa ma'k yuu nawa jxuka na'jïna:

—Naa piçthë'ja's Dxusne' pu'çxhi' jï'tx.

¹¹ Sa' txajx jxkaahni's jxukatx nwëese'je', txã'wë txajx dxijxuuni yakh wala txaçxyã'j kay-puba'jna ùsu'ne' naa pa'ga.

¹² Nawa Fxelipe' Dxus jxkaahwa'ja's pta'sxna pa'jçxa, Jesukristo' Dxus kaahnisa' jïte' jiyuçxa', piçthë'j petx u'y yã'jçxa yu'te ya'bautisäytxi.

¹³ Aça' txã'wë txãa dxijxuusaawa Fxelipe pta'sxni's jiyuçxa', yu'te ya'bautisäyçxa Fxelipe yakh u'ju'k. Sa' txã'wë kíjkíhwa kaavxya'ja'the' txã'sna uyçxa' kujk yajkxna u'ju'.

¹⁴ Txajũ' Jesus jxkaahnisa Jerusalente ùssa' txã'wë Samariatewe'sxwa Dxus yuwe's txãawe'sx ùuste jxpa'gaçxa ya'bautisäytxi jïni's jiyuçxa', kaahtx Pedro's Juan yakh.

15 Aça' kxtee txãawe'sx pa'jçxa', Dxus yakh puutx we'wetx Dxus yuwe's jxpa'gasa Samariatewe'sx pa'gate, Dxus Espiritu's jxpa'gakahn.

16 Txã'wëme', nyafxíi yu' Dxus Espiritu's ji'phmeetx yu', naasáa Jesusa'sçxáatx jxpa'gaçxa yu'te ya'bautisãysa yu'.

17 Txajũ' Pedrowe'sxa' txãawe'sx dxikthesu peekizeçxa Dxus yakh puutx we'wete', Dxus Espiritu's jxpa'gatx.

18 Aça' txã'wë yũuteçxáa Dxus Espiritu kijaçte uyçxa', txãa dxijxuusáa Simona' vxyu ũs wëek

19 na'jina:

—I'kwe'sx txã'wë ãjani's adxnawa mahwe, kxah adxwa dxikthesu peekizeteçxáa maawa Dxus Espiritu's jxpa'gatxna jite',

20 Pedro pasçxa':

—Iidx vxyu' idx yakh ja'da vxituna, Dxus peesni's vxyu yakhgu wey wëje' naa pa'ga.

21 Idxa' kwe'sx na'wëy yuuwa'j yu'sa' le'çxkwe yuhwa jxpa'gawa'j ji'phmeeg, Dxus dxi'pte ewmeeg yaaki' naa pa'ga.

22 Txã'wë ewmée yũuwa'jçxá's yaakxni's nvx-ihtçxa, Dxusa's mneewe'we. Txã'wë yũute', peltunaĩwáana.

23 Txã'wëme' iidx ũuste iwejçx iwejçx yaakxwa'jçxáana uta ji'phgu, aça' txã'wë yaakxnisa' jxuka idxa's tudçxa ji'pha' jite',

24 Simon pasçxa':

—I'kwe'sxa' adx pa'gate Dxus yakh meen puutx we'wewe. Txã'wëme', Dxusa' pel-tunãywe'sxmeeta' adxa's jik.

²⁵ Txajũ' Jesus jxkaahnisawe'sxa' Dxus yuwe's pta'sxçxa txajũ kasehtx Samaria kiwesu vxite' çxhabkuẽsu Dxus yuwe's pta'sxya'. Sa' txã'wẽ yũuçxatx Jerusalenna ki' sxawed.

Fxelipe' Etiopiajuwe'sx yakh puutx we'weni

²⁶ Txãa e'su' Dxus angela' Fxelipe's na'jĩnak jxkaah:

—Ayjxu kasehçxa me'j Jerusalenu Gasa çxhabna u'jni dxi'jsu.

Txãa dxi'ja' nasa u'pnimeesuk skhẽwna ũsu'.

²⁷ Txã'jĩte', Fxelipe' txãa dxi'the u'jweççxa' teeçx piçthẽ'j eunuko Etiopía kiwejuwe'sx u'jweçtek uy. Txãa piçthẽ'ja' Etiopía kiwete reina Kadace tasxte vxyuu jxaawsak yu'. Sa' Dxusa's weçxaya' pa'jsak yu' Jerusalemte.

²⁸ Txãasak txajx kiwenii sxawedna txajx u'jni kaçxetilxate kaççxa Dxus yuwe pta'sxsa Isaias libru's lëeyna u'jweç yu'.

²⁹ Txajũ' Dxus Espiritu' Fxelipe's we'wek: Kaçxetilxate u'jsa's kpajkxya' me'j jĩte',

³⁰ Fxelipe utxaana sêhçxa' Isaias librute na'jĩna lëeyni's wëse'jçxa' pëjxku:

—¿Jiyu'gá' iidx lëeyni's? jĩte',

³¹ txãa piçthẽ'ja' na'jĩk:

—¿Ma'wẽ yũuçxa jiyuki'th? kimwa pta'sxmeete' jĩçxa', Fxelipe's kaçxetilxate tejkaçxa pukate kaçxkaakh.

³² Sa' Dxus librute na'wẽ fxi'jni'sku lëeyna u'jweç yu':

Piisxakuẽ na'wëk ikhya' jxũna u'jni yuu.

Piisxakuẽwa ma'wëga khas wakaçte' pebe'çmée, txã'wëy txãawa pebeeme'.

33 Æhmeeqwesa na'wẽ yuupa'ga, nwe'wenimeek uu,

Aça' txajx luuçx jĩnisa kim yuhwa neeyũumeeta'.

Txã' naa kiwete txaçx fxi'zemeyna ikhnik yuu naa pa'ga.

34 Txajũ' txãa piçthẽ'j lëeyna u'jsa' pëjxku Fxelipe's:

—Adxa's meen peeta'sx, Dxus yuwe pta'sxsa ayte we'we'k txã' ¿kimnaga we'we'? ¿Peekx uuwa'ja's wá' we'we'? meeçxa' ¿vxitesa uuwa'ja's wá' pta'sxi'? jĩte',

35 Fxelipe' txãa lëeyni's pta'sxku: Na' Jesus uuwa'ja'sku we'we' jĩna.

36 Txajũ' teeçx ahte yu'te pa'jçxa', txãa piçthẽ'j Etiopiajuwe'sxa' na'jĩk:

—Ayte yu' u'pa' aça' adxa' ãçxhíi ya'bautisây wëewaça', ¿ãjãma'th? jĩte', Fxelipe' na'jĩk:

37 —Iidx úsusuh jxuka txã'wẽ Jesusa' Dxus Nçxi'kne' yu' sũhçxa yu', ya'bautisâyya' ãjane'ga jĩna pta'sxte', txãa piçthẽ'j pasçxa':

—Jesukristo' Dxus Nçxi'k yuh yu'ne' sũju'th adxa' jĩk.

38 Txajũ' kaçxetilxa's kxuuju'jçxa, e'zúi yu'te kíhçxa Fxelipe' bautisâyku txãa Etiopiajuwe'sxa's.

39 Txãa yu'ju kasejeçpkaçxha', Dxus Espiritu' Fxelipe's jxũna u'kh, aça' txãa Etiopiajuwe'sxa' peena yu' uymeeçxawa txajx dxi'the wala wëtwët weçxana u'kh.

40 Txajũ' Fxelipe' Azoto çxhabte pa'jçxa', çxhab iisak Dxus yuwe's pta'sxna u'j, Cesarea çxhabte pa'phkaçx.

9

Saulo' Dxus yakh fxi'zeya' utxani
(Hch 22.6-16; 26.12-18)

¹ Naapkaçxha' Saulo yu' ikhwēena nesku yu' Jesusa's nwēese'jsawe'sxtxi. Txāasak sacerdote npiičthē'j tasxna u'j,

² karta pējxya' Damasko çxhabna u'jçxa judi-uwe'sx pkhaakheni yat-su Jesusa's nwēese'jsatx pakweçxa' piçthē'j petx u'y tudçxa Jerusalenna preesu jxūna u'jya'.

³ Damaskote pa'jya' utxaana u'jweçpkaçxha', txajx dxi'pte uymeenusku cieluju eena'sa kweeth.

⁴ Aça' Saulo' weteçxa' wēse'kh na'wē we'weni's:

—Saulo, Saulo, çkīh yūupa'gaga adxa's ahçeçxa pkxuuya' pakwé'? jīte', Saulo' pējxku:

⁵ —Idxa' çkimga? jīna. Sa' na'wē we'weni'sku wēse'j:

—Adxii Jesusthu, idx na'wē ahçeçxa pkxuuya' pakwe'g txāath. Idxa' peekiçxáa ya'kpā'yuuwa'ja's pakwena ūsgu jīte',

⁶ Saulo' ūukhnite yayana na'jīk:

—Idxa' çkīhga yūu jxthāasu' adxa's? jīte', na'wēk pas Jesusa':

—Kiiteçxa me'j çxhabna. Kxtee pa'the ya'pta'sxina kīh yūuwa'ja'swa jīk.

⁷ Txā'wē yūute', Saulo yakh u'jsa' wala ūukhtxi, txā'wē puutx we'wetewa kimnawa uymeeçxa.

⁸ Txajū' Saulo' kiiteçxawa uyya' ājame'. Aça' pu'kisçxa jxūna u'jtx Damaskon.

⁹ Kxte' tekx en uyya' ājamée, txã'wěy kīhwa ũ'meek u'pu'.

¹⁰ Damaskote' Jesusna nwēese'jsa Ananias yaasesak u'pu'. Txã'sa' Jesus vxyaaçxa na'wěk we'we:

—Ananias jīna pa'yate', Ananias pasçxa':

—¿Kīh kaajxa'waga? jīte',

¹¹ Jesus we'weçxa':

—Teeçx klxiikhun Ku'le yaasesate me'j. Kxtee pa'jçxa Judas yatte pēyine'ga: Teeçx piçthē'j Tarsojuwe'sx Saulo yaasesa's peejxthu jīna. Txãa piçthē'ja' Dxus yakh puutx we'wena u'pa'.

¹² Sa' teeçx piçthē'j Ananias yaasesa pa'jçxa ki' uyya' ājakahn txajx kakwete peekizeeçtek ksxa'w.

¹³ Txã'jīna we'weni's wēse'jçxa' Ananiasa' na'jīk:

—Adxa's maawa wala iipta'sxta' Jerusalente idx yakh fxi'zesawe'sxtxi txã'wě wala pkxuusa' txãa piçthē'ja' jī'tx.

¹⁴ Sa' āçxwa naa çxhabte yuja' sacerdote npiiçthē'jwe'sxtxi karta pējxçxa idxna yaakx-sawe'sxtxi preesu jxūna u'jya' jīte',

¹⁵ Jesus pasçxa':

—Idxa' me'jçxáa. Txãa piçthē'ja' adx tx-hitxhnisa' adx yuwe's pta'sxwa'jsa nasa vx-ite kiwejuwe'sxtxi, jxkaahsawe'sxtxi, sa' Israelwe'sxtxiwa pta'sxwa'jsa'.

¹⁶ Adxa' txãa piçthē'ja's pta'sxi'nja adxna selpi-ina u'jupa'ga makwe pkxuuni yuuwa'ja'swa jīte',

¹⁷ Ananiasa' Saulo u'pni yatna u'jçxa', txajx kakwete peekizeçxa na'jīk:

—Yakhthē'j Saulo, dxi'the idx yuhte Jesus vxyaane' txãak adxa's kaah idx ki' uyya' ājaçxa Dxus Espiritu's ũuste jxuka jxpa'gakahn jīçpkaçxa',

¹⁸ yafxte apha ubute', ki' uyya' ājaçxa', ki-iteçxa ya'bautisāyku.

¹⁹ Txajū' ũ'wa'ja's ki' jxpa'gaçxa çxhãçxhak, sa' Damaskotee ũsu'k maz enwa Jesusa's nwēese'jsawe'sx yakh.

Saulo' Damaskote Dxus yuwe's pta'sxni

²⁰ Txajū' Saulo' Dxus yuwe's pta'sxya' takhku judiuwe'sx pkhaakheni yat-su Jesusa' Dxus Nçxi'ka' jīna.

²¹ Aça' wēse'jsa jxukay kuh yajkxna na'wētx we'we':

—¿Naa piçthē'jīi txã'wē Jerusalente Jesusa's neewe'wesatx ikh wēena fxi'zesameená'? Sa' ¿txã'wēy aytewe'sxtxiwa preesu jxūna u'jçxa sacerdote npiičthē'jwe'sx kusete dukhya' sūhçxa yuusa yu'çmeená'? jī'tx.

²² Txã'jīçtewa Saulo yu' jweeíçxáak çxhãçxha pta'sxi' Jesusa' Dxus tasxu yuusa Kristo yuh yu'k jīna, sa' kxtee Damaskote judiuwe'sxtxi ma'wē paswa'ja's yuhwa ji'phmeek nvxiitu'.

Judiuwe'sx ikhya'watewa Saulo iyuni

²³ Txãa e'su txaçxte', judiuwe'sxa' Saulo's ikhya' puutx we'weçxa

²⁴ çxhabu kasehni vxitxte en kuswa yupna nestxi yuu. Aça' txã'wē yūuni's Saulo' jiyuk.

²⁵ Aça' Saulo's pi'kxna u'jusawe'sxa' kuççxáa Saulo's kanasta walate akhçxa çxhab peeku'j up-hnikhētx ekaju spajkx açesa kusejū nwe'weya'.

Jerusalente Saulo pa'jni

²⁶ Txãa e'su' Saulo' Jerusalente pa'jçxa', Jesusa's nwêese'jsawe'sx yakh pkhaakhe wêek. Nawa kxteewe'sx jxukaysa ũukhtxi Jesusa's nwêese'jsameewáana sũhçxa.

²⁷ Txã'wêtewa Bernabé yu' pe'jna u'jçxa Jesus jxkaahnisawe'sx tasxte nuypa'jçxa na'wêk pta'sx: —Saulo's Jesus vxyaak Damasko dxi'the u'jweçte, sa' txãa yakh puutx we'wek. Aça' Saulo' Damaskote pa'jçxa Jesus kaapiya'jniçxaçxá'sku pta'sxna ũsu' jĩna pta'sxte', Saulo's ũukhmée jxpa'gatx.

²⁸ Aça' Jerusalente ũsu'k txãawe'sx yakh pkhaakhena.

²⁹ Sa' judiuwe'sx griego yuweju we'wesa yakh ũukhmeek puutx we'we' Jesus kaapiya'jni's pta'sxna. Nawa txãawe'sx yu' ahççxa ikhya'watx yu'.

³⁰ Aça' txã'wê yũuni's yakthê'jwe'sx jiyuçxa', Saulo's pe'jna u'jtx Cesarea çxhabna. Txajũ Tarso çxhabnatx kaah.

³¹ Txajũ' Dxus yakh fxi'zesa Judea, Galilea, Samariasuwe'sxa' kim yuhnawa ũukhmée jweeíçxáatx çxhãçxhana u'j Dxusçxáana nwêese'jna. Aça' Dxus Espiritu pu'çxte', jweeíçxáatx pehnana u'j.

Eneas katxhini

³² Txajũ' Pedro' yakthê'jwe'sxtxi Dxus yuwe's pta'sxya' kasehçxa', Lida çxhabte Jesusa's nwêese'jsawe'sxtxiwa thegya' u'kh.

³³ Kxte' teeçx piçthê'j Eneas yaasesa oçxo anxuk ãça'na ũsu' êseya' ãjameeçxa.

34 Aça' Pedro' na'jîk:

—Eneas, idxa's Jesukristo nuykatxhina. Aça' kiiteçxa iidx deeni's mkiis jîçpkaçxha', txâa piçthê'ja' naa dudtey kiitek.

35 Aça' kxtee Lida çxhabte vxite' Sarón kiwete ũssa jxukaysa uyçxa', Jesusa's nwêese'jya' utx-aatx.

Dorkas ki' itxi yuuni

36 Txân ensu' Jope çxhabte Jesusa's nwêese'jsa teeçx u'pu'k Tabita yaasesa. Txã' griego yuwete' Dorkasku yaase yu'. Txâa u'ya' wala pu'çxna fxi'ze'k maawa peejsatxi'.

37 Txâa ensu' Dorkasa' âça'çxa uuk. Aça' uunîi kakwe's kpêeu'jçxa êe yatgatx khikh.

38 Pedro ũsni Lida çxhaba' Jope çxhab yakh utxak yu'. Aça' Jope çxhabte Jesusa's nwêese'jsawe'sxa' Pedro' Lida çxhabte ũsa' jîni's jiyuçxa', e'z piçthê'j kaahtx Pedro's na'wê pta'sxya':

—Jxthêeyuumée Jope çxhabna myuh jîte',

39 Pedro txâawe'sx yakh u'jçxa kxte pa'the', pe'jna u'jtx uusáa ũsniga. Aça' vxiudawe'sx jxukaysa ũ'nena pkhaakheçxa pta'sxtxi Dorkas nee itxiy kmiisa umçxa peesnitx.

40 Txajû' Pedro' jxukaysatx eka kutxi'jna'wa, peejxükweçxa Dxus yakh puutx we'wena'wa uusá's thegçxa na'jînak we'we:

—Tabita, mkiitewe jîçpkaçxha', txâa uusá' thegçxa Pedro's uyna'wa kiiteçxa kaçxku.

41 Txajû' Pedro' pu'kisçxa kxuujuna'wa, Dxus yakh fxi'zesawe'sx vxite' vxiudawe'sxtxi pa'yaçxa, itxik dukh.

⁴² Txã'wě yũuni's Jope çxhabtewe'sx jxukaysa jiyuçxa', wala kuhsa Jesusa's nwěese'jya' utx-aatx.

⁴³ Txajũ' Pedro' Jope çxhabte kuh enku ũsu' kha'tx weysáa Simon yatte.

10

Pedro Kornelio yatte pa'jni

¹ Cesarea çxhabte teeçx soldau kpiitan Kornelio yaasesa u'pu'k. Txã' Italiajuwe'sx soldautx jxkaahsak yu'.

² Txãa piçthě'ja' Dxusna weçxana fxi'zesak yu', txajx yattewe'sx jxukaysa yã'jçxa. Sa' Dxus yakh pu'vxituméek puutx we'wena fxi'ze', txã'wěy vxyuuwa wala pu'çxhi'k judiuwe'sxtxi.

³ Teeçx ente kusuçte las treste' Dxus angel txajx tasxte u'kaçxa na'jĩna we'weçtek uy:

—ĩKornelio! jĩna pa'yate',

⁴ txãa piçthě'ja' wala ũukhna Dxus angela's thegçxa' na'wěk pas:

—ĩKĩh pějxga? jĩte', Dxus angel we'weçxa':

—Idxa' txã'wě peejisaatx pu'çxna Dxus yakh pu'vxitumée puutx we'wena fxi'zeni's Dxusa' wěse'kh.

⁵ Aça' idxa' Pedro's pe'jya' mkaah Jope çxhabna.

⁶ Txãa Pedro' kha'tx weysáa Simon yatte paadehna ũsa' ĩkh wala pukate. Aça' Pedro pa'jçxa pta'sxina idx ma'wě yũuwa'ja'swa jĩte',

⁷ txãa angel u'jweçpkaçxha' Kornelio' e'z selpisáa vxite' teeçx soldau Dxus dxi'pte ew fxi'zesa txãawe'sxtxi pa'yaçxa,

⁸ jxuka pta'sxna'wa Jope çxhabna kaakh.

9 Txãawe'sxa' kuskuskhẽ Jope çxhabte utx-aana pa'jaçpkaçxha', ěepxãh yuuçte' Pedro' tejkak ěe yat pwa'te Dxus yakh puutx we'weya'.

10 Sa' Pedro' wala wëek, aça' txajx ũ'wa'j pheu'juçtxi yu'.

11 Naapkaçxha' Pedro' uyku cielukhẽ tela wala na'wësa puutx vxiçte tudçxa nuykijaçte.

12 Kxte yu' niimal yu'kh eçx, ul, vxiçxakwe kazxsatx jxuka äsxnisak ji'phu'.

13 Txajũ' na'wë we'weni'sku wëse'j:

—Pedro, kiiteçxa naa niimaltxi' ikhçxa mẽ' jĩte',

14 Pedro pasçxa':

—Adxa' bagaçxte yuhwa na'wë niimal kazxsa yuutxi' ũ'wa'jsameeth jĩk.

15 Aça' ki' we'weni wëse'kh:

—Dxus yaatenisatxi' idxa' kazxsata' jĩwa'j ji'phmeeg açxha'.

16 Txã'wë tekh uswa vxyaaçxak, txãa tela wala na'wësa' ki' cieluní pu'kisni yuu.

17 ¿Kĩh yũukahnki'k txã'wë vxyaa? sũhna Pedro u'ppkaçxha', Kornelio kaahnisa' pa'jtx Simon yata's paapëjxna.

18 Sa' sustxi pa'yana kũh:

—¿Naa yatte paadeesa Simon Pedro yaasesa ũsmeená'? jĩna.

19 Pedro' txã'wë uyni's ũus yajkxna u'piyna, Dxus Espiritu' we'wek:

—Tekh piçthẽ'j idxa's paapëjxna ũsta'.

20 Aça' kiiteçxa txãawe'sx yakh me'j kuh ya-jkxmée. Txã'wëme', txãawe'sxa' adx kaahni yuhta' jĩte',

21 Pedro sa'jçxa Kornelio kaahnisawe'sxtxi pějxku:

—¿Ma'jīya'kwe yuwé'? I'kwe'sx pakwenisa' adxthu jīte',

22 txāawe'sxa' pta'sxtxi:

—Soldau kpiitan Kornelio kaahni yuhtha'w. Txāa piçthē'ja' wala ew zhiçxkwe fxi'ze'k Dxusna nwēese'jna, aça' txā'sa' judiuwe'sx jxukaysa wala wedxi'tx. Sa' teeçx ente' Dxus angel vxyaaçxa' idxa's pa'yakahn yuwe nvxihtga. Kxah Kornelio' jiyuna kīh pta'sxwa'j ji'phne'ga txā'sna.

23 Txā'jīte', Pedro' txajx deenite ka'ga'jçxa, kxte dehçxa kuskuskhē' Pedro' u'kh txāawe'sx yakh, aça' kxte Jope çxhabte yakthē'jwe'sxwa u'jtx pi'kxna.

24 Kuskuskhē' Cesarea çxhabte pa'jtx, aça' kxte' Kornelio' ūythasnak ūsu' txajx nwe'sx vxite' txajx namiku yakh pkhaakheçxa.

25 Pedro pa'jaçpkaçxha', Kornelio' jxpa'gaya' kasehçxa Pedro tasxte peejxūkwek weçxana.

26 Nawa Pedro' pu'kiççxa na'wēk we'we:

—Adxa's peejxūkwenu. Adxa' idx na'wēysa iičxáath jīçxa',

27 Kornelio yakh puutx we'wena dxiite u'kaççxa', kxte yu' wala kuh pkhaakheçxa ūstek uyna kūh.

28 Sa' Pedro' na'jīk:

—I'kwe'sxa' jīine'kwe, judiuwe'sxa' pkhaakhena puutx we'wewa'jsameeta' vxite nasa judiumeesa yakha'. Nawa Dxusa' adxa's pta'sxçxa', kim yuhnawa açekaahme'.

29 Txãa pa'gath pa'yaçpkaçxha', wa'lmée yuwé'. ãçxha' adxa's mpeeta'sxwe kīya'kwe yuukaah jīte',

30 Kornelio' pta'sxku:

—Ãçxha' pahz en yuuça' naapkaçxha' naa oratey las treste naa yattey kīhwa ũ'mée Dxus yakhçxáa puutx we'wena u'pu'th. Naapkaçxha' teeçx piçthē'j athni ropa kwentetesa ji'phsa vxyaak.

31 Sa' na'wēk we'we: Kornelio, idxa' txã'wē peejisaatx pu'çxna Dxus yakh puutx we'wena fxi'zeni's Dxusa' wēse'kh.

32 Aça' Jope çxhabna mkaah, Simon Pedro yaasesa's pe'jya'. Txãa Pedro' kha'tx weysáa Simon yatte paadehna ũsa' ĩkh wala pukate. Aça' txã' ayte pa'jçxa puutx we'wena idx yakh jīnak we'we.

33 Txã'wē jxkaah yã'the', jxthēeyuumée pak-weya' kaath. Aça' weçx yuwe'ne'ga. ãçxha' ayte Dxus dxi'pte jxukaysa pkhaakheçxa ũstha'w, sa' wēse'jya'watha'w ma'wēne' Dxus we'wekaah txã'sna.

Kornelio yatte Dxus yuwe's Pedro pta'sxni

34 Txajũ' Pedro' pta'sxku:

—Ãçxha' jiyuth Dxusa' kim yuhnawa ahçemée,

35 maa kiwejuwe'sxçxawa txã'sna nwēese'jna ew yūuna fxi'zesa yuutxi' jxpaga'çxáak.

36 Dxusa' Israelwe'sx ji'jtx yuwe kaakh Dxus yakh fxi'zewa'ja's Jesukristo yuuçxáa ũsuna sa' txãaíçxáa naa kiwetewe'sx jxukaysatx jxkaajana jīna.

37 I'kwe'sxa' jiine'kwe na'wêk yuu: Galileajũ takhçxa judiuwe'sx kiwete jxuka tuuthe'jnik yuu, Juan Dxus yuwe's pta'sxçxa yu'te bautisãynijũ.

38 Dxusa' Nasarethuwe'sx Jesusa's txajx Espiritu's ũste', Jesusa' kĩhtewa nuykatxhinak fxi'ze eçxthẽ'j kusete ũssatx. Dxusa' txãa yakhku ũsu' naa pa'gak txã'wẽ yũu.

39 Jesusa' txã'wẽ Judea kiwesu vxite' Jerusalente kĩhtewa ew yũuna fxi'zeni's kwe'sxa' jxuka uysaatha'w. Txã'sa' kluuskhẽ a'kxçxa ikhtxi.

40 Nawa Dxusa' tekh ente ki' ĩtxi vxitçxa kaavxya'ja'kh kwe'sxçxáatx, nasa jxukaysatx yu' méé.

41 Dxusa' maaçxahtxne' kwe'sxtxi txhitxh txãaçxáatxku vxyaa. Aça' kwe'sxa' txãa yakh pkhaakhena ũ'na fxi'zesatha'w uuçxa ki' ĩtxi yuunijũ.

42 Txajũ' txã' kwe'sxtxi kaakh txajx yuwe's nasatx na'wẽ pta'sxkahn: Dxusa' txãa Jesusa's txãaçxaçxáa kastigãywa'jsak vxitçxa ki'p naa kiwete ĩtxisa ma'tx yuu uusáa ma'tx yuu nawa jxukaysatx.

43 Txã'wẽy Dxus yuwe pta'sxsawe'sxwa yaçkhëy we'wetx Jesusa' na'wẽ yũuwa'jsa' jĩna: Maawa jxukay txã's nwëese'jsa' txãawe'sx pkaltxi peltunãyni yuutxna jĩnatx we'we.

Judiu ji'jmeeçxawa Dxus Espiritu's jxpa'gani

44 Pedro' txã'wẽ pta'sxna ũsiyna, kxte wëse'jna ũssawe'sx kakwete Dxus Espiritu kĩhte', jxukaysa jxpa'gatx.

⁴⁵ Aça' Jesusna nwēese'jsawe'sx judiu Pedro yakh yuusá' wala kuh yajkxna neeyūtx txã'wē judiwe'sxmée vxite nasawa Dxus Espiritu's jxpa'gaçxa,

⁴⁶ txã'wē vxite yuweju we'wena Dxusa's tuuthe'jna ūste.

⁴⁷ Txajū' Pedro' na'jĭk:

—Naa nasawa kwe'sx na'wēy Dxus Espiritu's jxpa'ga yã'the', yu'te bautisāywa'ja's ¿kimçxá' yupxa' ājama'k? jĩçxa',

⁴⁸ ya'bautisāy kaakh Jesukristo yasete. Txajū' Pedro's neevxisxatx txāawe'sx yakh maz en kxtee ūskahn.

11

*Dxus ma'wē yūuni'swa Jerusalente pajçxa
Pedro pta'sxni*

¹ Jesus jxkaahnisa vxite' yakhthē'jwe'sx Dxus yakh fxi'zesa Judea kiwete ūssa' jiyutx txã'wē judiu jĭ'jmée vxite nasawa Dxus yuwe's jxpa'gatx jĭni's.

² Sa' Pedro Jerusalen çxhabte sxawedna pa'the', kxte judiu cirkuncidāynisawe'sxa' ūsçxawe'wetx Pedro's na'jĭna:

³ —¿Kĩjxa'ga judiumée vxite nasa tasxsu u'jçxa txāawe'sx yakh pkhaakheçxa ū'we'?

⁴ Txajū' Pedro' pta'sxku ma'wē yūuni'swa jxuka:

⁵ —Adxa' Jope çxhabte Dxus yakh puutx we'wena u'pçxa uythu tela wala na'wēsa puutx pahz vxiçte tudçxa ēe walakhē kaahni kĭjk adx tasxte pa'j.

⁶ Aça' ew thegte', dxiite yu' niimal yu'kh eçx, ul, vxiçxakwe kazxsak ji'ph yu'.

⁷ Txajũ' na'jĩni'sthu wēse'j: Pedro, kiiteçxa ikhçxa mē' jĩte',

⁸ na'wēth pas: Adxa' bagaçxte yuhwa na'wē niimal kazxsa yuutxi' ũ'wa'jsameeth.

⁹ Txajũ' ki' pthũusek cieluju we'weni: Dxus yaatenisatxi' idxa' kazxsata' jĩwa'j ji'phmeeg jĩk.

¹⁰ Txã'wē tekh uswa vxyaaçxak ēe walate ki' pu'kisni yuu.

¹¹ Naapkaçxha' Cesareaju kaahnisa tekh piçthē'j pa'jtx adxa's pakwena.

¹² Aça' Dxus Espiritu' adxa's u'khaakh txãawe'sx yakh wa'lmée. Txajũ' Jope çxhabtewe'sx seis yakhthē'jwe'sx yakh u'jçxa' jxukaysa Kornelio yatte u'katha'w.

¹³ Aça' txãa piçthē'ja' pta'sxku Dxus angel vxyaaçxa na'wē we'weni's: Jope çxhabna Simon Pedro yaasesa's pa'yaya' mkaah.

¹⁴ Aça' txãa pa'jçxa pta'sxina iidx yatte jxukay-sawe'sx Dxus yakh fxi'zewa'ja's.

¹⁵ Txã'wē pta'sxte', adx we'weçpkaçxha', Dxus Espiritu' txãawe'sx kakwete kĩjk, kwe'sx kak-wetewa ma'wēga nyafxii kĩh txã'wēy.

¹⁶ Txajũ' yajkxthu kwe'sxtxi jxpe'jsa Jesukristo na'wē we'weni's: Juana' yu'teçxáak akhna bauti-saĩ'. Nawa i'kwe'sxa' Dxus Espiritute yuu bautisãyni yuune'kwe jĩni's.

¹⁷ Kwe'sxa' Jesukristo's nwēese'pha'ga Dxusa' ma'wēga txajx Espiritu's ũs, txã'wēyku txãawe'sxtxiwa ũs. Aça' adxa' ¿ma'wē yũuçxa Dxus wedxni's wa'lna ũsuki'th?

18 Txajũ' Jerusalente ũssa yakthê'jwe'sxa' wêse'jçxa', peena yu' pasmée Dxusçxáanatx na'wê tuuthe'j:

—Judiuwe'sxmée vxite nasatxwa Dxusa' ũsne' pkaltxi nvxihtçxa Dxus tasxte pçuwa'jmée fxi'zewa'ja's jĩnatx weçxá'.

Antiokía çxhabte Dxus yakh fxi'zesawe'sx

19 Āçxha' nyafxíi na'wê Estebana's ikhçxa vxite neeyūsáa yuutxi' ahçeçxa pkxuute', txāawe'sxa' ũphna u'jçxa' maaíi yu' Fxenice kiwen, vxite' Çxipre kiwesu, vxite' Antiokía çxhabsu kxsũ pa'jçxa vxite nasa yuutxi' pta'sxmée judiu j'i'j pwe'sx yuuçxáatx pta'sxi' Dxus yuwe u'sesa's.

20 Nawa Dxus yakh fxi'zesa Çxipre vxite' Cirene kiwejuwe'sx maaíi yu' Antiokía çxhabte pa'jçxa', judiuwe'sxmeetxwa pta'sxtxi Jesus kaapiya'jni ewte fxi'zewa'ja's.

21 Aça' Dxus pu'çxte', txāawe'sxa' nyafxíi jx-pubana fxi'zeni's nvxihtçxa Jesus kaapiya'jni's nwēese'jtx.

22 Txā'wēttx Dxusa's nwēese'j jĩni's Jerusalente pkhaakhena ũssa' jiyuçxa', Bernabea's kaahntx Antiokía çxhabna.

23 Aça' Bernabea' kxte pa'jçxa' wala weçxak Dxus txā'wê pu'çxni's uyçxa. Sa' jxukaytxi yu'kxpejk jxpubamée ew Dxus yakh fxi'zekahn.

24 Txāa pa'gatey Bernabea' Dxus Espiritu's txajx ũuste jxuka jxpa'gaçxa Dxus yakh yuuçxáa fxi'zesak yu'. Txajũ' nasatx wala ya'knayku Dxus jĩi.

²⁵ Txã'wẽ yũuçxa', Bernabea' Tarso çxhabna Saulo's pe'jya' u'jçxa', Antiokía çxhabte nuypa'kh.

²⁶ Sa' kxte teeçx anxutx pkhaakhena ũsu' nasa ma'wẽsatxwa jxuka kaapiya'jna. Antiokíatetx nyafxçxah kristiano jĩna kxsusnisa yuu Kristo's nwẽese'jsawe'sxtxi.

²⁷ Txãn ensu' Dxus yuwe pta'sxsawe'sx Jerusalenu yuusa pa'jtx Antiokíate.

²⁸ Teeçxsa Agabo yaasesa' Dxus Espiritu kaajiyu'the', yakthẽ'jwe'sx ksxavxyte yujuçxa: Judiuwe'sx kiwete jxuka wẽje en pa'jana jĩnak pta'sx. (Txã'wẽ pta'sxni' kxtey yuuk jxkaahsa Klaudio ente.)

²⁹ Txã'wẽ wẽje en pa'jana jĩni's wẽse'jçxa', Dxus yakh fxi'zesa Antiokíatewe'sxa' txãawe'sx ji'phuni yakh pu'çxya' yajkxtxi yakthẽ'jwe'sx Judea kiwetewe'sxtxi.

³⁰ Txajũ' peeswa'ja's pkhakhçxa kahtx Bernabé Saulo yakh Judeate ancianowe'sxtxi dukhkahn.

12

Jakobo's ikhçxa Pedro's karcelte txaahni

¹ Txãn ensu' jxkaahsa Herodesa' pkxuuya' yajkxku Dxus yakh fxi'zesatx.

² Sa' kçxilxuh kiikhe'kh Juan nyakh Jakobo's.

³ Txã'wẽ yũute' Jakobowe'sxtxi açesa judiuwe'sxa' weçxatx jxkaahsa Herodesa's, açã' Pedronawa preesu'khaakh kiikhe'jya'. Pan lewadura ji'phmée ũ'wa'j fxiesta entek txã'wẽ yũu.

⁴ Herodesa' Pedro's preesu tudçxa' karcelte ktxaaja'kh. Kuste pahz us yu'pthehna pe'tewa'jsa soldau txajk, yu'ptheh iisa pahz pahz yujukahn. Paskua fxiesta en skhêwte nasaa ksxavxyte kutxi'jya' sũhçxak txã'wê yũu.

⁵ Aça' Pedro' karcelte wala ew yupni ũsu'k, nawa Dxus yakh fxi'zesawe'sx yu' Dxus yakh pu'vxituméetx puutx we'wena ũsu' Pedro pa'gate.

Dxusa' Pedro's karceluh kutxi'jni

⁶ Herodesa' Pedro's nasaa ksxavxyte kutxi'jwa'j en âjaçte', txãa kuste Pedro' dejk e'z soldau pxãhte, e'z kadenaju tudni. Naapkaçxha' vxite e'z soldau yu' karcel vxitxtetx yupna ũsu'.

⁷ Txãa dudte Dxus angel vxyaaçxáa yuute', karcelte jxuka eena'k kweeth. Txajũ' angela' na'jĩnak tu'kakana Pedro's fxĩtx:

—Dud yuh mkiite jĩçpkaçxha', çam kadena' çxukwetetx Pedro kuseju.

⁸ Aça' ki' we'wek txãa angela':

—Iidx jxtudni's ya'jytudçxa, pelgatxi's mpaath jĩte', Pedro' txã'wêy yũuk. Txajũ' txãa angela' ki' we'wek:

—Atxha's jxkaaççxa myuh adx e'stey jĩte',

⁹ Pedro' angel e'stey kasejk, isa angela' eka kutxi'jiçtewa ksxa'wnawáa ũsne'tka sũhnaçxáa yajkxna.

¹⁰ Nawa nyafx vxitxte soldau yupna ũsnite skhêwçxa', e'ste vxitxte soldau yupna ũsnitewa skhêwtxi. Sa' eka kasehwa'j çam vxitxte sêjeçpkaçxha', txãa vxitxa' peekxçxáa phaatek.

Aça' kasehçxa u'jtx klxiikhunsu. Txajũ' angela' Pedroçxáana nvxihtçxa u'kh.

11 Txajũ' Pedro' naasũjk: Ksxa'wnimeega yu', isa Dxusne' txajx angela's kaah Herodes kuseju adxa's nwe'weya', vxite' judiuwe'sxwa nakwe wala ewmée yũuya' ũythasu'tx txãaju nwe'wekahn sũhnak yajkx.

12 Pedro' txã'wẽ ew jiyuçxa' u'kh Juan Markos njĩ'j Maria yatna. Kxte' wala kuh pkhaakheçxa Pedro pa'gate Dxusa's neewe'wenatx ũsu'.

13 Kxte kũhçxa vxitxte uka'kate', teeçx luuçx u'y Rode yaasesak thegya' kaseh.

14 Nawa Pedro we'weni's jiyuçxa', vxitxa's phaademée weçxana ki' sxawedku dxiigay wuwuuçxáa:

—Pedro' vxitxte ũsa' jĩna pta'sxya'.

15 Aça' na'jĩnatx we'we:

—Luuku we'wena ũsi'çxa jĩtewa:

—İsxiija'çmeeth, isa yuja' jĩte':

—Pedromée, txãa yakh pi'kxna u'jusa angelçxáana jĩtx.

16 Txã'wẽtewa, Pedro yu' vxitxte uka'kana nesku yu'. Aça' vxitxa's phaadeya' u'jçxa', Pedro's uyçxa wala kuh yajkxtxi.

17 Nawa sxuuna' yuukahn Pedro' kuseju pta'sxçxa', Dxus ma'wẽ karceluh nwe'weni's jxuka pta'sxku. Sa':

—Jakobo vxite' kwe'sx yakthẽ'jwe'sxtxi mpeeta'sxwe txã'jĩna'wa, txãa yu' kasehna u'kh vxite ahte.

18 Kuskuuskhẽ khikhynite', wala kuh yajkxna ũukhtxi soldauwe'sxa' txã'wẽ Pedro ma'wẽ yũutewa jiyumeeçxa.

19 Txajũ' jxkaahsa Herodesa' pakweya' kaakh, nawa uymeete' kxte karcelte thegsa soldautxku ikh kaah. Txãa e'suçxáa Herodesa' Judea kiweju kasehçxa Cesarea kiwetek u'pxa' u'j.

Herodes uuní

20 Herodesa' wala puiina ũsu'k Tiro Sidón kiwete nasa yakh. Txãa pa'gatx txãa nasa' Herodes tasxte mjíisa Blasto yaasesa's vxyu dukhçxa txãa yakh u'j jxkaahsa tasxte utxaaçxa puiimée fxi'zewa'ja's puutx we'weya'. Txã'wē yūumeete', txãa nasa' jxkaahsa kiwejuçxáatx ũ'a's jxpa'gana fxi'zesa yu'.

21 Aça' jxkaahsa Herodesa' pta'sxku kīh ente txajx tasxte utxaa'ja'swa. Sa' txãa en āhte', Herodesa' jxkaahsa athni ropatx athçxa txajx u'pnite kaçxçxa we'wek.

22 Txajũ' nasa' na'jīnatx weçxana sus we'we:

—Na'wē we'wesa' naa kiwete nasamée, Dxusa' jīçpkaçha',

23 txãa dudtey Dxus angela' akasa ũsku Herodesa's, aça' jxuka wes ũ'te' uuk, txã'wē nasaa weçxani's weçxana yaakxpa'ga.

24 Nawa Dxus yuwe yu' jweeíçxáak walaana u'j mtee mteewa pta'sxni.

25 Txajũ' Bernabé Saulowe'sxa' mjíia's jxã'jçxa Jerusalenuh ki' sxawedtxi Juan Markosa's pe'jçxa.

13

Bernabé Saulo yakh Dxus yuwe's pta'sxya' nyafxçxah kasehni

¹ Antiokía çxhabte pkhaakhena ũssa yakh ũsu'tx Dxus yuwe pta'sxsa vxite' Dxus leya's jiisawa: Bernabé, vxite' khũçx Simon j̄nisa, vxite' Lucio Cirene çxhabuwe'sx, vxite' Manaén Galileate jxkaahsa Herodes yakh ih walaasáa, vxite' Saulo'.

² Txãawe'sxa' teeçx ente' Dxusna selpiina yũunaana ũste', Dxus Espiritu' na'wêk we'we:

—Saulo Bernabé yakh mkaahwe adxa's selpikahn, txãawe'sxa' adx pa'yanisata' mj̄iwa'jsa j̄lk.

³ Txajũ' yũunaana jxã'jçxa', txãawe'sx dxik-thesu peekizeçxa Dxusna neewe'wena' kaahthx.

Bernabewe'sxa' Çxipre kiwete Dxus yuwe's pta'sxni

⁴ Dxus Espiritu kaathe', Bernabé Saulowe'sxa' Seleucia çxhabna u'jçxa txajũ' barkote khêeçxa ãkh pxãhte Çxipre kiwentxi u'j.

⁵ Txãa kiwete Salamina çxhabte pa'jçxa', judi-uwe'sx pkhaakheni yat-su Dxus yuwe's pta'sxya' takhtxi. Sa' Juan Markosnawa iipe'jtx yu' pu'çxwa'jsa.

⁶ Çxipre kiwe's pekũhna jxã'jaççxa', Pafxos çxhabtetx pa'j. Sa' kxte' teeçx judiu dxijxuusáa Barjesus yaasesa'stxi uy. Txãa piçthê'ja' wala ãxiisa yu'k Dxus yuwe pta'sxsath j̄na ãxiina.

⁷ Txãa dxijxusá' kxte ne'jwe'sx wala jiisa Sergio Paulo tasxte mj̄iisak yu'. Txãa ne'jwe'sxa' Dxus yuwe's wêse'j wêeçxa Bernabewe'sxtxi pa'yak.

8 Nawa txãa dxijxuusáa Elimasa' Bernabewe'sxtxi' kwe'we'j wēeme', ne'jwe'sxa' Dxus yuwe's jiyukahmen.

9 Txã'wē yūute', Dxus Espiritu's ũuste jxuka ji'phsa Saulo Pablo yaasesa' dxijxuusáa dxi'pte ũusçxa thegçxa', na'jĩk:

10 —İsxiina fxi'zesa, ewmeesa, eçxthē'j luuçx, ewsa yu'sa' jxuka ahçena fxi'zesa çmjĩitega Dxus yuwe ewsa's yupmēe fxi'ze'çmēe?

11 Txãa pa'ga Dxusa' idxa's açxhíi kasti-gaĩna, aç'a' uyya' ājamēe fxi'zene'ga naa ensu' jĩçpkaçxha', txãa dudtey uyya' ājameeçxa' maaçxáatxwa pakwek pu'kisçxa pe'jna u'khan.

12 Txajũ' kxte ne'jwe'sxa' txã'wē yūuni's uyçxa', Jesus kaapiya'jni's isa yuhna sũhna ũuste jxpa'gak.

Pablowe'sx Pisidia kiwesu pekũhni

13 Pablo vxite' txãa yakh pi'kxna u'jusa yã'jçxa barkote khēeçxa Pafxos çxhabu kasehtx Panfxilia kiwete Perge çxhabte pa'jya'. Nawa Juan Markos yu' Perge çxhabte pa'jçxaçxáa ki' sxawedku Jerusalennay.

14 Pablowe'sxa' Perge çxhabu kasehçxa Pisidia kiwete Antiokía çxhabnatx u'j. Kxte pa'jçxa', jxkaase ensu' judiwe'sx pkhaakheni yatte u'katx.

15 Aç'a' pkhaakheni yatte npiičthē'ja' Dxus ley vxite' Dxus yuwe pta'sxsa fxi'jni's lēeyna jxã'jçxa', na'wētx we'we:

—Yakhthē'jwe'sx, kĩh we'wewa'j ji'phçxa', myu'kxpehwe nasatx açxhíi jĩte',

16 Pablo' kiitena'wa kuseju sxuuna' yuuwa'ja's pta'sxna'wa we'wek:

—Israel ji'jwe'sx, vxite nasawa Dxusna nwēese'jsa, jxpa'yakx mwēese'jwe:

17 Israelwe'sx Dxusa' kwe'sx yaçgawe'sxtxi txhitxhçxa wala kpeena'kh Egipto kiwete nee ũsiyna, sa' txãa kiwejũ kutxi'kh kīhwa seena'sa kaavxya'ja'jçxa.

18 Dxusa' nasa u'pnimée kiwete kuarenta anxu wantäyku nasa ähmée yūuna fxi'ze'çtewa.

19 Sa' Kanaan kiwete nasatx jxuka ivxiituk txãa kiwe's kwe'sx yaçgawe'sxtxi ũsya'.

20 Txajũ' kuartocientos cinkwenta anxu ähpkaçx jxkaahwa'jsa ji'phmée kwe'sxtxi thegwa'jsa khuēsçxáak nvxiht, Dxus yuwe pta'sxsa Samwel entepkaçx.

21 Txajũtx txãawe'sxii pějx teeçx jxkaahwa'jsa, aç'a' Dxusa' ũsku kuarenta anxu jxkaahwa'jsa Cis nçxi'k Saul yaasesa's. Txãa piçthē'ja' Benjamin ji'kh yu'.

22 Txãa e'su' Dxusí Saula's jxkaahnijũ kutxi'jçxa, Davxida'sku jxkaahwa'jsa ki'p. Sa' na'wēk we'we: Isaí nçxi'k Davxid yuuçxáa adx jxkaahni's kxtey yuuwa'jsa uythu txã' adx wedxnisa' jík.

23 Jesusa' Davxid ji'thewe'sxku yu', aç'a' txã'snak Dxusa' nvxiht Israelwe'sxtxi nwe'wewa'jsa, nyafxiitey Dxusa' ma'wēne' ũsya' neeyũ txã'sa' kxtey yuuk.

24 Jesus pa'jmeyna Juana' Israel nasa jxukaysatx pta'sxku: I'kwe'sx pkaltxi jxuka nvxihtçxa Dxus tasxte misxawedwe yu'te ya'bautisãyna jīna.

25 Sa' Juana' txajx uu en utxaaçte', na'wêk we'we: Adxa' i'kwe'sx ũythasu'i'kwe txãameeth. Adx e'ste teeçx yuja' txajx pelgatxi wesçxáa yuhnawa adxa' khihbxa' selpimeesath jîk.

26 Yakhthê'jwe'sx Abrahan ji'j, vxite nasawa Dxusna nwêese'jsa i'kwe'sx ewte neeyũuwa'ja's pta'sxnik yuu.

27 Nawa Jerusalente ũssa vxite' txãawe'sx npiiçthê'jsawa jiyumeeta' Jesusa' kimtewa. Sa' Dxus yuwe pta'sxsa fxi'jni'swa jiyumeeta' pkhaakheni yat-su jxkaase een isa lëeyçxawa. Sa' txãawe'sxiçxáa Jesusa's ewmeete nvxihtçxa', Dxus yuwe pta'sxsa fxi'jni txãawe'sx lëeyni's kxtey yuutx.

28 Txã'wê Jesus ewmée yũuni's uymeeçxawa Pilato's yuwe ũstxi Jesusa's kiikhe'khan.

29 Txajũ' Dxus librate ma'wêne' fxi'jni ũsu' txã'sa' jxuka kxtey yuuçxa', Jesusa's kluusu spajkçxa pedaatx.

30 Nawa Dxusa' uuniijũ ki' itxi vxitku.

31 Aça' Jesusa' wala kuh en vxyaak Galileajuwe'sx Jerusalenna pi'kxna yuusatx. Txãasa txãawe'sxa' Jesus kimtewa pta'sxsata'.

32 Txãa pa'ga kwe'sxwa i'kwe'sxtxi pta'sxiçtha'w nyafxiitey kwe'sx yaçgawe'sxtxi Dxusa' ũsya' neeyũuk txã'sna.

33 Kwe'sxa' yaçgawe'sx ji'tha'w, txãa pa'gak Dxusa' txajx ũsya' neeyũuni's kwe'sx yakh kxtey yuuçxa, Jesusa's uuniijũwa itxi vxit, salmo doste na'wê fxi'jni ũsa' txã'wêy: Idxa' adx nçxi'kgu. Aça' idxa's uuniijũwa itxi vxitthu açxha' jîk.

34 Uute' txãa kakwe' suweekahmen ïtxi yu-uwaja's Dxusa' pta'sxku txajx librute na'jïna: I'kwe'sxtxi peeygãawa'ja's Davxid yakh puutx we'weth txã'sa' kxtey yu'nja jïk.

35 Txãasak salmo vxite ajkhêwa na'jï': Idxna selpisáa peeygãanisa kakwe's nvxihtmeene'ga suweewe'sxte jï'k.

36 Txã'wê we'weni' isa kxtey yuuyujk. Tx-ajïik Davxida' txãn ensu' Dxus jxkaahni's kxtey yuuçxa e'su' uuk, aç'a' txajx kakwe's yaçgawe'sx pedaniitey pedaate', txajx kakwe' kxtee jxuka pçuuk.

37 Nawa Dxusa' Jesusa's uuniijüwa ïtxi vxitku, aç'a' txãa kakwe' pçuume'.

38 Æçxha' yakthê'jwe'sx i'kwe'sxa' mjiyuwe: I'kwe'sx pkaltxi peltunãywa'ja's pta'sxi'tha'w, nawa peltunãywa'jsa' Jesus yuuçxá'.

39 Nyafxíi Moises leya's nwêese'jçxawa, perdona's uymeei'kwe. Nawa Jesusna yajkçxa nwêese'jçxa', perdona's uyuune'kwe maawa.

40 Mpa'yajkxwe, txã'wême', nyafxíi Dxus yuwe pta'sxsa na'wê we'wetx txã' kxtey yuuwe'sxta':

41 Weeçxsawe'sx, mpa'yajkxwe. I'kwe'sx vxi-tuwa'ja's müukhwe.

Txã'wême', adxíi Dxusthu na',

Txã'wê yüuwa'j en ähte', kíhwa seena'çxáa yu'nja.

Txã'wê yüuwa'ja's pta'sxtewa, i'kwe'sxa' jxpa'gameene'kwe jïnatx we'we jïk Pablo'.

42 Txajü' Pablo' txã'wê pta'sxçxa', txãa yakh pi'kxna u'jusa yakh judiwe'sx pkhaakheni yatu kasejeçte', kxte üssa judiu jï'jmeeçxawa

Pablowe'stxxi ki' pi'kxtxi vxite jxkaase ente txã'wěy pta'sxya' yuukahn.

⁴³ Kxte pkhaakheni pçuute', judiuwe'sx wala kuhsa vxite' judiu ji'jmeeçxawa judiuwe'sx kaapiya'jni's jxpa'gasa Dxus yuwe's wala ew nwěese'jçxa', Pablowe'sx kaapiya'jni's nwěese'jsatx yuu. Aça' Pablowe'sxa' wala yu'kxpehtx Dxus peeygãanite wa'lmée fxi'zekahn.

⁴⁴ Vxite ki'su jxkaase ente', çxhabte nasa jxukay pkhaakhetx Dxus yuwe's wěse'jya'.

⁴⁵ Nawa txã'wě nasa wala pkhaakhete', kxte judiuwe'sxa' wala ũusaçxaçxa Pablowe'stxxi açewe'wena wéesxutx.

⁴⁶ Txã'wětewa, Pablowe'sxa' ũukhmeetx na'jĩna we'we:

—Dxus yuwe's nyafxte i'kwe'sx judiu ji'j khuě'ytxi pta'sxwa'kh yu', kxahtha'w pta'sx. Nawa jxpa'gameeyã'ji'kwe pçumée ĩtxi fxi'zewa'ja's, aça' açxha' u'jweçtha'w judiumée vxite nasatx pta'sxya'.

⁴⁷ Dxusa' kwe'stxxi na'wěk we'wena kaah:
Nasa ksxavxysu eena' kweethwa'jsath nvxiht i'kwe'stxxi',

Sa' txã'wěy maa kiwetewa ewsa's pta'sxwa'jsa jĩk.

⁴⁸ Aça' judiu ji'jmée vxite nasa txã'jĩni's wěse'jçxa', Dxus yuwe' wala ewsa yu'ga jĩna weçxaçxa maaçxahne'ta багаçxte yuhwa pçumée ĩtxi fxi'zewa'jsa yu' txãa yu' jxukay Dxus yuwe's jxpa'gatx.

⁴⁹ Txã'wěk Dxus yuwe's pta'sxni yuu txãa kiwete jxuka.

⁵⁰ Nawa txãa çxhabte judiuwe'sxa' nasa jx-tuhthesa petx u'y yã'jçxa kxteeçxah puutx we'weçxa, Pablowe'sxtxi pkxuuya' yajkxtxi txãa kiwejũ kutxi'phkaçx.

⁵¹ Txã'wẽ yũute', Pablowe'sxa' txãawe'sx çxidate kiwe tuhda's sakweekweçxa u'jtx Ikonio çxhabna.

⁵² Nawa kxte nasa Dxus yuwe's nwẽese'jsa yu', wala weçxana neeyũutx, Dxus Espiritu's ũuste jxpa'gaçxa.

14

Ikonio çxhabte Pablowe'sx pa'jni

¹ Pablowe'sxa' Ikonio çxhabte pa'jçxa', judiuwe'sx pkhaakheni yatte u'kaçxa, Dxus yuwe zhiçxkwesa's pta'sxte', wala jxpa'gatx judiuwe'sx vxite' judiuwe'sxmeesawa.

² Nawa judiuwe'sx Jesus kaapiya'jni's açesa yu' judiu ji'jmée vxite nasatx ewmée yu'txwe'weçxa yakhthẽ'jwe'sxtxi açeyaakxwa'ja's vxittxi.

³ Txã'wẽ açepa'gaíçxáatx Pablowe'sxa' jweeíçxáa kxte txaçx ũsu', Dxusa' pu'çxhina sũhna ũukhmée pta'sxna. Aça' Pablowe'sx txã'wẽ Dxus peeygãani's pta'sxte', Dxusa' kxte nasa wẽse'jsa yuutxi' ewku kaajiyu'j Pablowe'sxtxi kĩhwa seena'sa's kaavxya'ja'jya' ajawa'ja's ũşçxa.

⁴ Aça' txãa çxhabtewe'sxa' txuteetx, vxite' judiu açesawe'sx ju'gu, vxite' Pablowe'sx ju'gu.

⁵ Txajũ' judiuwe'sx vxite' judiuwe'sxmeesawa khuẽswe'sx yakh puutx we'wetx Pablowe'sxtxi wẽesxuna kwet wãatatahçxa ikhya'.

⁶ Nawa Pablowe'sx jiyuçxa', ùphna u'jtx Likao-
nia kiwete Lистра Derbe çxhabna kxsũ jxuka
pekũhçxa

⁷ Dxus yuwe ewte nvxiitwa'jsa's pta'sxya'.

*Lистра çxhabte Pablo's kwet wãatatahçxa ikh
wëeni*

⁸ Sa' Lистра çxhabte pa'the', kxte' teeçx piçthê'j
çxida âça'sak u'pu'. Txã' upxhíi txã'wë yã'kh yu',
sa' bagaçxte yuhwa u'juya' âjasameek yu'.

⁹ Txãa piçthê'ja' Pablo pta'sxni'sku wëse'jna
u'pu'. Aça' Pablo' txajx dxi'pte thegçxa' jiyuk
nuykatxhina sũhni's.

¹⁰ Sa' susku we'we:

—Ku'le myuju jĩna. Naapkaçxha' txãa
piçthê'ja' ùphçxa yujuna'wa ew yã'kh u'juya' âja.

¹¹ Pablo txã'wë yũuni's nasa uyçxa', na'wëtx
Likaonia yuweju weyna we'we:

—¡Nasa na'wë yuuçxa dxuswe'sx kwe'sx tasxte
kĩhtx! jĩçxa',

¹² Bernabea's Jupiter jĩnatx kxsusu', sa' Pablo's
Merkurio jĩnatx we'we', wejx thaakwe we'wesa
yuupa'ga.

¹³ Txãawe'sx dxus Jupiter jĩ'tx txã'sna
neewe'wena ùsni yata' çxhab peeku'thek
ùsu', aça' kxte selpisáa sacerdote' kla jxũna
pa'kh kite zhiçxkwesa khyũ'jũ'jçxa. Aça'
nasa' Pablowe'sxtxi weçxana peejxũkweçxa
neewe'weya'watx yu' txãa klatx ikhna.

¹⁴ Nawa Pablowe'sx jiyuçxa' txã'wë yũute
nxusçxa peekx athni ropatx sudena'wa nasaa
ksxavxyte kũhçxa na'jĩnatx sus we'we:

15 —I'kwe'sxa' ʒkĩjxa'kwe txã'wě yũ'? Kwe'sxa' nasa i'kwe'sx na'wěysa íiçxáatha'w. Sa' txã'wě yũuna fxi'zenisa' seelpimeesa' naa pa'ga nvxihtçxa Dxus ítxĩsa cielu's pheu'kh, kiwe, íkh wala kxte kĩhçxah ũstxna txáatx jxuka txã'snaçxáa selpiina neewe'wewa'ja' jĩna pta'sxya' yuusaçxáatha'w.

16 Txãa Dxusa' nyafxíi ensu' nasatxi' nvxihtku ma'wěwa yũuna fxi'zekahn.

17 Nawa Dxus ũsyuhna sũjkahn kaajiyu'jna nesku yu', nus kaapa'ja'jna, uuthasxtxi ew kçxhãaçxha'jna, ũ'wa'ja's peejxmée peesna, wět fxi'zewa'ja'swa ũsna jĩnak pta'sx.

18 Txã'wě pta'sxçxak wala thěyçxáawa pejka nasatx knay, txãawe'sxtxi weçxana kla íkhna peejxũkwekahmen.

19 Txãa e'su' judiuwe'sx Antiokía Ikonio çxhabuwe'sx pa'jçxa kxte nasatx ewmée yu'txwe'weçxa kwet wāatatahtx Pablo's. Txã'wě yũuçxa', uuyã'jne' sũhçxa wezxna u'jçxa çxhab ekahtx wāatāh.

20 Nawa kxteewe'sx Dxus yuwe's nwěese'jsa yu', Pablo's thegya' u'the', Pablo' ki' ũus jĩ'phuçxa kiiteçxa ki' çxhabtey u'kak. Sa' vxite kuskuskhě' Bernabé yakh Derbe çxhabnatx u'j.

21 Derbe çxhabte pa'jçxa', Dxus yuwe ewte nvxiitwa'jsa's pta'sxçxa nasatx wala knaytxi Dxus jĩi. Txã'wě yũuçxatx sxawed Listra, Ikonio, Antiokía çxhabsu iipa'j.

22 Txãa çxhabsu pa'jçxa', Dxus yuwe's nwěese'jsatx wala yu'kxpehtx Dxus jxkaahna ũsnite u'ka wěeçxa' Dxus yakh txutemée

fxi'zewa'ja', makwe pxthaa nxuswa'j en pa'thewa jīna.

²³ Sa' kxsū pkhaakhena ūsnisu jxkaahwa'jsa ancianowa pakweçxa ki'ptxi. Txā'wē yūuçxatx yūunaaçxa Dxus kusete neewe'weçxa nvxiht.

Pablowe'sx Antiokía çxhabnay ki' sxawedni

²⁴ Txajū u'jçxa', Pisidia kiwesu skhēwçxa Panfxilia kiwetetx pa'j.

²⁵ Txāa kiwete Perge çxhabte Dxus yuwe's pta'sxçxa Atalia çxhabnatx u'j.

²⁶ Txajū' barkote khēçxa u'jtx Antiokía çxhabna, majūne'ta Dxus kusete neewe'weçxa mjīiya' kaahnisa yuu txāa çxhabnay.

²⁷ Antiokía çxhabte pa'jçxa', kxte pkhaakhena ūssa yakthē'jwe'sxtxi pta'sxtxi Dxus ma'wēne'txāawe'sxtxi pu'çxçxa judiu jījmée vxite nasatxwa Dxus yuwe's kaajiyu'j txā'sna.

²⁸ Sa' Pablowe'sxa' kxte wala txaçx ūsu'tx Dxus yuwe's nwēese'jsawe'sx yakh.

15

Pablo Jerusalentewe'sxtxi paapējxya' u'jni

¹ Txāa e'su' Judeajuwe'sx judiu Antiokía çxhabte pa'jçxa kxteewe'sxtxi na'wētç kaapiya'jna ūsu': Ya'cirkuncidāywa'j jī'phi'kwe Moises jxkaahni's kxtey yuuna. Txā'wē yūumeeçxa', ewte neeyūuya' ājameene'kwe jīna.

² Aça' txā'wē kaapiya'the', Pablowe'sxa' wala juuna' puutx we'wetx txā'wē pta'sxsa yakh. Txajū' kxte pkhaakhena ūssa yakthē'jwe'sxa' Pablowe'sxtxi vxite kaapi'ki'jçxa Jerusalenna

kaahntx Jesus jxkaahnisawe'sx vxite' anciano kx-teewe'sx yakh txãa yuwe's paapëjxna puutx we'wekahn.

³ Antiokía çxhabte pkhaakhesa yakthê'jwe'sx kaathe', Fxenicia Samaria kiwesu skhêwnatx u'j, judiu ji'jmée vxite nasawa Dxus yuwe's jxpa'gaçxa nyafxíi jxpubana fxi'zeni's nvxihtxi jīna pta'sxna. Aça' kxsū yakthê'jwe'sxa' wala weçxatx txã'wē jiyuçxa'.

⁴ Pablowe'sx Jerusalente pa'the', kxte pkhaakhena ũssa vxite' Jesus jxkaahnisawe'sx ancianowe'sx yã'jçxa jxpa'gatx. Aça' Pablowe'sxa' jxuka pta'sxtxi txã'wē judiu ji'jmée vxite nasatxwa Dxusa' ewte neeyūuwa'ja's ũsku jīna.

⁵ Nawa maalí yu' kxte ũssa fxariseowe'sx Jesus kaapiya'jni's jxpa'gasaçxawa na'wêtx we'we yu-juçxa: Judiu ji'jmée vxite nasa ãçxh u'se Dxus yuwe's jxpa'gasawe'sxtxi' cirkuncidäyçxa, Moises jxkaahni leya's jxuka nwēese'khan jxkaathe yuuna jītx.

⁶ Txajū' Jesus jxkaahnisa vxite' ancianowe'sx yakh pkhaakheçxa txãa yuwe's pheu'jya' puutx we'wetx.

⁷ Txã'wē wala txaçx txãa yuwe's puutx we'wenijū', Pedro' kiiteçxa na'wêk we'we:

—Yakthê'jwe'sx, i'kwe'sxa' jii i'kwe Dxusa' adxa's txhitxhku txajx yuwe ewte nvxiitwa'jsa's pta'sxkahn judiu ji'jmée vxite nasatxwa, kxah txãawe'sxwa jiyukahn.

⁸ Dxusa' jiia' maaçxah nwēese'jwa'jsatewa, txãasa íik vxite nasawa txã'sna nwēese'jwa'jsa

yuutxi's txajx Espiritu's ũs, kwe'sxtxiwa ma'wēga txajx Espiritu's ũs txã'wēy.

⁹ Dxusa' maa yuhtxwa nasa fxiisata' sūju'çme' kwe'sx yakh vxite nasa yakh. Txãasaíçxáak vxite nasaçxawa Jesusa's yaakxsa yuutxi's txãawe'sx pkaltxi' peltunãy.

¹⁰ Dxus txã'wē yūuçxa nwe'wenisatxi's çkĩjxa'kwe i'kwe'sxa' jweeíçxáa thēysa's yuutxana jxkaah wēje'? Txãa thēysa's kwe'sx yaçgawe'sx yuhwa kxtey yuuya' ājameeta', aça' kwe'sx yu' wejxtha'w ājāmée.

¹¹ Txã'wē kwe'sxa' txãa thēysa's kxtey yūuya' ājāmeetewa, Jesusa' peeygāhçxa yuuçxáane' kwe'sxtxi' nwe'we sūju'tha'w. Txãasane' vxite nasatxwa txã'wēyçxáa nwe'we.

¹² Pedro txã'wē we'wete', jxukaysa sxu-una'tx yuu, Pablowe'sx pta'sxni's wēse'jya'. Aça' txãawe'sxa' pta'sxtxi Dxusa' txã'wēk kim yuhwa ājānimeesa's kaavxya'ja'jya' ājāwa'ja's kwe'sxtxi ũççxa judiu ji'jmée vxite nasatxwa jxuka pu'çx jīna.

¹³ Txãawe'sx pta'sxna jxã'the', Jakobok we'we: —Yakhthē'jwe'sx, mwēese'jwe.

¹⁴ Simon Pedro na'wēk pta'sx judiu ji'jmée vxite nasatxwa Dxusa' nyafxçxah peeygāhçxa txãawe'sxtxi txhitxhku txajx luuçx yuuwa'jsa.

¹⁵ Txã'wē yuuwa'ja's Dxus yuwe pta'sxsawe'sx fxi'jtx txã' kxtey yuuk. Txãa fxi'jni' na'jī'k:

¹⁶ Txã'wē yūunijū sxawedçxa, ki' txaja'nja Davxid txaahni yat wetenisa's.

Txãa wetenisa's pheu'jçxa u'se vxitçxa nvxi-itu'nja.

17 Kxah maawa jxuka Dxusa's pakweya' ājatxna, Maa kiwejuwe'sxwa adxa's jiyusa yu' jxuka.

18 Txā'wē yūuwa'ja's Dxusa' nyafxii enteyku txā'wē we'wena kaajiyu'j.

19 Txāa pa'gath adxa' naasūju': Judiu ji'jmeeçxawa Dxusna nwēese'jya' pakwesaatxi' kuçx kwe'sx leytxi nwēese'jwa'ja's jxkaahmée,

20 naasáa na'wē pta'sxna fxi'theçxáa ewna: Naa kiwega dxus itximeesa's weçxaya' tajkx ikhni çxiçxa's ũ'wa'jme'. Sa' ptammeesa pkal yuuna fxi'zewa'jme'. Txā'wēy tajkxnawa thukçxa ikhnisa çxiçxa's ũ'wa'jme', eenawa ũ'wa'jme'.

21 Txā'wē yūumeete', Moises leya's nyafxii enteytxi txāasu we'wena pta'sxna yuhna ũsu' çxhab iisa judiwe'sx pkhaakheni yat-su jxkaase ensu jik Jakobo'.

22 Txajū' Jesus jxkaahnisawe'sx vxite' ancianowe'sx kxtee ũssa jxukaysa puutx we'wetx Pablowe'sx yakh Antiokía çxhabna kaajxa'. Sa' txhitxhtxi Judas Barsabás yaasesa's vxite' Silas txāawe'sx wala jxtuhthesatx.

23 Txāawe'sx yakh karta na'jīna fxi'jçxa kaahtx:

Jesus jxkaahnisawe'sx vxite' ancianowe'sx weçxana yuwe kajaçtha'w ayte ũssa yakthē'jwe'sx jxukaysa yā'jçxa judiu ji'jmée vxite nasa Antiokíate ũssa i'kwe'sxtxi, vxite' Siria Cilicia kiwetewe'sxtxiwa.

24 Kwe'sxa' jiyutha'w kwe'sx yakh ũssa judiu maai' yu' kwe'sx jxkaahmeetewa u'jçxa txāawe'sx kaapiya'jni yakh i'kwe'sxtxi

kaypuba'jna ũsu'ne'ta Moises leya's nwēese'jçxa ya'çirkuncidaïne'kwe jīna.

25 Txā'wē yūupa'ga kwe'sx jxukaysa na'wē yūuya' puutx we'weçxa kwe'sx yakh ũssatx txhitxhçxa i'kwe'sxtxi thegya' kajaçtha'w kwe'sx yakhthē'j Pablowe'sx

26 na'wē nxus knaytxi kwe'sxtxi jxpe'jsa Jesukristo kaapiya'jni's pta'sxpa'ga txāawe'sx yakh.

27 Aça' kwe'sx kaahni Judas vxite' Silas txāawe'sx pa'jçxa i'kwe'sxtxi pta'sxixna ma'wē yūuwa'ja'swa ew āate.

28 I'kwe'sxtxi' jwee yu' thaakwe jxkaahmēe na'wēçxāa yūuwa'ja'sku Dxus Espiritu' kwe'sxtxi kaaūusuthe'j:

29 Naa kiwega dxus itxīmeesa's weçxaya' tajkx ikhni çxiçxa's ũ'wa'jme', eenawa ũ'wa'jme', tajkxnawa thukçxa ikhnisa çxiçxa's ũ'wa'jme'. Ptammeesa pka' yuuna fxi'zewa'jme'. Na'wē neewe'we'tha'w txāatx kxtey yuuteçxāa ewna. Dxus yakh txutemēe mfxi'zewe.

30 Txā'wē kaathe', Silaswe'sxa' Antiokiate pa'jçxa kxteewe'sx yakh pkhaakheçxa karta's dukhte',

31 txāa karta's lēeyçxa wala weçxatx txā'wē zhiçkwe yu'kxpehna fxi'jni's uyçxa.

32 Txāa Silaswe'sxa' Dxus kīh yūuya'watewa dxiikhēy pta'sxya' ājasatx yu', txāasa kxte yakhthē'jwe'sxtxi yu'kxpehna wala kçxhāaçha'jtx.

33 Txāawe'sxa' kxte maz en ũsçxa ki' sx-aweduuçte', kxte yakhthē'jwe'sxa' yuwe wala

weçxaa kaahna kaahtx kimne'ta kaah txãawe'sx tasxnay.

³⁴ Nawa Silas yu' kxte neeyũuya'k yajkx.

³⁵ Txajũ' Pablowe'sxa' Antiokiate Dxus yuwe's kaapiya'jna nestxi yuu vxite yakthê'jwe'sx yakh.

Pablo' Bernabé yakh txuteeçxa Dxus yuwe's pta'sxya' ki' kasehni

³⁶ Txãa e'su' Pablo' Bernabea's na'jĩk:

—Yakthê'jwe'sxtxi ki' thegya' u'jwega maa çxhabsuçxah ne'tka'w Dxus yuwe's pta'sx kxsũ jxuka, ma'wê ũstewa uyya' jĩte',

³⁷ Bernabea' Juan Markosna pe'jçxak u'j wêe.

³⁸ Nawa Pablo yu' pe'jna u'jya' wa'lku, txã'wê mjĩ pu'çxna jxã'jmée Panfxiliajũçxáa sxawedsa' sũhçxa.

³⁹ Txajũ' puutx ũusçxa we'weçxa txuteetx. Bernabea' Juan Markosna pe'jçxa Çxipre ki-wenku u'j,

⁴⁰ naapkaçxha' Pablo' Silasnak txhitxh, txãa yakh u'juwa'jsa. Aça' kxte yakthê'jwe'sxa' txãawe'sxtxi Dxus kusete neewe'wena jxã'jaçpkaçxha', kasehtx.

⁴¹ Sa' u'jçxa Siria Cilicia kiwesu yakthê'jwe'sxtxi kçxhãaçxha'jtx Dxus yuwe's pta'sxna.

16

Pablowe'sx yakh Timoteo u'jni

¹ Pablo Silas yakh Derbe Listra çxhabsu pa'jçxa kxte puutx uytxi Jesukristo's jxpa'gasa Timoteo yaasesa yakh. Txajx njĩ'ja' Jesukristo's jxpa'gasa

judiu ji'thewa, Timoteo ney yu' judiu ji'jmée griegok yu'.

² Listra İkonio çxhabsu u'psa yakthê'jwe'sx maawa jxukatx txâa Timoteo's wala tuuthe'je'.

³ Txajû' Pablo' txâa Timoteo's pe'jçxa u'jya'k ya-jkx, sa' kaacirkuncidaĩ'kh txã'wê griego nçxi'ka' jına kxsû judiwe'sx açewe'wekahmén.

⁴ Sa' Jerusalente Jesus jxkaahnisa vxite' ancianowe'sx fxi'jni karta's jxukatx pta'sxna u'jwe' maa çxhabsuwa yakthê'jwe'sxtxi.

⁵ Txã'wê jiyuçxa', kxsû pkhaakhesawe'sxa' jweeıçxáatx çhãçxha Dxus yakh fxi'ze', açá' nasa yu' een isatx pehnana u'jwe' Jesus kaapiya'jni's nwêese'jna.

Pablo ksxa'wte teeçx piçthê'j Macedo-niajûwe'sx pi'kxni

⁶ Txajû' Pablowe'sxa' Fxrigia Galaciasutx ktejkana u'j, Dxus Espiritu' Asia kiwesu jwee yu' Dxus yuwe's kaapta'sxi'jme' naa pa'ga.

⁷ Sa' Misia kiwete utxa kühçxa', Bitinia kiwen u'jwe'nja'w sühtewa, Espiritu' u'khaahme'.

⁸ Txã'wê yũuyã'the', Misia kiwen tehwed u'jçxa, Troas çxhabetx pa'j İkh wala pukate.

⁹ Kxte üsçxak Pablo' teeçx kuste ksxa'w teeçx piçthê'j Macedoniatewe'sx na'wê pxthaa we'wena üste: Macedoniate ktejkaçxa, kwe'sxtxi myuh pu'çxya' jına.

¹⁰ Pablo ksxa'wte txã'wê pa'ya yã'the', Macedonia kiwen u'jya' pheu'tha'w, kwe'sxtxi' Dxus txã'wê kajaçna Macedoniatewe'sxtxi txajx yuwe ewte nvxiitwa'jsa's pta'sxya' sühçxa.

Pablo Silas yakh Fxilipos çxhabte kxuuphni

11 Troas çxhabuh barkote khêeçxa u'tha'w ìkh pxãhte Samotracia kiwen. Sa' vxite kuskuskhê' Neapolis çxhabte pa'tha'w.

12 Txajü ki' u'jçxa', Fxilipos çxhabte pa'jçxa maz en ùsu'tha'w. Txãa çxhaba' romanowe'sx iiyamunisa wala jxtuhthesa yu'k Macedonia kiwete.

13 Teeçx jxkaase ente' çxhab eka kasehtha'w yu'wala pukate Dxus yakh puutx we'weya' pkhaakhenite, sa' Dxus yuwe's pta'sxtha'w kxte u'y pkhaakhesatx.

14 Aça' kxte pkhaakhesa teeçxsa' Lidiak yaase yu', Tiatira çxhabuwe'sx, tela zhiçxkwesatx txweysáa. Txãa u'ya' Dxusna nwêese'jsak txã'wê Pablo pta'sxni's wêse'jna u'pu'. Aça' Dxusa' txajx ùuste kaajiyu'kh Pablo pta'sxni's.

15 Txajü' txajx yattewe'sx yã'jçxa jxuka yu'te ya'bautisâyçxa', na'jñak kwe'sxtxi pxthaa we'wena pi'kx:

—Û'kwe' Dxus yakh fxi'zewa'jsate i'kwe'sxa' ew jiiçxa', ù'kwe yatte myuhwe dejxa' jïçxa ãadxijimeeçxa pe'jna u'kh.

16 Teeçx ente nyafxíi ùsnitey u'jweççxa', puutx uytha'w teeçx kna'sa's eçxthê'j txajx ùuste kaajiyu'the pta'sxna u'jusa yakh. Txãa kna'sa' patron jxpe'jnisa ku'ga yu', sa' patronwe'sxtxi wala vxyu kaaknayu'ju'ku'ga txã'wê kîhnawa ùuste jiyuçxa nasatx pta'sxna.

17 Txãa kna'sa' kwe'sx e'stey yuwe'k Pablo's na'wê sus we'wena:

—Naa piçthê'jwe'sxa' cielute Dxusna selpisaata', txãasatx i'kwe'sxtxi' pta'sxi' ewte u'jwa'j dxi'ja's jïna.

18 Maz enwa txã'wẽ yũute', nmehte' Pablo' kuçxçxa na'wẽk we'we txãa kna'sa ũuste u'psa eçxthẽ'ja's:

—Jesukristo jxkaahni's nwẽese'jçxa, txãa kna'sa ũusuh mkaaseh jĩçpkaçxha', eçxthẽ'ja' kasejk.

19 Nawa patronwe'sxa' txãa kna'sa pa'gaçxáa vxyu knayna fxi'zeni's ivxiituyã'jçxa', Pablowe'sxtxi uweçxa çxhab pxãhte jxũna u'jçxa

20 kxte khuẽswe'sxtxi na'jĩnatx pãatxhĩ'kh:

—Naa piçthẽ'j judiuwe'sxa' wala kuçx yuuna ũsta' kwe'sx çxhabte.

21 Kĩhwa kwe'sxtxi selpiwa'jmeesaçxáanatx kaapiya'ja', aça' txã'sa' kxtey yuuya' ãjãme'nja'w, kwe'sxa' romano nasatha'w naa pa'ga jĩte',

22 nasa' wala ũusaçxana ahçetx. Aça' khuẽswe'sxa' Pablowe'sxtxi ksũupi'jçxa peçxuukwe kahtx.

23 Txã'wẽ wala pkxuuçxa', karcelte ktx-aaja'jçxa kxte thegna ũssa's wala jxpa'yakx theg kaathe',

24 kxte thegsa' karcel dxiite jwee dxiiju pe'jna u'jçxa telte çxidatx se'wçxak ki'p.

25 Nawa Pablowe'sx kuspxãh Dxus yakh puutx we'wena memna u'pte', vxite preesu' wẽse'jna u'ppkaçxha',

26 ehd seena' çxhãçxha u'the', karcel vxitxa' jxuka phaateçx, aça' preesu tudni kadenawa çxuktetetx.

27 Txajũ' karcelte thegsa yajkxçxa', karcel vxitx jxuka phaateçxa ũste uyçxa', kçxilxa's

kutxi'jçxa peekiçxáa ya'ikhya'wak yu', preesu' jxuka kasehçxa u'jne'ta sũhna ũukhçxa.

²⁸ Aça' Pablo' na'wěk we'we:

—Txã'wě yũunu. Jxuka ũstha'w ayte jĩte',

²⁹ karcelte thegsa' bela pki'taçxa ũukhna wuwuuçxáa kũhçxa, Pablowe'sx tasxte pee-jxũkwek.

³⁰ Txajũ' Pablowe'sxtxi kutxi'jçxa na'wěk pějx:

—I'kwe'sxa' mpeeta'sxwe, ¿ma'wě yũuçxa Dxusa's uyuuki'th? jĩte',

³¹ Pablowe'sxa' na'wětx pta'sx:

—Kwe'sxtxi jxpe'jsa Jesukristo's jxpa'gaçxa yuuçxáa Dxus yakh fxi'zewa'ja's uyuune'ga petx iidx yattewe'sx yã'jçxa jxuka.

³² Txajũ' Dxus yuwe's pta'sxtxi txajx yattewe'sx jxukaysatx.

³³ Sa' karcelte thegsa' txãa kustey Pablowe'sx kpã'tx pki'kxna'wa txajx yattewe'sx yã'jçxa jxukaysa ya'bautisãytxi.

³⁴ Txajũ' txajx yatna pe'jna u'jçxa puuçku, sa' wala weçxana ũsu'k Dxus yakh fxi'zewa'ja's ji'phutha'w jxukaysa jĩna.

³⁵ Txajũ' khuēswe'sxa' kusíi policia kaahtx karcelte thegsa tasxna Pablowe'sxtxi' txhweet-ekahn pta'sxya'.

³⁶ Aça' karcelte thegsa' pta'sxku Pablo's:

—Khuēswe'sxa' txhweetekaahtx i'kwe'sxtxi'. Aça' kasehçxa ũukhmée me'jwe jĩte',

³⁷ Pablo' na'wěk we'we policiawe'sxtxi:

—Kwe'sxa' romano nasatewa ahçeçxa nasa jxuka uyna ũste pkxuuçxa karcelte kxuuph-txi, kĩh yũupa'ga yuuwetewa txã'sa' jiyumey.

Sa' ãçxa' paaçte kim yuhwa jiyunimeete tx-hweete'nja'w ¿sũjuwá'nta? Txã'wẽ yũuya' yu' ãjameetxna. Kwe'sxtxi kutxi'jya' txãawe'sx yuu yuwetxna jĩte',

³⁸ policiawe'sxa' u'jçxa khuẽswe'sxtxi txã'wẽy pta'sxte', txãawe'sxa' wala ũukhtxi, Pablowe'sxa' romano nasatewa jiyuçxa'.

³⁹ Txajũ' khuẽswe'sxa' Pablowe'sx tasxna u'jçxa jxpubane'tka'w jĩna pxthaa we'weçxa karceluh kutxi'jçxa çxhabuh kaseh kaahtx.

⁴⁰ Aça' Pablowe'sxa' karceluh kasehçxa', kxte çxhabte Lidia yatnatx u'j. Sa' ũukhmée meswe jĩna yakthẽ'jwe'sxtxi kvxiisxa'jçxatx tx-ajũ kaseh.

17

Tesalonikate nasa ũusçxani

¹ Pablo Silas yakh Anfxípolis Apolonia çxhabsu ktejkana u'jçxa, Tesalónika çxhabetx pa'j judiuwe'sx pkhaakheni yatte.

² Pablo' jxkaase ensu' tekh ki'supkaçxku Dxus libru ma'wẽne' we'we' txã'sna kaapiya'jna ũusu' judiuwe'sx pkhaakheni yatte.

³ Sa' ãatek pta'sx:

—Dxus tasxuh yuusa' wala pxthaa yuuçxa uuçxawa ki' ĩtxi yuuwa'jsak yu', aça' adx i'kwe'sxtxi pta'sxi'th Jesus jĩna txãaíik Dxus tasxuh yuusa Kristo yu'.

⁴ Txajũ' judiuwe'sx maái yu' txã'wẽ Jesusa' Dxus tasxuh yuusa Kristo yuh yu'ne' sũhçxa Pablowe'sx ju'gutx yuu. Txã'wẽy wala kuh griego

Dxusna nwēese'jsawa utxaatx, vxite' u'ywa wala kuh utxaatx jxtuhthesawe'sx.

⁵ Txā'wē yūute', vxite judiuwe'sx Pablo pta'sxni's açesa yu' wala ũusaçxaçxa nasa ewmeesatx pkhakhçxa çxhabte wala seena' ksu-usu'tx kuçx yuuna. Sa' Jasón yatte Pablowe'sxtxi pakweya' u'jtx txajū kutxi'jçxa nasaa ksxavxyte dukhya'.

⁶ Nawa txāawe'sxtxi uymeeçxa', Jasón vxite' yakhthē'jwe'sx kxte ũssaçxáatxwa wezxnna u'jçxa çxhabte khuēs tasxte kuutxa'jçxa na'wētx wēesxu:

—Txāa nasa naa kiwe's jxuka kay-puba'jsawe'sx aytewa pa'tha,

⁷ aça' Jasona' txajx yattega jxpa'ga. Txāawe'sxa' jxukaysa açe'tx Romate jxkaahsa leya's, txā'wē vxite jxkaahsa Jesus yaasesa ũsa' jīçxa.

⁸ Txā'jīna we'wete', khuēswe'sx nasa jxukaysa wala seena' sustxi.

⁹ Nawa Jasón vxite' txāa yakh ũssawe'sxtxi vxyu kusa'jçxaçxáa txhweetetx.

Pablo Silas yakh Bereate pa'jni

¹⁰ Kxte yakhthē'jwe'sxa' txāa kustey wala dud kaatx Pablowe'sxtxi' Berea çxhabna. Kxte pa'jna'wa u'jtx judiuwe'sx pkhaakheni yatna.

¹¹ Kxte judiuwe'sxa' wala ew yu'tx Tesalonikatewe'sx na'wēmée. Dxus yuwe's wala weçxana jxpa'gaçxa, een isatx Dxus librute pakwé' Pablowe'sx pta'sxni isa dxihstewa jiyuya'.

12 Txã'wě kxteewe'sx wala kuhsa jiyutx Pablo pta'sxni' isa yuh yu'ga sũhna, vxite' u'y griego jxtuhthesa petx piçthē'j yã'jçxa.

13 Nawa judiu Tesalonikatewe'sxa' txã'wě Pablo' Dxus yuwe's pta'sxna ũsa' Bereate jĩni's jiyuçxa', Berea çxhabna u'jçxa kxte nasatx wala seena' kaaũusçxa'jtx.

14 Aça' kxte yakthē'jwe'sxa' jwee yu' kaajx-thēeyu'jmée Pablo's kaahtx Atenas dxi'j. Naasáa Silas Timoteo txãawe'sxçxáatx neeyũ Bereate.

15 Pablo yakh pi'kxna u'jsawe'sxa' Atenas çxhabna pa'jtx u'j. Sa' ki' Bereate sxawedna pa'jçxa', Pablo' i'kwe'sxtxi wala dud yuukaakh txãa yakh ũsya' jĩnatx pta'sx Silaswe'sxtxi'.

Atenas çxhabte Pablo pa'jni

16 Pablo' Atenas çxhabte Silas Timoteo txãawe'sxtxi ũythasna ũsçxa', wala kuh yajkxna fxi'ze'k txãa çxhaba' naa kiwete dxus ãtximeesaçxaçxáatxku txakwe wala ji'ph yu' naa pa'ga.

17 Txãasak judiuwe'sx pkhaakheni yatte judiuwe'sx yakh vxite' judiumeeçxawa Dxusa's yaakxsawe'sx yakh puutx we'we', sa' çxhab pxãhsuwa een isak we'we' Dxus ãtximeesatx neewe'wesawe'sx yakh.

18 Txajũ' kxte epikúreo kaapiya'jni's piyana ũssawe'sx vxite' estóiko kaapiya'jni's piyana ũssawe'sx piçthē'ja' Pablo yakh puutx we'wetx, naapkaçxha' maái yu' na'jĩnatx we'we' txãawe'sx pwe'sx:

—Naa thē'ja' ¿kĩjki'k txakwe wala we'we'? jĩ'tx. Naapkaçxha' vxite we'weçxa':

—Dxus jiyunimeesatx kxsusnak pta'sxi' jĩ'tx.

Pablo' Jesus uuçxa ki' itxĩ yuuni's pta'sxpa'gatx txã'jĩna we'we'.

¹⁹ Txajũ' Pablo's teeçx ahte Areópago yaas-
esate pe'jna u'jçxa paapějxtxi:

—Kwe'sxtxi meen peeta'sx na'wẽ yuwe u'sesa
pta'sxi'g txã'sa' jiyu wẽetha'w.

²⁰ Na'wẽ kĩhwa fxiysa pta'sxi'g txã'sa' ew ãate
mkaajiyu'j jĩna.

²¹ Txã'wẽ Atenastewe'sxa' jxukaysa
pkhaakheçxa kĩhwa u'se kaapiya'jni's wẽse'jna
puutx paapějxnaçxáa fxi'zesatx yu', aç'a' vxite
kiwejuwe'sx Atenaste u'p-ya' pa'jsawa txã'wěytxi
yu'.

²² Txajũ' Pablo' Areópagote txãawe'sx ksx-
avxyte yujuçxa we'wek:

—Atenastewe'sx i'kwe'sxa' dxusa's wala
yaakxsane'kwe sũju'th.

²³ Msuuwa i'kwe'sx dxusa's neewe'wenisu
thegna u'juçxa', uythu teeçx altalte na'wẽ
fxi'jnisa: Jiyunimeesa Dxusa' jĩnisa. I'kwe'sx
na'wẽ jiyunimeesa dxus jĩna neewe'wene'kwe
txãa Dxus jiyunimeesa'sthu adxa' ãate kaa-
jiyu'ju'.

²⁴ Txãa Dxusku naa kiwe's vxitçxa kxte
kĩjkĩhçxah ũstxna txãatxwa jxuka vxit. Txãa
pa'ga txãaíi namu' naa kiwe, cielu yã'jçxa. Txã'
piçthě'jwe'sx txaahni yat-su ũsu'çme'.

²⁵ Txã' naa kiwete nasa pu'çxni fxi'zewa'jsame'.
Txãaíik kwe'sx jxukaysa itxĩ fxi'zewa'ja's ũs,
kĩjkĩhnawa jxuka.

²⁶ Sa' nasa maazkuẽesawa teeçx piçthě'j
ji'jçxaçxáa yuuwa'ja's vxitçxa, msuuçxah

u'pwa'jsatewa pta'sxna ena'swa txuhdek nus pa'jn ki' sekna yuuwa'ja's.

²⁷ Dxusa' ūsna sūhçxa pakweçxa' thēymée uykahnku txā'wē yūu. Aça' Dxusa's pakwete yu' kwe'sx yakh jxu'jmeete ūsa'.

²⁸ Kwe'sxa' Dxus ūste íçxáatha'w ítxi ěse'sena fxi'zeya' āja'. Dxus ūste ítxi i'kwe'sx ji'j wala fxi'jya' jiisawe'sx na'wē we'we: Dxus taki'nitha'w jīna.

²⁹ Txā'wē Dxus taki'niyā'jçxa', piçthē'jwe'sx ūus yajkxçxa nasa na'wē piisani ūsta' vxyuu beh, vxyuu çxihme, kwet txā'wēsa' kwe'sxtxi taki'satxna sūhwa'j ji'phmeetha'w.

³⁰ Dxusa' nyafxii ensuy yu' ma'jīme' nasa' jiimeeçxa ma'wēwa yūutewa. Nawa āçxha' jxukaytxi jxkaaja'k pkaltxi nvxihtçxa Dxusa'sçxáa pakwekahn.

³¹ Txā'wēme', Dxusa' teeçx ente naa kiwete yuuwesatx kastigāywa'jsa txhitxhku. Aça' txāa txhitxhnisa' kxtey yuuyujuna. Txā'wē yuuya' íçxáak uuçxawa ki' ítxi yuu.

³² Txā'wē uuçxawa ki' ítxi yuuk jīni's wēse'jçxa', maaíi yu' weeçxtxi, naapkaçxha' vxite we'weçxa':

—Vxite enkhē ki' pta'sxine'ga, txagaçx ki' wēse'je'nja'w jī'tx.

³³ Txā'jīyā'the', Pablo' u'kh.

³⁴ Nawa maaíi yu' Pablo pta'sxni isa yuhna sūhçxa txāa yakh utxaatx. Kxte utxaasaawe'sx teeçxsa' Dionisio Areópagote pkhaakhesatewe'sxku yu', sa' teeçx u'y Dámaris yaasesawa utxaak, vxite yā'jçxa.

18

Korinto çxhabte Pablo pa'jni

¹ Txãa e'su', Pablo' Atenasuh kasehçxa Korinto çxhabnak u'j.

² Kxte' teeçx judiu Akila yaasesa yakhku puutx uy, Ponto kiwejuwe'sx. Akila txajx nyu Priscila yã'jçxa u'seçxáa Italiaju pa'jçxatx kxte ũsu', Romate jxkaahsa Klaudio' judiuwe'sxtxi txajũ jxuka kutxi'pha'ga. Aça' Pablo' txãawe'sx yatna u'jçxa Akilawe'sx yattek yuju.

³ Txãawe'sx na'wëy tultu kaççxak txweyna fxi'zesa yu', txãasak kxte neeyũu txãawe'sx yakh mjĩina.

⁴ Sa' jxkaase ensu' judiuwe'sx pkhaakheni yatna u'jçxa, kxte judiuwe'sx vxite' judiumeesatxwa Dxus yuwe's pta'sxi'k Dxus jĩi knayya'.

⁵ Silas Timoteo yakh Macedonia kiweju pa'the', Pablo' vxite mjĩia's nvxihtçxa, Dxus yuwe pta'sxwa'the yuuçxáak yuju een isa, Jesusa' Dxus tasxuh yuusa Kristo yuh yu'k jĩna judiuwe'sxtxi kaajiyu'jna.

⁶ Nawa txãawe'sxa' txã'wë pta'sxni's jxpee-jxmeetha'w jĩçxa ahçena weeçxwa'ja's uytxi. Aça' Pablo':

—Adxa' yuuwemeeth, i'kwe'sxtxi pta'sx yã'th. Aça' yuuwesa' i'kwe'sxi'kwe peekx uuwa'ja's pak-wena ũspa'ga jĩna txajx athni ropa's ya'tatak. Sa' txã'wë yũupa'ga ãçxha' u'jweçthu judiu ji'jmée vxite nasatx pta'sxya' jĩk.

⁷ Txã'jĩna'wa judiuwe'sx pkhaakheni yatuh kasehna'wa, teeçx piçthë'j Justo yaasesa yatnak

u'j, judiuwe'sx pkhaakheni yat pukateyçxáa. Txãa piçthê'ja' Dxusna neewe'wena fxi'zesak yu'.

⁸ Txajũ' judiuwe'sx pkhaakheni yattewe'sx npiiçthê'jsa Krispo' txajx ùuste Jesusa's nwēese'jya' yajxku petx txajx yattewe'sx yã'jçxa jxuka. Txã'wēy Korintotewe'sxwa wala kuhsa Kristo's jiyuçxa ùuste jxpa'gatx yu'te ya'bautisâyna.

⁹ Txãa e'su' Jesusa' teeçx kuste na'jĩnak vxyaaçxa we'we Pablo's:

—Weh yuhwa ùukhmée Dxus yuwe's mpeeta'sx. Txã'wēme', naa çxhabte adxna nwēese'jwa'jsa wala ùs iicxáata'.

¹⁰ Txãa pa'ga adxa' idx yakh pi'kxna ùsthu, aç'a' kim yuhwa idxa's ikhya' yu' ãjameetxna.

¹¹ Txã'jĩyã'the', Pablo' Korinto çxhabte txãawe'sx ksxavxyte Dxus yuwe's kaapiya'jna ùsu'k anxu y medio ãhpkaçx.

¹² Nawa Akaya kiwete ne'jwe'sx Galión ensu' judiuwe'sxa' Pablo's ahçeçxa khuēs tasxte jxũna u'jtx.

¹³ Sa' na'jĩnatx pta'sx ne'jwe'sxa's:

—Dxusa's nwēese'jwa'ja's ley jxkaaja'k txãa jxkaahnijũ kasehçxa Dxusa's fxiiy nwēese'jwa'ja'sku kaapiya'ja' naa piçthê'ja' jite',

¹⁴ Pablo pasya'wagaçxha', ne'jwe'sx Galión khuē'y judiuwe'sxtxi we'wek:

—Yuwe ewmeesa's adxa's pãatxhĩ'kheçwaça', pu'çxhiwá'nja i'kwe'sx pãatxhĩ'khni's.

15 Nawa i'kwe'sx pwe'sx fxi'zeni leyçxá' aça' txã'sa' i'kwe'sx pwe'sx mpheu'jwe. Adxa' txãasu' thegu ji'phmeeth jĩçxa,

16 txajũ eka kutxi'kh.

17 Aça' judiuwe'sx pkhaakheni yatte npiiçthẽ'jsa Sostenesa's uweçxa, pãpatx griegowe'sx jxukaysa ne'jwe'sx dxi'pte. Nawa Galiona' kuçx ma'jĩme'.

Pablo Dxus yuwe's pta'sxya' ki' kasejk naa yakha' tekhs us

18 Txã'wētewa, Pablo' wala kuh en ũsu'k kxte. Txãa e'suk kxte yakhthẽ'jwe'sxçxáatx nvx-ihtçxa, Siria kiwen u'jwa'j ji'phu barkote khẽeçxa Priscila Akila yã'jçxa. Txãa dxi'j u'jweççxa', Cenorea çxhabte pa'jçxa barkote khẽemey txajx dxkhasa's jxuka ktxiidxi'k. Dxus yakh yuuçxáa fxi'zewa'ja's Dxus yakh puutx we'wenak txã'wẽ yũu.

19 Txajũ' Efxeso çxhabte pa'jçxa', Pablo' Priscila Akilawe'sxtxi nvxihtna'wa, judiuwe'sx pkhaakheni yatna u'kh, kxte judiuwe'sxtxi Dxus yuwe's kaajiyu'jya'.

20 Aça' txãawe'sxa' wala pxthaa we'wetx kuh en ũskahn. Nawa Pablo' kxtey yuumée,

21 txajũ ki' kasejk na'jĩçxa:

—Jerusalente fxiesta u'puya'wa' kxte ũswa'j ji'pthu. Nawa ki' sxawedu'nja i'kwe'sxtxi thegya', Dxus ma'wẽ jxthãaste' jĩna we'weçxa, Efxeso çxhabuh barkote khẽeçxa u'kh.

22 Sa' Cesarea çxhabte pa'jçxa', Jerusalennak u'j kxte pkhaakhesawe'sxtxi weçxaya'. Txajũ' Antiokía çxhabnak u'j.

23 Kxte maz en ũsçxaçxáa, txajũ ki' kasejk Galacia Fxrigia kiwesu nyafxíi pta'sxnisu jxuka pekũjxa', Dxus yakh fxi'zesawe'sxtxi kçxhãaçxha'jna.

Efxeso çxhabte Apolos Dxus yuwe's pta'sxni

24 Txãa ensu' teeçx judiu Apolos yaasesa Alejadría çxhabuwe'sx pa'kh Efxeso çxhabte, Dxus libru Moises fxi'jni's ew jiisa kaapiya'jya' sxiig-meesa.

25 Sa' Jesukristo kimtewa pta'sxni jiik yu', txãasak Juan yu'te bautisãyniçxáana jiiçxawa txajx jiyuni yu'sa' jxpubamée kaapiya'ja'.

26 Apolosa' judiuwe'sx pkhaakheni yatte u'kaçxa sxiigmeek pta'sxi'. Aça' Priscila Akilawe'sx jiyuçxa', txãa Apolos txã'sçxáa fxii pe'jna u'jçxa, jweeíçxáatx ew pta'sx Jesukristo yakh fxi'zewa'ja's jxuka.

27 Aça' Apolosa' Akaya kiwen u'jweçte', yakhthē'jwe'sxa' u'jwa'ja's pu'çxçxa teeçx karta fxi'jtx Akayate yakhthē'jwe'sx wa'lmée jxpa'gakahn. Txã'wē Akayate pa'jçxa', wala pu'çxku Dxus peeygãhçxa nwe'wenisatx na'wē yūuna:

28 Jesusa' Dxus tasxuh yuusa Kristo yuh yu'k, i'kwe'sx ũythasni txã'sna i'kwe judiuwe'sx jx-puba jĩnak pta'sxi', Dxus librute ma'wē fxi'jni ũsna txãa yakh kaaja'da'jna.

19

Efxeso çxhabte Pablo pa'jni

1 Apolosa' Korinto çxhabte ũspkaçxha', Pablo' yaçkhēy pekũhni kiwesu pa'jna u'jçxa Efxeso

çxhabtek pa'j. Kxtea' Jesukristo's iiwëse'jsa yakh puutx uyçxa',

² na'wëk pëjx:

—I'kwe'sxa' Jesukristo's jiyunijü' ¿Dxus Espiritu's jxpa'gakwe'? jïte', na'wëtx pas:

—Dxus Espiritu's naa kiwete kaahnik yuu jïniçxáa yuhnawa iiwëse'jmeetha'w kwe'sxa'.

³ Txajü' Pablo' pëjxku:

—I'kwe'sxa' ¿kîh yûuya' sühçxakwe ya'bautisây? jïte', txâawe'sx pasçxa':

—Juan pta'sxçxa': Ya'bautisâywa'ja' jïk aççxáatha'w ya'bautisây jïtx.

⁴ Txajü' Pablo' na'wëk pta'sx:

—Juana' yu'te bautisâyku pkaltxi nvxihtçxa peena yu' pkalte fxi'zemeene'kwe, Dxus tasxuh yuusa Kristo adx e'ste yuja' txã'sna jxpa'gaya' jïçxa bautisâysak yu' jïte',

⁵ txâawe'sxa' ya'bautisâytxi Jesusa's nwëese'jya' sühçxa.

⁶ Txajü' Pablo' txâawe'sx dxikthesu peekizeçxa Dxusa's neewe'wete', Dxus Espiritu' txâawe'sx ûuste khëek. Aça' vxite yuweju we'weya' âjawa'ja's jxpa'gatx, sa' Dxus kîh yûuya'watewa dxiikhëy pta'sxya' âjatx.

⁷ Txã'wë yûusa' doce piçthë'jtx yu'.

⁸ Pablo' kxte üsçxa' judiuwe'sx pkhaakheni yatna u'jna nesku yu' tekh a'tepkaçx. Sa' nasatx ewku kaajiyu'ju' Dxus jxkaahwa'j ena's.

⁹ Nawa vxite yu' txã'wë pta'sxni's wëse'j wëemeçxa, açewe'wetx nasaa ksxavxyte. Aça' Pablo' txâawe'sx tasxuh txuteeçxa Jesukristo's jxpa'gasawe'sxtxi pe'jna u'kh Tiranno kaapiya'jni yatna, sa' kxte' een isak pta'sxi' e'z anxupkaçx.

10 Aça' Asia kiwesu u'psa jxukaysa jiyutx judiu vxite' judiimeesawa Jesus kaapiya'jni's.

11 Txajũ' Dxus pu'çxte', Pablo' nuykatxhi'k kîh weete aç'a'satxwa jxuka.

12 Txã'wẽ yũuyã'the', Pablo ropa meeçxa' panxwelo kîhçxáanawa jxũna u'jwe'tx aç'a'sawe'sx jxa'dxkahn. Aça' txã's jxa'dxçxaçxáa kîh weejuwa katxhi'tx, txã'wẽy eçxwa txãawe'sx ũusuh kaseje'tx.

13 Txã'wẽ yũute', judiuwe'sx dxijxuuçxa eçxtxi nasaa ũusuh kutxi'jsawe'sxwa Jesus yase's kx-susçxa eçxtxi kutxi'jya' na'wẽtx we'we':

—Pablo kxsusnisa Jesus yasete jxkaajaçthu kasejkahn jînatx we'we'.

14 Txã'wẽ yũusa' sacerdote npiiçthẽ'j Escewa nçxi'k sietesatx txã'wẽ yu'.

15 Makwe txã'wẽ we'wetewa, eçxa' na'wẽk pas:

—Jesusa's jiith kintewa, sa' Pablo'swa iuythu. Nawa i'kwe'sx yuutxi' jîimeeth kintewa.

16 Txã'jîna'wa txãa eçx iiyamunisa nasa' jxkaahna we'wesawe'sx kakwete âaphçxa, txãawe'sx athni ropatx sudena kpã'vxitna yũute', txãawe'sxa' ũphna u'jtx sũpxçxáa.

17 Txã'wẽ yũuni's Efxeso çxhabte ũssa judiuwe'sx vxite' judiimeesawa jiyuçxa' Jesus yase's kxsusya' wala ũukhtxi, sa' Jesusa's weçxanaçxáatx fxi'ze'.

18 Txajũ' Pablo pta'sxni' ewsa yuhna sũhçxa maazkuêesawa utxaatx txãawe'sx ewmée yũuna fxi'zeni's áate pta'sxna.

19 Aça' txã'wẽy dxijxuuna fxi'zesawa jxukay txãawe'sx libru ewmeesatx jxũna pa'jçxa',

jxukaysa dxi'pte kabtxi. Txãa libru' jxukaçxah yu' cinkwenta mil peso ãhtx pa'gasa yu'.

²⁰ Txã'wẽ yũute', Dxus yuwe' jweeíçxáak çxhãçxha walaana u'j.

²¹ Txãa e'su', Pablo' Jerusalenna u'jweççxa', Macedonia Akaya kiwesu pa'jna u'jya'k yajkx. Sa' Jerusalenuh Roma çxhabnawa u'jwe'nja sũhnak yajkx.

²² Txajũ' Macedonia kiwen kaakh txã'sna pu'çxna u'jusa Timoteo vxite' Erasto txãawe'sx e'zsatsx. Nawa txãa yu' nee Asia kiwete ũsu'k maz en.

Efxeso çxhabte nasa ũusçxani

²³ Txãn ensu' wala seena' sustxi Dxus yuwe's ahçeçxaçxáa.

²⁴ Txãa yuwe kiissa yu' Demetrio vxyuu çxihme's dxus Diana ũsni yat na'wẽ pheu'jçxa txãa yakh mjïisatsx wala vxyu kaaknayu'jsak txã'wẽ yũu.

²⁵ Sa' txãa yakh mjïisa vxite' txãa na'wẽy pheu'jsatsxwa jxuka pkhakhçxa na'jïk:

—I'kwe'sxa' jii i'kwe na'wẽ mjïiçxa' kïh yuhwa peejxmeetha'w vxyu uyu'.

²⁶ Nawa i'kwe'sxa' iiwẽse'jne'kwe Pablo jïnisa' naa çxhab Efxesoteçxáamée, Asia kiwete msu-uwa nasatsxi' jxuka txajx ju'gu tuphiça', txã'wẽ piçthẽ'jwe'sx pheu'jni dxusa' ãtximeesata' jïçxa.

²⁷ Na'sa' mpa'yajkxwe. Txã'wẽ yũumeete', kwe'sx mjïiniçxáa vxitumée, dxus Diana ũsni yat txakwe wala jxtuhthesa yuu vxituna. Aça' Asia kiwetewe'sx jwee vxite kiwetewe'sxwa

dxus Diana txakwe zhiçxkwesa's jwee yu' nwēese'jmeetxna.

²⁸ Txã'jĩna we'wete', wala ũusaçxaçxa na'jĩnatx sus we'we:

—¡Efxeso çxhabte dxus Diana yuuçxáa maatewa jxthaakwe jxtuhthesa'! jĩnatx sus.

²⁹ Aça' txãa çxhabtewe'sx jxuka ũusaçxaçxa e'z piçthē'j Macedoniajũwe'sx Pablo's pi'kxna yuusa Gayo Aristarko txãawe'sxçxáatx uweçxa wezxna u'jtx çxhabte txãawe'sx ũsnite.

³⁰ Pablo' kxte u'ka wēek nasatx we'weya'. Nawa kxte yakhthē'jwe'sxa' ka'ga'jmeeta'.

³¹ Txã'wēy Pablo namiku khuēswe'sx jxtuhthesa sawa Pablo's kuçx kxte u'kakaahmeeta'.

³² Naapkaçxha' pkhaakhesa yu' kījkihwa ũușçxa we'wena seena'tx susna ũsu'. Nawa kxte pkhaakhe pu'çxsa jwee kuhsa yu' jiimeetx yu' kīh yūupa'ga txã'wē pkhaakhetewa.

³³ Nawa kxte ũssa maaí yu' kīh yūupa'ga ũusaçxana ũstewa jiisa', teeçx piçthē'j Alejandro yaasesa's pta'sxçxa nasaa ksxavxyte ukapajkxna nuykūhtx we'wewa'jsa. Aça' txãa piçthē'ja' sxuuna' yuuwa'ja's kuseju pta'sxçxa judiuwe'sxa' yuuwemeetha'w jĩna we'we wēek.

³⁴ Nawa judiu íiçxáatewa jiyuçxa', jxukaysa ki' sus we'wetx e'z ora āhpkaçx na'jĩna:

—¡Efxeso çxhabte dxus Diana yuuçxáa maatewa jxthaakwe jxtuhthesa'! jĩna.

³⁵ Txajũ' çxhabte sekretario' pejka sxuuna' vxitçxa' na'jĩk:

—Efxesotewe'sx mwēese'jwe. Naa çxhabte nasa' dxus Diana ũsni yata's wala jxpap'yakx thegna vxite' Diana's piisanisa cieluju kīj

txã'snawa txã'wěy ew jxpe'jwa'jsatewa jxuka jiita' maa kiwetewe'sxwa.

³⁶ Aça' ħma'wě yũuçxa txã'sa' thegmée nvxiht-ya' ajatxki? Txã'wě yu' yuumeetxna. Txãa pa'ga wejx kuh yajkxmée sxuuna' myuuwe.

³⁷ Txãa pa'gatey e'z piçthē'j i'kwe'sx jxūna kūji'kwe txãawe'sxa' i'kwe'sx dxus Diana's suwwameeta' sa' açewe'wenawa ũsmeeta'.

³⁸ Meeçxa' Demetrio vxite' txãa yakh mjĩisawe'sxçxáa maa yakh iipuiisaçxawa, pãatxhĩ'khwa'j ji'phta', txãa pa'gatey khuēswe'sx ũsta', aça' txãawe'sx tasxte pãatxhĩ'khya' u'jwetxna, kxah kaapdxipujçxa yuwe's pheu'jutxna kĩhteçxah yuuwesatewa.

³⁹ I'kwe'sxa' khuēs tasxtemée i'kwe'sx pwe'sxçxáa puutx we'wewa'j ji'phçxawa, zhiçxkwe mpuutxwe'wewe txã'wě susmée.

⁴⁰ Na'wě açxh susni yuwe's gobierno' paapēyiwáana aça' seena' ewmeete neeyũuwa'the ũstha'w, kĩhwa yuuwemeete suspa'ga.

⁴¹ Txã'wě we'weçxa', kaapçu'juk txãa susni's.

20

Macedonia vxite' Grecia kiwen Pablo u'jni

¹ Yuwe susni pçuute', Pablo' Dxus yakh fxi'zesawe'sxtxi pa'yaçxa wala ew yu'kxpehçxak txãawe'sxtxi weçxaçxa Macedonia kiwen u'j.

² Txãa kiwesu jxuka pekũjk yakhthē'jwe'sx ũukhwe'sxte kçxhãaçxha'jna. Sa' txajũ' Grecia kiwenwa u'kh.

³ Kxte tekx a'te ũsçxa', barkote khēeçxa Siria kiwen u'jya'wak yu'. Nawa judiuwe'sx

ikhya'wata' txãa dxi'the jĩni's jiyuçaçxáa, barkote u'jmée çxidaçxáa maa dxi'june' pa'j txã'wēyku sxawedxa' yajkx, Macedonia kiwejuy uykhēwna.

⁴ Txãa yakh pi'kxna u'jtx Sópater Bereajuwe'sx, Aristarko vxite' Segudo Tesalonikajuwe'sx vxite' Gayo Derbejuwe'sx vxite' Timoteo vxite' Tíkiko Trófximo txãawe'sxa' Asia kiwetewe'sxtxi yu'.

⁵ Txãa yakhthē'jwe'sxa' dxi'j pxājū yaçte u'jçxa Troas çxhabetx kwe'sxtxi ūythas.

⁶ Pan lewadura ji'phmée ū'ni fxiesta skhēwniitetha'w kwe'sxa' kaseh, Fxilipos çxhabuh barkote khēeçxa, sa' tahç ente' kpajkxtha'w Troas çxhabte. Kxte siete entha'w ūsu'.

Troas çxhabte Pablo weçxaya' pa'jni

⁷ Ki'sen ente', Dxus yakh fxi'zesawe'sx yakh pkhaakhetha'w kxteçxah pkhaakheçxa ū'ya'. Naapkaçxha' Pablo' Dxus yuwe's kaapiya'kh. Txã'wē kuskuskhē' u'jwe ji'phçxa', txaçx kuspxāhnpkaçxku pta'sxna ūsu',

⁸ teeçx piesate ēete wala kuh lampara pki'tanisa ūsu'tx kxtee.

⁹ Aça' kxte teeçx piçtakx Eutiko yaasesak wentanate kaçxçxa u'pu'. Txã'wē Pablo' wala jxu'j we'wete', txãa piçtakxa' dee wēeçxa dehna u'pĩi saapajkxku yat ēe walaju, aça' uuniisa'stxi kiis.

¹⁰ Txã'wē yūute', Pablo' sa'jçxa, txãa uusa's psxa'dçxa na'wēk we'we:

—Yakhthē'jwe'sx, nxusnuwe, ki' ĩtxi yuuk jĩnak pta'sx.

11 Txajũ' Pablo' ki' ãe yatte tejkaçxa Santa Cena's puuçku. Txã'wẽ yũuçxa khikhyna sêhpkaçx pta'sxçxak u'j.

12 Txãa piçtakxa' ki' ãtxi yuute', pe'jna u'jçxa jxukaysa wala weçxana neeyũutx.

Troas çxhabu Mileto çxhabna u'jni

13 Kwe'sxa' barkote khêeçxa yaçte u'tha'w Asón çxhabna, Pablo's kxte ãythasya'. Naapkaçxha' txã' çxidajk u'j.

14 Asón çxhabujk kwe'sx yakh barkote khêe, aça' txajũtha'w Mitilene çxhabna u'j.

15 Txajũ ki' kasehçxa vxite enkhê' Kío kiwe pukasutha'w skhêw. Sa' vxite enkhê' Samos kiwetek barko' dudte utxaa. Txajũ ki' u'jçxa', teeçx ahte Trogilio yaasesate pa'jçxatha'w jxkaase. Txajũ' vxite enkhê' ki' u'jçxa' Mileto çxhabte pa'tha'w.

16 Pablo' Asia kiwete jxthêeyuuya'mée, Efxeso çxhabte u'kame', Jerusalente dud pa'jçxa Pentekostes fxiestate ãsya' sũhçxa.

Mileto çxhabu Efxesotewe'sxtxi pa'yani

17 Sa' Mileto çxhabte pa'jçxa', Efxeso çxhabte ancianowe'sxtxi pa'yak na'wẽ we'weya':

18 —Adxa' Asia kiwete nyafxçxah pa'jii kãhtka yũuna fxi'ze açxpkaçx txã'sa' i'kwe'sxa' jii i'kwe.

19 Judiuwe'sx açepa'ga txakwe wala nxuswa'j en pa'thewa, Jesukristo's een isa selpiina bagaçxtewa i'kwe'sxtxi ã'ne petx khakh pu'çxna nesthu yu' kim yuhnawa iwejçx we'wemée.

20 I'kwe'sxtxi selpiwa'jsa Dxus yuwe's pta'sxmée yu' yuumée, nasaa ksxavxysu yat-suwa kaapiya'jna nesthu yu'.

21 Txã'wěy judiuwe'sx vxite' judiu ji'jmée txãawe'sxtxiwa jxukaysatx pta'sxthu: Dxus tasxte sxawedxa' pkaltxi nvxihtçxa kwe'sxtxi jxpe'jsa Jesukristo'swa ũuste miipa'gawe jïna.

22 Āçxha' u'jweçthu Jerusalenna Espiritu kaahni. Nawa jïmée u'jweçthu kxte jwee kîhçxa yuune'thewa.

23 Naasáa na'wě yuuçxáa jiith: maa çxhabte u'thewa Dxus Espiritu' pta'sxna nesku yu' karcelte kxuuphni wala nxuswa'j ji'phgu jïna.

24 Nawa txã'sa' yaaki'çmeeth, sa' adx uuwa'ja's yuhwa ũukhu'çmeeth. Jesukristo neewe'wek Dxus peeygãani's txã'sna uu entepkaçx weçxana pta'sxna fxi'zewaççxáa, txã'wěena sũju'th.

25 Ayte i'kwe'sx yakh ũsçxa' Dxus jxkaahwa'j ena's pta'sxthu txã's wěse'jsa aytewe'sxa' adxa's açxhuyã'ja' peena yu' uymeene'kwe sũju'th.

26 Nawa adxa' i'kwe'sxtxi kaapiya'jyã'th na' yuuwemeeth,

27 txãa pa'gatey Dxus jxthãasni's paaçte nvxi-htmée jxuka ãateçxaçxáath pta'sx naa pa'ga.

28 Aça' açxha' peekíi ya'mpa'yajkxwe, txã'wěy Jesukristo ee pkawçxa weynisa Dxus luuçtxxiwa ew jxpe'jna, Dxus Espiritu' i'kwe'sxtxik thegwa'jsa nvxiht naa pa'ga.

29 Jiith adx u'the', vxite pa'jatxna Dxus yakh fxi'zesawe'sxtxi ivxiitu wěena, sxĩ'j weesweewa ma'wěta piisxaatx ivxiitu' txã'wěy yũuya'.

30 Jxpa'yakxmeeçxa', i'kwe'sx pwe'sxíiwa

kasejene'kwe isasa's pta'sxipkaçtete
kaypuba'jwa'jçxá's pta'sxna Dxus yakh fxi'zesatx
kaypuba'jna.

³¹ I'kwe'sxa' miiyajkxwe, adxa' tekx anxuth
teeçxsa na'wēçxah yu'kxpehna ūsu' en petx kus
yā'jçxa ũ'ne petx khakh.

³² Āçxha' yakthē'jwe'sxtxi Dxusa's
neewe'weçxa txajx kusete nvxiituçthu txajx
kaapiya'jni's peçxkanamée fxi'zekahn, txāa
pa'gatey txajx yuwe' kçxhāaçxha'jna weçxana
kaafxi'ze'jçxa cielute txajx nwe'wenisa jxukaysa
yakh ūswa'ja'swa ūsya' ājawa'jsa'.

³³ Adxa' i'kwe'sx yakh ūsçxa', vxyu, ropa,
txā'wēsa pees jxthāasna fxi'zemeeth kim yuh-
nawa.

³⁴ I'kwe'sxa' ew jii i'kwe txā'wē yūumée, adx
kuseju mjiiçxath kīh peejini'swa uyu', vxite' adx
yakh u'jusawe'sx jiiwa txā'wēy.

³⁵ Txā'wē vxite jxpeejsatx pu'çxwa'ja's
kaapiya'jnath fxi'ze bagaçxtewa. Txā'wē
yūukahniik Jesukristowa na'jī': Peessa yakh
wejx weçxa yuja' jxpa'gasate jxthaakwe jī'k.

³⁶ Pablo' we'wena jxā'jçxa', jxukaysa yakh
peejxūkweçxa Dxus yakh puutx we'wek.

³⁷ Txajū' jxukaysa ũ'nena psxa'dçxa Pablo's
weçxatx.

³⁸ Txā'wē peena yu' uymeene'kwe jīte',
wala nxusna ūsu'tx, sa' pi'kxna u'jtx barkote
khēepkaçx.

21

Jerusalenna Pablo u'jni

¹ Yakthē'jwe'stxxi nvxihtçxa, barkote khēena'wa tehwed u'tha'w teeçx ahte Kos yaasesate. Sa' vxite enkhē' Rodas kiwete pa'tha'w. Txāajū Pátara çxhabnatha'w u'j.

² Pátara çxhabte pa'jçxa, teeçx barko uytha'w Fxencia kiwen u'jsa, txāatetha'w khēeçxa u'j.

³ Çxipre kiwe's uynatha'w skhēw, txā' jebu ju'guk neeyūu. Txā'wē u'jçxatha'w Siria kiwete pa'j. Sa' Tiro çxhabte u'katha'w barko' kxte karga spāasxwa'kh ji'phu' naa pa'ga.

⁴ Kxte' Kristo's nwēese'jsawe'stxxitha'w uy, sa' siete entha'w ūsu' txāawe'sx yakh. Aça' txāawe'stxxi Dxus Espiritu kaajiyu'the', Pablo's pta'stxxi Jerusalenna u'jmeene'ga jīna.

⁵ Txā'wētewa, siete en skhēuuçpkaçxha', kasehtha'w. Aça' Kristo's nwēese'jsawe'sx jxukaysa nyuuwe'sx petx luuçx yā'jçxa pi'kxna yuwe'tx çxhab ekaju kasehpkaçx. Sa' kxte ìkh pukate peejxūkweçxa Dxus yakh puutx we'weçxa,

⁶ psxa'dna weçxana'wa barkote khēetha'w. Naapkaçxha' txāawe'sxa' sxawedtxi yatna.

⁷ Kwe'sxa' Tiro çxhabuh barkote u'jçxa, Tolemaida çxhabtetha'w pa'j. Kxte teeçx entha'w ūsu' yakthē'jwe'stxxi weçxana.

⁸ Vxite kuskuskhē' Pablo vxite' txāa yakh u'jusa yā'jçxa kasehtha'w Cesarea çxhabna u'jya'. Kxte pa'jçxa', Fxelipe yatna u'jçxa kxtetha'w deh. Txāa yu' Pedro txhitxhku siete diákono txāatewe'sxku yu' Jesukristo kaapiya'jni's jxpa'gaçxa pta'sxna pekūhsa.

⁹ Txāa Fxelipe' pahz niisa kna'sasak ji'phu', Dxus we'weni's pta'sxsa.

10 Kxte maz en ūspkaçxha', teeçx piçthêj pa'kh, Agabo yaasesa Judea kiwejuwe'sx, Dxus kîh yūuya'watewa dxiikhêy pta'sxsa.

11 Txã' kwe'sxtxi puutx uyçxa', Pablo jx-tudni's pějxçxa peekíçxáa çxida petx kuse yakh ya'jytudçxa na'wêk we'we:

—Dxus Espiritu' pta'sxi'k, Jerusalente judi-
uwe'sxa' naa jxtudni namu's na'wê tudçxa vxite
nasatx dukhetxna jîk.

12 Txã'jîni's wêse'jçxa', kwe'sx vxite
Cesareatewe'sx yã'jçxa wala neevxisxatha'w
Pablo's Jerusalenna u'khamen.

13 Nawa Pablo' na'wêk pas:

—¿Kîjxa'kwe txakwe nxusna ū'ne', adxna
khaawâsxi'j wêeçxa? Adxa' Jesukristo's selpi-
ipa'ga tudniçxáa yuumée, Jerusalente uuwa'j
ma'k yuu nawa txã'sa' ūukhu'çmeeth jîk.

14 Neevxisxaya' âjameeyã'jçxa', Dxus ma'wê
jxthâaste' kxtey yuuna jînaçxáatha'w we'we.

15 Txãa e'su', pheu'jna'wa Jerusalenna u'tha'w.

16 Aça' Cesareate yakhthê'jwe'sx pi'kxna
yuwe'tx, vxite' txãawe'sx yakh teeçx piçthê'j
Çxipre kiwejuwe'sx, wala txaçxyã'j Dxus yakh
fxi'zesa Mnasón yaasesawa yuwe'k. Aça'
kwe'sxa' txajx yatte dejxa'tha'w puutx we'we.

Pablo Jerusalente pa'jçxa Jakobo tasxna u'jni

17 Jerusalente pa'the', kxte yakhthê'jwe'sxa'
wala weçxana jxpa'gatx.

18 Vxite enkhê' Pablo' kwe'sx yakh u'kh
Jakobo yatna pa'jya', aça' kxtea' ancianowe'sx
jxukaysatx ūsu'.

19 Pablo' weçxana jxã'jçxa', pta'sxku judiu ji'jmée vxite nasa ksxavxysuwa Dxus yuwe's pta'sxte', txãawe'sxtxi Dxus ma'wě yũuni'swa jxuka.

20 Aça' wěse'jçxa', Dxusa's wala weçxaçxa na'wětx pta'sx Pablo's:

—Yakhthě'j, idxa' jiiyã'jne'ga judiu ji'jwe'sx wala kuhsa Jesus kaapiya'jni's jxpa'gasa ũsta', sa' txãawe'sxa' Moises leya's nvxihtmeete ewna jĩ'tx.

21 Txãawe'sxa' na'jĩni'sta jiyu: Idxa' judiuwe'sx jxukaysatx vxite kiwe-juwe'sxtxi kaapiya'jçxa Moises jxkaahni's nwěese'jmeene'kwe, sa' i'kwe'sx luuçxtxiwa cirkuncidãimeene'kwe, kĩh yuhnawa kxtey yuuwa'jme', txã'jĩnak pta'sxi' jĩni's jiita'.

22 Sa' iidx pa'jni's jiyuçxa', txãawe'sxa' idxa's wěse'jya' pkhaakhethna, aça' ¿kĩh yũukxtha'w?

23 Wejxwa na'wě yũune'ga: Ayte pahz piçthě'j ũsta'. Txãawe'sxa' Dxus yatte u'kaya' ajawa'ja's Moises ley jxkaaja'k txã'sa' kxtey yuuya' ũsta'.

24 Aça' idxa' txãawe'sxtxi dxuus yatna pe'jna u'jçxa ley jxkaahni ki'swa'ja's kxtey kxu'ju'june'ga petx idx yã'jçxa. Sa' kxte dukhwa'ja'swa idxçxaçxáa deweene'ga. Txajũ' txãawe'sxa' dxkhasa's ktxiidxi'jĩtxna idxwa txã'wěy. Txã'wě leya's kxtey yuute', maawa jiyutxna txã'wě Pablo' leya's nvxiitwa'ja' jĩnak jxkaaja' jĩçxa' ĩsxijja'ne'ta sũhna.

25 Nawa judiu ji'jmée vxite nasaçxawa Jesus kaapiya'jni's jxpa'gasawe'sx yu' ley jxkaahni's kxtey yuuwa'j ji'phmeeta'. Txãawe'sxtxi' kwe'sxa' pta'sxna fxi'jyã'tha'w na'wě yũuwa'ja's:

Dxus ãtximeesatx weçxaya' tajkx ikhni çxiçxa's ã'wa'jme', eenawa ã'wa'jme', tajkxa's thukçxa ikhnisa çxiçxa'swa ã'wa'jme', sa' ptammeesa' pkal yũuna fxi'zewa'jme' jĩna pta'sxnisaçxá's kxtey yuuwa'jsata' jãtx.

Dxuus yatte Pablo's tudni

²⁶ Txajũ' Pablo' txãa pahz piçthẽ'jtx pe'jna u'jçxa', kuskus enkhẽ' ley jxkaahni's jxuka kxtey yuuçxak dxuus yat dxiite u'ka kãh entepkaçx ki'sya'waçxawa txãatx pta'sxya'.

²⁷ Sa' siete en ki'swa'jtx jxuka jxã'jaçpkaçxha', Asia kiwejuwe'sx judiuwe'sx pa'jçxa Pablo's dxuus yatte uyçxa', nasa jxukaysatx kaaũusçxa'jna'wa Pablo's tudçxa

²⁸ na'wẽtx sus we'we:

—Israelwe'sx, mpu'çxwe. Naa piçthẽ'jãik msuuwa jxuka nasa jxukaysatx kaapiya'jna pekũju' kwe'sx ji'jtx açewe'wena, Moises ley-nawa txã'wẽy. Sa' dxuus yatnawa açewe'we'k. Sa' txã'wẽçxáa yũumée, açxha' judiu ji'jmée griegowe'sxtxiwa dxuus yat dxiite ka'gak kazx vxitna jã'tx.

²⁹ Efxeso çxhabuwe'sx Trófximo yakh Pablo' Jerusalente ãste ne'ta uy, txãasatx dxuus yat dxiite ka'ga'jne' sũhçxa txã'jĩna we'we'.

³⁰ Txã'jĩna pta'sxni seena' suste', nasa' wala dud kũhçxa Pablo's tudçxa dxuus yat ekaju wezxnã kutxi'jiçpkaçxha', vxitxa's aphtxi.

³¹ Ikhya'watx yu', nawa komadante' jiyuk Jerusalen çxhãbtewe'sx seena' susna ãsta' jĩni's.

³² Txajũ' komadante' soldau vxite' txãawe'sx pwe'sx jxtuhthesatx pkhakhçxa wuwuuçxáatx

kūh nasa susna ūsnite. Aça' komadante vxite' soldauwe'sxtxi uyçxa', Pablo's ikhmeeta'.

³³ Txajū' komadante kūhçxa Pablo's e'z kade-najuk tudkaah. Txā'wē yūuçxak pějx ¿kimna sa' kīhga yūu? jīna.

³⁴ Nawa nasa txā'wē jxukaysa sus we'wena ūste', komadante jiyuya' ājameeçxa', kuartel yatna jxūna u'khaakh.

³⁵ Kuartel yat vxitxte kūhnaçxáa soldauwe'sxa' Pablo's yakhçxatx u'j, txā'wē nasa' ikh wēesa e'ste neeuna:

³⁶ —Naa piçthē'ja's ikhwa'ja' jīna sus we'wena yuupa'ga.

Pablo kuartel vxitxuh we'weni

³⁷ Pablo's kuartel yatte ka'ga'jaçte', txā' na'wēk we'we griego yuweju komadante's:

—¿Maz yuweçxáawa kwe'we'jmeema'g? jīte', komadante paşçxa':

—Idxa' ¿griegowá'ga?

³⁸ Txā'wēçxa' ¿nyafxíi entey teeçx Egipto-juwe'sx na'wē nasa ikhsaçxaçxáatx kuarto mil āh nasa u'pnimeete pkhakhçxa puui kiisku txāameene'ga? jīte',

³⁹ Pablo' na'jīk:

—Adxa' judiuth. Cilicia kiwete Tarso çxhab jxtuhthesatewe'sxthu. Aça' naa nasatx we'wewa'ja's ūsune'ga jīte',

⁴⁰ komadante' ūythasku. Naapkaçxha' Pablo' kuartel vxitxte yujuna'wa kuseju sxuuna' yu-uwa'ja's pta'sxte', jxuka sxuuna' yuutx, aça' na'wēk we'we hebreo yuweju:

22

¹ —Yakhthē'j vxite' thē'jsawe'sx, mwēese'jwe adx we'weni's jīte',

² hebreo yuweju we'weni's wēse'jçxa', wejxtxi sxuuna' yuu. Txajū' Pablo' na'jīk:

³ —Adxa' judiuth, Cilicia kiwete Tarso çxhabte upxsa. Nawa ayte Jerusalente Gamaliel kaapiya'jni walasaath, kwe'sx yaçgawe'sx leya's wala ew nwēese'jna. Bagaçxtewa Dxusa's ũusuh jxukath selpiina fxi'ze', naa ente i'kwe'sx ma'wēkwe selpi' txā'wēy.

⁴ Adxa' nyafxī' Jesus kaapiya'jni's nwēese'jsatx ahçeçxa kiikhe'jna vxitetxi' tudçxa jxūna u'th piçthē'j petx u'y yā'jçxa karcelte txajxa'.

⁵ Sacerdote npiiçthē'j vxite' judiu nthē'jsawe'sx jxukaysa jiita' txā'wē Jesukristo yakh fxi'zesatx tudwa'ja's Damaskote yakhthē'j judiuwe'sxtxi pta'sxna karta pēyni's. Txā'wē yūuçxath u'j tudçxa ay Jerusalente nuypa'jçxa kastigāyya'.

*Pablo' Dxus yakh fxi'zeyā' utxaaççxa txāa ma'wēne' yūu txā'sna pta'sxni
(Hch 9.1-19; 26.12-18)*

⁶ Nawa adxa' ēepxāh Damasko çxhabte utx-aana pa'jaçpkaçxha', naa dudte ēe walaju eenak kweeth adx dxi'pte uymeenus.

⁷ Aça' kiwega weteeçpkaçxha', na'wēk we'weni pthūuse: Saulo, Saulo, çkīh yūupa'gaga adxa's ahçeçxa pkxuuya' pakwé'? jīte',

⁸ pējxthu: Idxa' çkimga? Txajū' na'wēk pta'sx: Idx na'wē ahçeçxa pkxuuya' pakwe'g txāath Jesus Nasarethuwe'sx jīk.

9 Aça' adx yakh u'jsa' txã'wẽ eena' kweethni's uyçxa wala ùukhtxi. Nawa adxa's we'weni yu'sa' jiyumeeta'.

10 Txajũ' adxa' na'jĩnath we'we: ¿Kĩhga yũu jxthãasu'? jĩte', Kiiteçxa Damaskon me'j, kxte ya'pta'sxina kĩh yũuwa'ja'swa jĩnak jxkaah.

11 Txã'wẽ eena' kweethnijũçxáa uyya' ãjãmeete', adx yakh pi'kxna u'jsawe'sxa' adxa's pu'kisçxa u'jtx Damaskote pa'j.

12 Kxtea' teeçx piçthẽ'j u'pu'k Ananias yaas-esa, Moises leya's jxuka nwẽese'jsa. Txã'wẽ nwẽese'pha'gatx kxte judiuwe'sxa' txãa Ananiasa's wala jxtuhthesa' jĩna we'we'.

13 Txãa Ananiasa' adxa's thegya' pa'jçxa', na'wẽk we'we: Yakthẽ'j Saulo, idxa' uyya' ãjawa'ja's ki' mpa'ga jĩçpkaçxha', thegçxa' uyya' ãjath.

14 Txajũ' na'wẽk pta'sx: Kwe'sx yaçgawe'sxtxi jxpe'jsa Dxusa' idxa's nyafxiiiteyku txhitxh txã'sna nwẽese'jwa'jsa, sa' kĩh pkal yuhwa ji'phmeesa's yafxju uyçxa txajx yuweju we'weni'swa wẽse'jwa'jsa.

15 ãçxha' idxa' naa kiwete jxukaysa dxi'pte Dxus yuwe's pta'sxya' u'jwene'ga sa' ma'wẽçxahne'ga uyna wẽse'jna yuu txã'snawa pta'sxya'.

16 Sa' ¿kĩjxa'çxáa txakwe wala jxthẽeyuuki'g? ãçxhĩ kiitena'wa yu'te ya'bautisãyçxa Jesukristo's ùusuh jxuka miijaykx iidx pkal peltunãyni yuukahn jĩnak jxkaah.

Judiu ji'jmée vxite nasatx Dxus yuwe's pta'sxya' kaahni's Pablo pta'sxni

17 Txãa e'su' Jerusalenna ki' sxawedçxa dxuus yatna Dxus yakh puutx we'weya' u'the', Jesusa' adxa's kxte vxyaaçxa,

18 na'wêk we'we: Jerusalenuh dudçxáa mkaaseh. Txã'wême', idxa' makwe pta'sxtewa nwêese'jmeetxna jïte',

19 na'wêth pas: Adx txã'wê judiuwe'sx pkhaakheni yat-su u'jçxa kxsũ idxna neewe'wesatx karcelte txahna vxitetxi' kxuuphsath.

20 Sa' idxna neewe'wena selpisáa Esteban eea's pkawuuçtewa uynath ũsu', txã'wê yũuni ewna sũhna. Sa' ikhsawe'sx atxhtxi thegsath yu' jïtewa,

21 Jesusa' na'jïnak jxkaah: Me'jçxáa, adxa' jxu'j kaajxa'wath judiu ji'jmée vxite nasatx pta'sxya' jïk.

Pablo's komadante nwe'weni

22 Txã'wê judiu ji'jmée vxite nasatx pta'sxya' jïni's wêse'jçxatx, ki' ũusaçxana na'jïna sus we'we:

—Txãa piçthê'ja's ikhteçxáa ewna. Peena yu' ïtxi fxi'zemeena jï'tx.

23 Txã'wê sus we'wena, txãawe'sx atxhtxi êete wãatahna kiwe's paçççxa txã'wêy yuuteçxáa,

24 komadante' Pablo's kuartel yatte ka'ga'khaahçxa peçxuukwekaakh, txã'wê yũuna khaawãsxijçxak pějxya'wa yu' kïh yũupa'ga nasa' txã'wê wala ũusaçxana ahçetewa jiyuya'.

25 Nawa tuduçpkaçxha', Pablo' na'wêk we'we kpiitana's:

—I'kwe'sxa' romano nasa's peçxujkwete ¿ew-manx? kïh yuuwetewa jiyumey.

²⁶ Txã'wě we'wete', kpiitana' na'wěk pta'sxya' u'j komadante's:

—Na'wě yūuni's mpa'yajkx. Txã'wěme', naa piçthē'ja' romano nasa' jīte',

²⁷ komadante' Pablo tasxte utxaaçxa pějxku:

—Isa idxa' ¿romano nasa dxihgá'? jīna. Aça' Pablo pasçxa':

—Txã'wě íith jīk.

²⁸ Txajū' komadante we'weçxa':

—Adxa' wala vxyu dukhçxaçxáa romano nasa yuuna pa'th jīte', Pablo pasçxa':

—Adxa' upxhíi txãa yã'th yu' jīk.

²⁹ Txajū' Pablo's peçxuukwewa'jsa' kuçx yu-umée nvxihtxi. Aça' komadante yuhwa txã'wě romano nasatewa jiyuçxa', wala ũukhku txã'wě tudpa'ga.

Judiu nthē'jsawe'sx tasxte Pablo's txaahni we'wekahn

³⁰ Judiuwe'sxa' kīh yūupa'gane'ta Pablo's açe' nawa txã'sna jiyu wēeçxa, kuskuskhē' komadante' jxkaakh sacerdote npiiçthē'jwe'sx vxite' judiu nthē'jsawe'sx jxukaysatx pkhaakhekahn. Txã'wě yūuçxak kadenatx khihbçxa txãawe'sx tasxte txah Pablo's.

23

¹ Pablo' sacerdote npiiçthē'jwe'sx vxite' judiu nthē'jsawe'sx pkhaakhesatx thegçxa', na'wěk we'we:

—Yakhthē'jwe'sx, adxa' āçxpkaçx Dxus dxi'pte jxpubath sūhwa'j yu'sa' ji'phmeeth jīte',

² sacerdote npiiçthē'j Ananiasa' Pablo yuwega petxa kaakh pukate ih ũssatx.

³ Aça' Pablo' na'wěk we'we:

—Āateçxáa ew we'weçxa' ũuste yu' ewmée yaakxpaga idxa's Dxus kastigaína. Idxa' ley jxkaahniçxá's kxtey yuusath ¿sũju'gá'? Txã'wěçxa' ¿kĩjxa'ga adxa's petxakaja'? Leya' txã'wě jxkaajaçme' jíte',

⁴ kxte ũssa' na'wětx we'we:

—Dxusna selpisáa sacerdote npiiçthě'ja's txã'wě wěesxuwa'j ji'phmeeg jíte',

⁵ Pablo' pasçxa':

—Dxusna selpisáa sacerdote npiiçthě'jna sũju'çme'ntka. Jiiwaça', txã'wě paswa'jmeene'tka yu'. Txã'wě yuukahmeniik Dxus librutewa na'wě pta'sxi': Iidx çxhabte jxkaahsa's juuna' we'wenu jĩ'k naa pa'ga.

⁶ Txajũ' kxte pkhaakhesawe'sxa' saduceo vxite' fxariseowe'sx txãawe'sxtewa jiyuçxa', Pablo' na'wěk sus we'we:

—Yakhthě'jwe'sx, adxa' fxariseo jĩ'j, fxariseo iĩçxáath. Uusaawe'sxa' ki' itxĩ yuuwa'jsa yuhta' sũhna yaakxsath. Txãa pa'ga yuuçxáa adxa's ewmeesa' jĩna ũsta'.

⁷ Txã'wě we'wete', fxariseo vxite' saduceowe'sx yakh txãawe'sx pwe'sx juuna' we'weçxa puutx txuteetx.

⁸ (Saduceowe'sxa' uusaawe'sxa' ki' itxi yuutxna sũju'çmeeta', sa' uute' nasaa ũus vxite' angeleswe'sx txã'wěsa ũstxna sũju'çwameeta', naapkaçxha' fxariseowe'sxa' txã'wěsa jxuka ũstxna sũju'tx, txãasatx puutx txutee.)

⁹ Txã'wě yũuçxa txãawe'sx pwe'sx wala sustxi ũusçxa we'wena. Aça' fxariseowe'sx ju'gusa

ley kaapiya'jsawe'sx maaíi yu' kiiteçxa na'wētx we'we:

—Naa piçthē'ja' ewméee yūusame'. Meeçxa' Dxus angel wá' yu', meeçxa' uusáa ũus wá' txā'wē vxyaa, nawa jiimeeçxa' kuçx we'wemeeyuga. Txā'wēme', jiimeeçxa' Dxusa's wáa açewe'wesa yu'nja'w jĩ'tx.

¹⁰ Seena' ũusaçxana suste', komadante' Pablo's ikhewáatxna sūhna ũukhçxa soldautx yuukaahçxa, Pablo's kutxi'khaakh pkhaakhesa ksxavxyu kuartel yatnay jxūna u'khan.

¹¹ Txāa kuste', Jesukristo' Pablo's vxyaaçxa na'wēk we'we:

—Pablo, ũukhnu. Ay Jerusalente na'wēg we'we adxna pta'sxna, txā'wēy we'wewa'j ji'phgu Romatewa jĩk.

Pablo's ikhya' puutx we'weni

¹² Kuskuskhē' judiuwe'sx maaíi yu' Pablo's ikh wēesa na'wētx puutx we'we: Pablo's ikhmeeçxa yu' kīh yuhwa ũ'me'nja'w jīna.

¹³ Txā'wē Pablo's ikhmeeçxa yu' kīh yuhwa ũ'ya'mée puutx we'wesa' kuarenta piçthē'j jx-thaakwetx yu'.

¹⁴ Txā'wē yūuwa'ja's puutx we'weçxatx u'j sacerdote npiçthē'j vxite' judiu nthē'jsawe'sx tasxna na'jīna pta'sxya':

—Kwe'sxa' Pablo's ikhmeeçxa yu' kīh yuhwa ũ'me'nja'w jīnatha'w puutx we'we Dxus dxi'pte.

¹⁵ Aça' açxa' i'kwe'sx nthē'jsawe'sx jxuka pkhaakheçxa mpējxwe komadante's: Kuskusa' Pablo's mkaah kwe'sx tasxte, txajx yuwe's

jwee ew paapējx ya'watha'w jīna. Naap-kaçxa' kwe'sxa' ayte pa'jmeyna ikhya' dxi'the yupu'nja'w jī'tx.

¹⁶ Txã'wē puutx we'weçte Pablo npe'sx nçxi'k jiyuçxa', Pablo's pta'sxya' u'kh kuartel yatna.

¹⁷ Aça' Pablo' jiyuçxa', teeçx kpiitana's pa'yaçxa na'wēk we'we:

—Naa luuçxa's meen pe'jna me'j komadante tasxna, txãa yakh puutx we'wewa'j ji'pha' jīte',

¹⁸ kpiitana' luuçxa's pe'jçxa komadante tasxte kūhçxa pta'sxku:

—Karcelte ūssa Pablo' adxa's pa'yaçxa naa luuçxa's pe'jna kaakh, ayte idx yakh puutx we'wewa'j ji'pha' jīte',

¹⁹ komadante' luuçxa's kusete pu'kisna u'jçxa paaçte pējxku:

—¿Kīhga we'we wēje'? jīte',

²⁰ luuçxa' pta'sxku:

—Juidiwe'sxa' na'wēttx puutx we'we: Kuskusa' idxa's pēyi'nja'w Pablo's kaakhan, judiu nthē'jsawe'sx tasxna yuuwe's jwee ew pējxya'watha'w jīçxa.

²¹ Nawa txã'wē dxihna sūhçxa Pablo's kaah-meene'ga. Txã'wēme', piçthē'j kuarenta jx-thaakwesa Pablo's ikhmeeçxa yu' kīh yuhwa ū'me'nja'w jīna Dxus dxi'pte puutx we'weçxa dxi'the yupna ūsta'. Sa' idx ma'jītewa txã'sçxáan ūythasna ūsta' jīte',

²² komadante' luuçxa's na'jīna we'weçxak kaah:

—Komadante's pta'sxthu jīna kim yuhnawa pta'sxmeene'ga jīçxa.

Ne'jwe'sx Fxelix tasxte Pablo's kaahni

23 Txajũ' komadante' e'z kpiitantxi pa'yaçxa Cesarea çxhabna u'jya' pheu'khaakh. Doscientos soldau çxidaçxáa u'jwetxna, jibatewe'sx setenta, vxite' lansa ji'phsa doscientos, sa' ayjxu kase-jetxna kus las nwewete.

24 Sa' txã'wěy Pablo a'jwa'j jibawa pheu'khaakh, ne'jwe'sx Fxelix tasxte ikhmée ew dukhkahn.

25 Txãawe'sx yakh karta kaakh na'wě fxi'jçxa:

26 Klaudio Lisias fxi'jaçthu ne'jwe'sx Fxelixa's weçxana.

27 Naa piçthě'ja's judiuwe'sxa' karcelte txahçxa ikhya'watx yu'. Nawa romano nasatewa jiyuçxa', adxa' soldau yakh u'jçxa nwe'weth.

28 ¿Kĩh yũupa'gaki'tx txã'wě açe'? sũhçxa jxũna u'th judiuwe'sx nthě'jsawe'sx tasxna.

29 Aça' txãawe'sx ley pa'gaçxáata txã'wě açe', nawa ikhya' yu' ājawa'jmeek yu' sa' karcelte txajxa'wa ājawa'jme'.

30 Nawa Pablo's ikhya' yuuçxáa jĩna puutx we'weçxa yupna ũsta' jĩni's jiyuth. Txãasa iidx tasxte kajaçthu. Pablo's açosatxwa we'weth kĩh yũupa'gane'kwe açe' nawa ne'jwe'sx tasxte u'jçxa puutx we'wene'kwe jĩth. Txã'wěçxáath idxa's pta'sxi' jĩnak fxi'j.

31 Txajũ' soldauwe'sxtxi txã'wě jxkaajxã'the', Pablo's pe'jna'wa kusçxáa u'jtx Antípatris çxhabna.

32 Kuskuskhě' soldau çxidaçxáa u'jsa' ki' sxawedtxi kuartel yatna, naapkaçxha' jibatewe'sxa' u'jtx Pablo yakh.

³³ Cesarea çxhabte pa'jçxa', karta's ũsna'wa Pablonawa dukhtxi ne'jwe'sxa's.

³⁴ Txajũ' ne'jwe'sxa' karta's lēeyçxa' pějxku Pablo's: ¿Majũwe'sxga? jĩna. Sa' Cilici-ajũwe'sxtewa jiyuçxa',

³⁵ na'wēk we'we:

—Iidx yuuwe's jiyu'nja idxna açesawe'sx pãatxhĩ'khya' pa'the jĩk.

Txajũ' Pablo's Herodes txaahni yatte kxu-uphku thegwa'jsa txahçxa.

24

Pablo ma'wěsaçxawa Fxelix tasxte we'weni

¹ Tahç ente' sacerdote npiiçthē'j Ananiasa' pa'kh Cesarea çxhabte judiu nthē'jsawe'sx yã'jçxa, sa' teeçx yuwee pu'çxsa Tértulo yaasesa'sku pe'jçxa pa'j. Txãawe'sxa' utxaatx ne'jwe'sx tasxte Pablo' ewmeesa' jĩna pãatxhĩ'khya'.

² Txajũ' Pablo's nuykũhte', Tértulo' Fxelixa's pta'sxku:

—Weçx u'pu'ga, ne'jwe'sx. Iidx jxkaahnite, mteewa wēt fxi'zena ũstha'w.

³ Mteewa txã'wěçxaçxáa wēt fxi'zena ũstha'w, Fxelix idx txã'wē ew yũupa'ga. Txãasatha'w wala weçxá'.

⁴ Nawa idxa's jwee yu' en kaavx-itu'jya'wameeth, dudte meen mwēese'j kwe'sx we'weni's.

⁵ Naa piçthē'ja' iiméh seena' ewmeesatewa kwe'sxa' kpajkxtha'w. Maa kiwesuwa jxuka judi-uwe'sxtxi txuhdena puii kiisna ũsa'. Sa' txãaíi Nasarethuwe'sxa's nwēese'jsa npiiçthē'ja'.

6 Dxuus yatte yuhwa nasa pkalsatx ka'ga'jya'wak yu' kazx vxitna. Txãa pa'ga kwe'sxa' tudtha'w, kwe'sx ley ma'wẽ jxkaathe' kxtey yuuya'.

7 Nawa komadante Lisias kwe'sx yakh ja'da wala juuna' kũhçxa kusa'kh,

8 sa' açesawe'sxa' ne'jwe'sx tasxte pãatxhĩ'khya' u'jwetxna jĩnak jxkaah. Kwe'sx we'weni' ĩsxiinimée jxuka isatewa jiyuya' idx yuu mpẽjx naa piçthẽ'ja's jĩnak we'we.

9 Txajũ' judiuwe'sx kxte ih ũssawa txã' jxuka isasa yuja' jĩna we'wete',

10 ne'jwe'sxa' kuseju pta'sxku Pablo's we'wekahn. Aça' Pablo' na'wẽk we'we:

—Adxa' jiith idxa' wala kuh anxu yã'j kwe'sx kiwete jxkaahna ũsgu. Txãa pa'ga adxa' iidx dxi'pte ũukhmée pasya'wath adx ma'wẽsaçxawa.

11 Idx yuu mpaapẽjx txãawe'sx we'weni' isa dxihtewa jiyuya'. Dxusa's Jerusamente neewe'weya' adx pa'jni doce ençxáa yuuça'.

12 Adxa' txãa doce ensu' dxuus yatte nasatx kaapui'jna judiuwe'sx pkhaakheni yat-su çxhabte msuu yuhwa txã'wẽ yũuna ũsu'çmeeth.

13 Aça' ewmée yũunisa' naata' jĩna áate kaavxya'ja'jya' yu' kim yuhwa ájameetxna naa nasa'.

14 Nawa áateth pta'sxi' Dxus tasxte pa'jwa'j dxi'ja's açxh u'se kaajiyu'jnisa' ĩsxiinisa' jĩ'tx txã'snath nwēese'je' kwe'sx yaçgawe'sxtxi jxpe'jsa Dxusa's selpiina. Sa' txã'wẽ Dxus jxkaahni leyte fxi'jni vxite' Dxus yuwe pta'sxsawe'sx fxi'jnitx jxukath kxtey nwēese'je'.

15 Txãawe'sxwa ma'wēne'ta Dxusa's nwēese'jna yaaki' txã'wēyçxáath adxwa nwēese'jna yaaki'. Uusaawe'sxa' ki' ìtxi yuutxna ewsa ma'tx yuu meeçxa' ewmeesa ma'tx yuu nawa ja'daçxah sūhnath yaaki'.

16 Txãasath Dxus dxi'pte vxite' piçthē'jwe'sx dxi'ptewa yuuwemée fxi'zewa'ja's pa'pçxu'.

17 Adxa' vxite kiwesu maz anxu pekūhna u'juçxa', adx kiwen u'th judiuwe'sxtxi vxyu peesya' kaahnitx dukhna Dxus ofxreda'swa ũsya'.

18 Adxa' txã'wē yūuna ley jxkaahni'swa ki'sna jxã'jçxa dxuus yatte ũspkaçxha', judiuwe'sx Asia kiwejuwe'sx pa'jçxa dxuus yatte uytxi. Nawa nasatx kīh yuhwa kaapui'jna ũsu'çmeeth.

19 Txã'wē uysaawe'sx ayte pãatxhī'khyā' yu-uwa'j jī'phta', adx ewmée yūuna ũstewa uyçxa'.

20 Meeçxa' komadante pkhakhte judiu nthē'jsawe'sx vxite' sacerdote npiīçthē'jwe'sx kxte ũssa i'kwe'sxçxáawa adx ewmée yūuni's uywá'kwe na' mpeeta'sxwe.

21 Adxa' kxte ũsçxa', Uusaawe'sxa' ki' ìtxi yuutxna jīnaçxáath we'we txã'sna wá'kwe ewméek yuu sūju'kx jīk.

22 Fxelixa's ew yā'kh pta'sxni yu', txãasak txã'wēçxáa wēse'jçxaçxáa:

—Komadante Lisias pa'the, txãa yuwe's pheu'ju'nja jīçxa nvxiht.

23 Txajū' Fxelixa' kpiitana's jxkaakh:

—Pablo's txhweetenu. Nawa jwee jxthaakwe juuna' yūumée miipe'j, sa' txajx namikuwe'sx yakh puutx we'wewa'ja'swa mes jīk.

24 Maz en skhēwniite', Fxelixa' txajx nyu Drusila yakh ki' kûhçxa Pablo's pa'ya kaakh, Jesukristo pta'sxni's we'wekahn. Txãa u'ya' judiuk yu'.

25 Aça' Pablo' pta'sxku Dxus dxi'pte ew fxi'zewa'ja', sa' peekx kakwe's ewmée yūuna jxpe'jwa'jme'. Txã'wēme', nmeh ente' Dxusa' kastigaïna jïna we'wete', Fxelixa' wala ũukhçxa na'wēk we'we:

—Ăçxhîi yu' txã'wēçxáa mpeeta'sx. Vxite ente adx en ji'phuçxa ki' pa'ya'nja jîk.

26 Pablo' vxyu dukhe'nja txhwetekahn jïwáana sũhçxak txã'wē maz uswa pa'ya Fxelixa' txãa yakh puutx we'weya'.

27 Txã'wē e'z anxupkaçx Pablo's karcelte jxpe'jna ũsçxaçxáa Fxelixa' ne'jwe'sx kasejk, aça' vxite ne'jwe'sx Porcio Fxestok u'ka. Nawa Fxelixa' judiuwe'sx yaaçeni fxi'ze wēemeexça, Pablo's karcelte nvxihtku.

25

Pablo' Fxesto tasxte we'weni

1 Txajũ' Fxesto' Cesarea çxhabte ne'jwe'sx u'kaçxa', tekh ente' Jerusalenna u'kh.

2 Kxte' sacerdote npiiçthē'jwe'sx vxite' judiu jxtuhthesawe'sxa' utxaatx Pablo' ewmeesa' jïna pãatxhî'khya'.

3 Sa' Pablo's pe'jya' mkaah Jerusalenna yuukahn jïnatx pējx. Txãawe'sx yu' dxi'the ikhya' sũhçxatx txã'wē pējx.

4 Nawa Fxesto paççxa':

—Pablo' Cesareate preesu ũsa'. Aça' maz enteçxáa adxa' txãa çxhabnaïi u'jweçthu.

5 Txãasath na'jĩ: Txãa piçthê'j ewmée yũuni's pãatxhĩ'khwa'j ji'phçxa', i'kwe'sx jx-tuhtesawe'sxa' adx yakh yuwetxna Cesarea çxhabna jĩk.

6 Fxesto' Jerusalente oçxo en jxthaakwe ũsçxaçxáa ki' sxawedku Cesarea çxhabna. Sa' kuskuskhê' yuwe paapëyni yatte u'kaçxa kaçxna'wa, Pablo's yuukaakh.

7 Sa' kũjuçpkaçxha', judiuwe'sx Jerusalenuh pa'jsawa utxaatx kĩhtewa seena' ewmeesa' jĩna pãatxhĩ'khna. Nawa isasa yuja' jĩna äate kaavxya'ja'jya' yu' äjameeta'.

8 Txajũ' Pablo' na'wêk pas:

—Adxa' kĩhte yuhwa yuwemeeth. Judiuwe'sx ley, Dxus yatna, Romate jxkaahsa Cesar maate yuhwa yuwemeeth jĩte',

9 Fxesto' judiuwe'sx yakh ewte neeyũ wêeçxa na'wêk pëjx Pablo's:

—¿Jerusalenna u'jwêega' iidx yuwe's kxte pheu'khan? jĩte',

10 Pablo pasçxa':

—Adx yuwe's pheu'jwa'jsa tasxte yã'j ũsthu, Cesar ki'pni iidx tasxte. Adxa' judiuwe'sx yakh kĩhte yuhwa yuwemeetewa idxa' ew jiig.

11 Meeçxa' adx uuwa'the ähwáane'tka yu-uwe yuu aça' txã'wête yu' uuwa'ja's wa'lme'nja. Nawa pãatxhĩ'khnisa kĩh yuhwa isameete yu', kim yuhwa pãatxhĩ'khsa kusete adxa's dukhya' äjameena. Wejxwa Cesar paapëyni wejx ewna jĩte',

12 Fxesto' vxite npiiçthê'jwe'sx yakh puutx we'weçxa', na'wêk pta'sx Pablo's:

—Cesar paapěyni wejx ewna jĩ'g na' txajx tasxte pa'j u'jwene'ga jĩk.

¹³ Txajũ' maz en skhěwniite', jxkaahsa Agripa vxite' Berenice yakh Cesarea çxhabte pa'jtx Fxesto's weçxaya'.

¹⁴ Kxte kuh entxi ũsu', aça' Fxesto' jxkaahsa's pta'sxku Pablo yuwe's:

—Ayte teeçx piçthě'j preesu ũsa', Fxelix nvxi-itni.

¹⁵ Adx Jerusalente ũste', sacerdote npiiçthě'jwe'sx vxite' judiu nthě'jsawe'sx pãatxhĩ'khtxi txãa piçthě'ja's ewmeete nvxiitkahn.

¹⁶ Aça' adxa' pta'sxthu: Romanowe'sx leya' maa yuhnawa ikh kaja'çme', pãatxhĩ'khsa yu-uwesa yakh kaapdxip'u'jçxa kim yuuwetewa jiyumey yu'.

¹⁷ Txajji adxa' jxthěeyuumée pãatxhĩ'khsawe'sx pa'jaçpkaçxa', kuskuskhě' yuwe paapěyni yatte u'kana'wa txãa piçthě'ja's yuukaath.

¹⁸ Sa' ¿kĩh yũupa'ga yuuwekx? sũhna ũythasath u'pu', nawa pãatxhĩ'khya' utxas-aawe'sxa' ma'wě yuhwa ewmeete nvxiht-ya' ãjawa'jmeesaçxáanatx we'we.

¹⁹ Txãa piçthě'ja's açesawe'sxa' txãawe'sx Dxusa's neewe'wena fxi'zeni vxite' teeçx piçthě'j Jesus yaasesa uuçxawa ki' itxi yuuk jĩna Pablo pta'sxni'sçxáatx we'we.

²⁰ Txãa yuwe's adxa' ma'wě pheu'jya'wa ãjameeçxa', Pablo's pějxthu: ¿Jerusalenna u'j wěega' kxte iidx yuwe's pheu'khan? jĩna.

21 Nawa txãa we'weçxa': Cesar paapëyni wejx ewna jĭk, aça' txã'wë yã'the', aytee preesu ũsune'ga Cesar tasxte adx kaahpkaçx jĭnath we'we.

22 Txajũ' Agripa' na'wëk we'we Fxesto's:

—Txã'wëyã'the', wëse'je'nja txãa piçthë'j we'weni's jĭte', Fxesto paçça':

—Kuskusii wëse'jene'ga jĭk.

23 Kuskuskhë' jxkaahsa Agripa vxite' Berenice vxite' soldau npiçthë'jwe'sx vxite' çxhabte jx-tuhthesa txãawe'sx yakh seena' zhiçxkwe susna u'kana kũhtx Fxesto u'pnite. Naapkaçxha' Pablo's yuu kaahçxa',

24 Fxesto' na'wëk we'we:

—Jxkaahsa Agripa vxite' ayte pkhaakhena kwe'sx yakh ũssawe'sx ksxavxYTE txajaçthu naa piçthë'ja's. Judiuwe'sx maazkuëesawa naa piçthë'ja's açewe'we'tx Jerusalente vxite' aytewa, sa' ikhteçxáa ewna jĭna nestxi yu'.

25 Nawa txã'wë ikhkahnwa kĭhtewa yuuwe-meena'k thegu'. Nawa txãaíik Cesar paapëyni wejx ewna jĭ'. Aça' txajx tasxna kaja'nja sũju'th.

26 Nawa kĭhte yuuwetewa txã'sna pta'sxna jxkaahsa's fxi'jwa'j yu' uymeeth. Txãasa açxha' jxkaahsa Agripa iidx tasxte txajaçthu, vxite' jxukaysa dxi'pte, aça' idx paapëjçxça kĭhte yu-uwetewa kpajkxçxa pta'sxte adxa' eça's fxi'jçxa kaja'nja.

27 Txã'wëme', kxulna'k thegu' preesu kaahçxawa yuuwe yuuni's pta'sxmeete '.

26

Pablo' txajx yuwe's jxkaahsa Agripa's pta'sxni

1 Txajũ' Agripa' na'wêk Pablo's we'we:

—Idx kîh yũuna fxi'zeçxawa mpeeta'sx jîte', Pablo' kuse's kiisçxa na'wêk pta'sx:

2 —Judiuwe'sxa' adxa's ewmeesa' jĩnatx pãatxhĩ'khe' txã'sa' jxkaahsa Agripa iidx dxi'pte ãate pta'sxwa'ja's ji'phuçxa' wala weçxa'th.

3 Idxa' jxuka ew jiig kwe'sx judiu ji'j fxi'zeni vxite' na'wê fxiyfxiyçxah yajkçxa puutx we'we'tha'w txã'sna. Txãasa wejx wa'lmée mwēese'j.

Kristo's jxpa'gamey Pablo fxi'zeni

4 Adx le'çxkuējũjx ma'wēne'tka fxi'ze adx kiwete vxite' Jerusalente txã'sa' judiuwe'sx jxukaysa jiita'.

5 Fxariseowe'sxa' seena' juuna' jxkaaja'tx Dxus leya's jxuka kxtey yuukahn adxa' txãatewe'sxthu yu' piçtakxtey, aç'a' txãawe'sxa' jiita' na' txã'sa' pta'sxya' ājatxna wa'lmeeçxa yu'.

6 Dxusa' kwe'sx yaçgawe'sx yakh puutx we'weçxa uusaawe'sxtxi ki' itxĩ vxit-ya' neeyũuk txã'sa' kxtey yuuna sũhnath fxi'ze', naa pa'ga yuuçxáatx paapējxya' ayte nuypa'j.

7 Jxkaahsa Agripa mjiyu: Israelwe'sx doce-sate ji'j jxukaysatx ki' itxi yuuwa'ja's ũythasu', txãasatx een isa petx kus Dxusa's selpi'. Txã'wê yũuwa'ja's ũythaspa'ga yuuçxáatx judiuwe'sx adxa's ewmeesa' jĩçxa açe'.

8 Dxusa' txã'wê uusaawe'sxtxi itxi vxituna ¿sũju'çmeekwe' wakx i'kwe'sxwa'?

Dxus yakh fxi'zesatx pkxuuni's pta'sxni

9 Adxa' nyafxíia' Jesus Nasarethuwe'sxa's ahçeçxa kíhwa yu'nja sũhçxa,

10 Jerusalente sacerdote npiiçthê'jwe'sx jxkaathe', Jesus kaapiya'jni's nwêese'jsawe'sx maazkuêesatxwa karcelte txahth. Sa' ikheçte uyçxa', ew yuh yuuçta' sũhnath fxi'ze'.

11 Maazkuêe uswa iipkxuuth, Jesus yase's açewe'wekahn. Msuuwa judiuwe'sx pkhaakheni yat-su txã'wêçxaçxáath yuu. Sa' seena' pxũuskwe yuute', vxite kiwesuwa u'th, txã'wêy ahçeçxa pkxuuya'.

*Pablo' Dxus yakh fxi'zeyá' utxani's ki' pta'sxni
(Hch 9.1-19; 22.6-16)*

12 Txã'wê yũuya' sũhçxa, Damasko dxi'j u'jweçthu yu', sacerdote npiiçthê'jwe'sx kaahni.

13 Nawa jxkaahsa mwêese'j: dxi'the u'jweçte êepxãh yuuçpkaçxa', sekte jxthaakwe eena'sa êejũ kweethku adx vxite' pi'kxna yuusáa jxukaysatx.

14 Txajũ' jxukaysa wetetha'w, naapkaçxa' adxa' wêse'th hebreo yuweju na'wê we'weni's: Saulo, Saulo, ¿kíjxa'ga adxa's ahçeçxa pkxuuya' pakwé'? Idxa' peekíçxáa ya'kpã'yuuwa'ja's pakwena ũsgu jíte',

15 pějxthu: ¿Idxa' kimga? jíte', pta'sxku: Adxa' Jesusthu, idx na'wê ahçeçxa pkxuuya' pakwe'g txãath.

16 Nawa açxha' mkiite. Açxh na'wê vxyaath sa' vxite entewa vxya'nja, açá' txã'wêk vxyaá jína mteewa pta'sxya' u'jwene'ga adxna selpiina.

17 Idxa's nwe'we'nja judiuwe'sx kuseju, sa' judiu ji'jmée vxite nasa kiwesu kajaçthu kxsũwa nwe'we'nja.

18 Txãawe'sx tasxsu kajaçthu, aç'a idxa' txãawe'sx yafxtxi phaadene'ga, peena yu' çxhi'dxte fxi'zemée eena'sa's uykahn, sa' eçxthē'j kusete fxi'zemée Dxus yakh fxi'zekahn. Adxa's jxpa'gasa' txãawe'sx pkaltxi peltunäyñi neeyũuçxa cielute ũswa'ja's jxpa'gatxna Dxus txhitxhnisawe'sx yakh ja'daçxah jĩk adxa's.

Pablo's Kristo vxyaaçxa jxkaahni's kxtey nwēese'jni

19 Agripa, idxa'sthū pta'sxi': Txã'wē vxyaaçxa we'weni's wa'lmée kxtey nwēese'jçxa

20 Damaskote ũssawe'sx khuē'ytxi pta'sxthū Dxus yuwe's, e'su' Jerusالente, vxite' Judea kiwesu jxuka. Sa' judiu ji'jmée vxite nasatxwa pi'kxthū, pkaltxi nvxihtçxa Dxusa's pakweçxa ew yũuna mfxi'zewe jĩna.

21 Txã'wē yũupa'gatx judiuwe'sxa' dxuus yatte adxa's tudçxa ikh wēe.

22 Nawa Dxus pu'çxte', açxpkaçx Dxus yuwe's le'çxkwe yuhwa jxpubameeth pta'sxna fxi'ze' jxtuhthesa ma'tx yuu ma'wēsatsxwa jxukaysatx. Sa' Dxus yuwe pta'sxsawe'sx vxite' Moises pta'sxni txãaju bagaçxte yuhwa fxiy yu' pta'sxi'çmeeth.

23 Txãawe'sxa' na'wētx pta'sx: Dxus tasxuh yuusa Kristo' wala pxthaa yuuçxa uuçxawa ki' txãa khuē'y i'txĩ yuuna, sa' eena'te fxi'zewa'ja's pta'sxina kwe'sx ji'jtx txã'wēy vxite kiweju

nasatxwa jīnatx pta'sx. Txā'wēyçxáath adxwa pta'sxi'.

Pablo' Agripa's Kristo tasxte kuutxa'ja'jdxijk

²⁴ Pablo txā'wē we'wete', Fxesto' na'jīnak sus we'we:

—Pablo, luuku yuunig. Jwee wala piyaçxane'ga txā'wē luuku yuu jīte',

²⁵ Pablo pasçxa':

—Ne'jwe'sx Fxesto idxa' mjīyu: Adxa' luukumeeçxa íith ũus yajkxçxa jxpubamée isasaçxáana pta'sxi'.

²⁶ Txāa yuwe's jxkaahsa Agripa ayte u'pa' txāawa ew jiia'. Txāa pa'gath adxa' thaamemée pta'sxi' txajx dxi'pte. Naa yuwe' paaçte sūthçxa we'wenisame'. Txāa pa'ga jxkaahsawa txāa yuwe's ew jiina sūju'th.

²⁷ ¿Dxus yuwe pta'sxsawe'sx we'weni's ew jīyuhmeegá' wakx, jxkaahsa Agripa? Idxa' jīyuhne'ga sūju'th jīte',

²⁸ Agripa' na'wēk we'we:

—Adxa's Kristo ju'gu vxit-ya' le'çxkuēeg pejí jīte',

²⁹ Pablo we'weçxa':

—Le'çxkuēe ma'k pejí meeçxa' wala ma'k pejí nawa idxçxáamée, ayte açxh wēse'jna ũsta' txāawe'sx jxukaysatxku Kristo ju'gu yuu jxthāasu' Dxusa', adxwa ma'wētka Kristo ju'gu yuu txā'wēy, nawa kadenaju tudnimée.

³⁰ Pablo txā'wē we'wete', jxukaysa kiitetx, jxkaahsa, ne'jwe'sx, Berenice kxte ih pa'jsa jxuka.

³¹ Sa' fxiitx txuteena u'j, na'jīna puutx we'weya' txāawe'sx pwe'sx:

—Naa piçthē'ja' kīh yuhwa yuuwemeesa' ikhkahn yuuwa. Sa' karcelteçxáa yuhwa ũswa'j ji'phme' jīçxa',

³² Agripa' na'wēk we'we Fxesto's:

—Txā'wē txāái Cesar paapēyni wejx ewna jīmeewaça', naa piçthē'ja's txhweteya' ewna jīk.

27

Pablo's Roma çxhabna kaahni

¹ Italia kiwen kwe'sxtxi kaajxa' puutx we'weyā'jçxa', Pablo vxite preesu yā'jçxa dukhtxi Batalxón Augusto yaasesate kpiitan Julio kusete.

² Txajū' Adramitio çxhabte barko Asia kiwen u'jsate khēetha'w, aça' Aristarkowa yuwe'k, Macedonia kiwete Tesalónika çxhabtewe'sx.

³ Kuskuskhē' Sidón çxhabte pa'tha'w. Açá' kpiitan Julio' Pablo's namiku yat-suk pa'jya' kaah txāawe'sx sã'jīkahn. Txāa kpiitana' Pablo yakh wala ewsa yu'k, txāasak txā'wē yūu.

⁴ Sidón çxhabuh kasehçxa', Çxipre kiwe's jebu ju'gutha'w nvxihtna khēw, wejxa yuppa'ga.

⁵ Txajū' Cilicia Panfxilia kiwesu utxa skhēwna u'jçxa, Lisia kiwete Mira çxhabtetha'w pa'j.

⁶ Kxtea' soldau kpiitana' teeçx barko Alejadri-ajuwe'sx Italia kiwen u'jsa'sku uy. Sa' kwe'sxtxi kxtek kaateka'j txajū ki' u'jya'.

⁷ Nawa txā'wē wejxa yupna ũste', wala kuh en tuudkuēçxah u'jçxa, wala thēy pa'tha'w Gnido çxhab dxi'pte. Txajū u'jçxa', Salmon kiwee dxi'psutha'w skhēw, Kreta kiwesu ta'guna.

⁸ Sa' txãa kiwe pukasu wala thëy u'jçxa, teeçx ahte pa'tha'w Bwenos Pwertos yaasesate. Txã' Lasea çxhab utxatek neeyũ'.

⁹ Txã'wë thëy u'jçxa wala en ivxiitpa'ga, nus pa'jwa'j en utxaak ìkhte u'jwa'j seena' ùukhũukhsa. Txãa pa'gak Pablo' yu'kxpeh

¹⁰ na'jĩna:

—Jxukaysa mwëese'jwe, kwe'sx u'jwa'ja' wala ùukhũukha'. Barko petx karga vxituna, açá' kwe'sxwa uuwa'ja's ji'phuwá'nja'w.

¹¹ Txã'jítewa, soldau kpiitana' Pablo's nwëese'jmée barko namu vxite' barko thegsawe'sx we'weniçxá'sku nwëese'j.

¹² Kxte çxhaba' nus ente ùswa'j ewmeek yu'. Txãa pa'gatx jxukaysa u'jya' yajkx Kreta kiwete Fxenice çxhabte pa'jçxa nus ena's kxte yu'skhëwya' sũhçxa, Fxenice çxhabte' nus ente ùswa'j ùukhũukh meek yu' naa pa'ga.

Mar pxãhte wejxaa wala kiiteni

¹³ Bwenos Pwertos yaasesajũ kasejeçte yu', we-jkuëçxáak wejxana ùsu', açá' Fxenice çxhabte pa'jya' ãjawá'nja'w sũhçxa u'jtx Kreta kiwe pukasu tuudkuëçxah.

¹⁴ Nawa wejkuë u'jweçpkaçxha', wejxaa wala kwe'sx u'jwa'j dxi'puh sêhçxa barko's yupku.

¹⁵ Sa' txajyũyã'ja' ma'wëwa jxũna u'kh. Açá' barko's kaajxa' ãjameeyã'jçxa', kuçx yuumeetha'w wejxa ma'wëwa jxũna u'khan.

¹⁶ Ìkh pxãhte kiwe le'çxkuësa Klauda yaasesa e'ssutha'w skhëw, kxsũa' wejxa txakwe çxhãçxhameek ùs yu'. Açá' barko le'çxkuë

jxũçxa u'jnisa's wala thëyçxáawa kaateka'jya' ãjãtha'w barko walate.

17 Txajũ' barko wala's lasu walaju pxãjũjx tudtha'w suweekahmen. Sa' txitx wala Sirte yaasesate wáa waçuya' u'jwena sũhna ũukhçxa, êete tela wala's spajkxtxi wejxa ma'wëwa barko's jxũna u'khan.

18 Txã'wë wejxa seena' çxhãçxha ũste', kuskuskhë' karga's ìkhkhë pũsxya' takhtxi.

19 Aça' tekhn en yuuçte', kwe'sxíwa ìkhkhë pũsxya' pu'çxtha'w barko êseekahn.

20 Txã'wë wejxa seena' yuuna ũste', sek, estrelxa, kîh yuhwa vxyaameeta' maazkuëe enwa. Aça' kwe'sx yuuwa ìtxĩ yuume'nja'w sũhwa'ja'sçxáatha'w jì'phu'.

21 Txã'wë maazkuëe en kîh yuhwa ũ'mée yuhna ũssatx Pablo' na'wëk we'we:

—I'kwe'sxa' adx we'weni's nwëese'jçxa Kreta kiwejũ kasehmeewaça', na'wë nxus knayna ivxi-ituwa'jmeene'tka'w yu'.

22 Nawa ãçxha' ũukhnuwe. Ayte u'jsa kim yuhwa uumeetxna, makwe barko yu' suweeçxa vxitutewa.

23 Adxa' Dxusna selpisaath, aça' ãçxh kus Dxus angel vxyaaçxa

24 na'wëk we'we: Pablo, ũukhnu. Idxa' Romate jxkaahsa tasxte utxaawa'j jì'phgu, aça' txãa pa'ga Dxusa' nwe'weya'wa' ay barkote u'jsa jxukaysatx jìk.

25 Txãa pa'ga i'kwe'sxa' ũukhmée çxhãçxha miijajkxwe. Adxa' Dxusçxáanath yaaki', angel we'weni' kxtey yuuna sũhna.

26 Sa' ìkh pxãhte kiwe le'çxkuẽsate nvxiitni yu'nja'w jìk Pablo'.

27 Adria ìkhthe wejxa jxūna u'jni e'z ki'su ājaçte', txāa kuspāh yuuçpkaçha', barkote thegsawe'sxa' kiwe utxasu u'jweççxatx jiyu.

28 Sa' makhwe ìkh dxiitewa jiyuya' isatx, açà' treinta y seis metroçxáak dxii yu'. Txajū' yaç yaçte u'jçxa ki' isatx, açà' kxtea' weintisiete metroçxáak dxii yu'.

29 Txajū' penxate wáa iika'nja'w sūhna ũukhçxa, barko's neewewa'jsa pahz çam walatx ìkhkhẽ akh barko e'skhẽ, wejxa jxūna u'khamen. Sa' wala ũukhna ũythastxi khijxpxkaçx.

30 Naapkaçha' barkote thegsawe'sxa' barko yaçkhẽ vxite çam walatx ìkhkhẽ akheçtha'w jīnaçxáa barko le'çxkuẽ's ìkhkhẽ spaakiçtxi yu', txāate khẽeçxa kasehna u'j wẽeçxa.

31 Nawa Pablo' pta'sxku soldau kpiitan vxite' soldauwe'sxtxi:

—Naawe'sxa' barkojū kasehna u'the', i'kwe'sxa' ìtxi yuumeene'kwe jīte',

32 soldauwe'sxa' barko le'çxkuẽ tudni lasutx spẽ'thçxa ìkhkhẽ wāatahtx barko le'çxkuẽ's.

33 Txajū' Pablo' kusíitey neewe'wek jxukaysatx kīhçxáawa ũ'kahn:

—I'kwe'sx dehmée txã'wěy ũ'wamée ũsni e'z ki'su yã'j yuuçà'.

34 Açà' i'kwe'sxtxi neewe'we'th kīhçxáawa ũ'kahn. Txã'wěme', kasejxa' ya'çxhãçxhameena. ãçxha' ũukhnuwe. I'kwe'sx maa yuhwa vxitumeene'kwe.

³⁵ Txã'jĩna'wa, Pablo' jxukaysa dxi'pte Dxusa's weçxaçxa pana's ũ'k.

³⁶ Txajũ' jxukaysa wejx ũukhmée txãawe'sxwa ũ'tx.

³⁷ Barkote u'jsa jxukaçxah yu' doscientos setenta y seis nasatha'w yu'.

³⁸ Kĩh ũ' wēeçxawa txã'sna ũ'na jxã'jçxa', skuutxha's ìkhkhě pūsxtha'w barko jweeĩçxáa ēseekahn.

Barko ìkh dxiikhě khěeni

³⁹ Khijxna jxã'jnite', barkote thegsawe'sxa' jiyumeeta' maa kiwete pa'jçxawa. Nawa ìkh pukasu kiwe ukwesa u'pte uyçxa', kxte nuypa'jya' ājāwá'nja'w sūhçxa kxtetx u'jya' yajkx.

⁴⁰ Sa' çam wala ìkh dxiikhě akhnisa lasutx spē'thna'wa, tela's ēete ki' kiisçxa, barko's tuudkuēçxah jxūna u'jtx ukwete pa'jya'.

⁴¹ Nawa teeçx ahte ìkh jwee yu' dxiimeete yu' seena' çxhãçxha ukapajxna ũsu'k kxtek kũjxa' u'j barko'. Aça' barko ìçha' kiwete waçuna kũhte', ma'wě yuhwa ēseme', naapkaçxha' barko e'su yu'tũçxhasáa ujkana kũhçxa jxuka suwuuçku yu'.

⁴² Txã'wě yuuçte', soldauwe'sxa' preesutx jxuka ikhya'watx yu', pehdna kasehçxa iyuwe'sxte.

⁴³ Nawa soldau kpiitana' Pablo's nwe'weya' yajkxku, sa' kiikhe'jmeeçxa na'wěk jxkaah:

—Maawa pehdxa' jiisa' i'kwe'sx khuē'y yaçte me'jwe,

⁴⁴ naapkaçxha' vxite' taplasu mkhēewe, meeçxawa barko pe'lasu txã'wě yũuçxa

mkaasehwe jĭte', txã'wě yũuçxa jxukay kiwete pa'tha'w uumée.

28

Malta kiwete Pablowe'sx pa'jni

¹ Kxte jxukaysa uumée pa'jçxatha'w jiyu txãa ĭkh pxãhte kiwe' Maltaga yaase yu'.

² Kxte u'psa nasa' kwe'sxtxi wa'lmée jxpa'gaçxa, ipx wala yuthçxa kwe'sxtxi bajçxya' pi'kxtxi, nus txã'wě wala pa'jna ũspa'ga.

³ Txajũ' Pablo' e'kx uhdx pkhakhçxa, ipxte ãsxiçku yu', naapkaçxha' txãa ipx pxãjũ ul weeswee ũphna kasehçxa Pablo kusetek wa'kx.

⁴ Txã'wě Pablo kusetek ul wa'kxte', kxte ũssa' na'wětx we'we txãawe'sx pwe'sx:

—Naa piçthě'ja' nasa ikhsana. Makwe ĭkhte yu' uumeetewa, Dxusa' ĭtxi u'ju jxthãasmeene' jĩ'tx.

⁵ Aça' Pablo' kuse's yahtaçxa ula's ipxkhě akhku, nawa txajx kuse yu' kĭhwa yuume'.

⁶ Aça' nasa thegna ũssa yu' ¿Ma'wěn uukx? sũhna jxukaysa ũythasnatx ũsu'. Nawa kĭhwa yuumeyna wala txaçx yuute':

—Pablo' nasa ikhsamée wejxwa Dxusna jĩ'tx.

⁷ Txãa kiwete teeçx ne'jwe'sx jxtuhthesa u'pu'k Publio yaasesa. Txajx uuthasx ja'datetka'w pa'j kwe'sxa', aça' txãa piçthě'ja' kwe'sxtxi wala ew jxpe'kh tekh enpkaçx.

⁸ Txãa ensu' Publio neya' aça'naga ũsu' kakwesekte eeçxãa uçxi'çxçxa. Aça' Pablo' thegya' u'jçxa, peekizeçxa Dxus yakh puutx we'wete', çxhãçxhak.

9 Txajũ' txãa kiwete vxite âça'sawe'sxwa pa'jçxa', jxuka katxhiçxatx neeyũu.

10 Txajũ' kwe'sxtxi wala peeygãhçxa kījkihwa dxi'the peejini's jxukatx pees, barkote khêeçxa ki' u'jya'wagaçxha'.

Roma çxhabte Pablo pa'jni

11 Malta kiwete tekh a'te ûşçaçxáa, Alejadría kiwejuwe'sx barko kxte ũsu'k nus pīipkaçx txãate khêeçxatha'w u'j. Txãa barko' yaçte e'z dxus itximeesatxku piisani ji'phu', Kastor vxite' Polux yase ji'phsa.

12 Txajũ kasehçxa', Sirakusa çxhabte pa'jçxa, tekh entha'w ũsu'.

13 Txajũ ki' u'tha'w kiwe pukagaçxaçxáa, sa' Regio çxhabtetha'w pa'j. Kuskuskhê' e'su wejxa sêhte', thêymée u'jya' âjaçxa e'z enkhê' Puteoli çxhabte pa'tha'w.

14 Kxtea' puutx uytha'w yakhthê'jwe'sxtxi, aç'a' txãawe'sxa' pi'kxtxi txãawe'sx yatte teeçx ki'su ũskahn. Txajũ kasehçxatha'w Roma çxhabna u'j.

15 Romate yakhthê'jwe'sxa' kwe'sx yuhtewa jii yã'tha yu', sa' teeçx ahte Tres Tabernas yaasesa utxate teeçx çxhab ũsu'k Fxoro de Apio kx-teta pu'thegya' yuwé'. Aç'a' Pablo' txãawe'sxtxi uyçxa', Dxusa's wala weçxana ũuste wêt wêtku yajkx.

16 Romate pa'jna'wa, soldau kpiitana' vxite preesutxi' dukhku kxte karcelte thegsa npiiçthê'ja's, nawa Pablo yu'sa' vxite yatte fxiik txah teeçx soldau thegwa'jsa txahçxa.

Roma çxhabte pa'jçxa Dxus yuwe's pta'sxni

¹⁷ Kxte pa'jni tekh en skhēwniite', Pablo' pa'ya kaakh kxte Romate judiu npiiçthē'jwe'sxtxi. Sa' pkhaakhete', na'wēk we'we:

—Adxa' kīhwa ewméee yu' yūumeeth judiuwe'sxtxi, sa' kwe'sx yaçgawe'sx kaapiya'jni'swa ahçena fxi'ze'çmeeth. Makwe txā'wētewa, Jerusalente adxa's tudçxa romanowe'sxtxi dukhtxi.

¹⁸ Aça' romanowe'sxa' paapējxtxi, nawa ewméee yūuni's yu' uymeeçxa', adxa's txhweete wēetx ikhwa'the nvxiht-ya' yu' ājameeçxa.

¹⁹ Txā'wētewa, judiuwe'sx yu' kaatxh-wete'jmeeta'. Aça' txā'wē yā'the', adxa' romanowe'sxtxi jxkaahsa Cesara'sthu pi'kx adx yuwe's paapēykahn. Nawa judiuwe'sx adxna preesu'jsa yuutxi' pāatxhī'khya'wameeth.

²⁰ Txāasath i'kwe'sxtxi pa'ya txā'jīna pta'sxya'. Israelwe'sxa' ūythasu'tha'w Dxus tasxuh yuusa Kristo's txāa pa'ga yuuçxāa adxa' na'wē kadenaju tudni ūsthu.

²¹ Txā'wē pta'sxte', na'wēt x we'we:

—Judeajū idxna nuywe'wena kaahni karta kīhwa iijxpa'gameetha'w kwe'sxa', txajū judiuwe'sx pa'jçxawa pta'sxi'çmeeta' idxa's açewe'weni yu'sa'.

²² Āçxh u'se pta'sxni's mteewa jxukatx açewe'we', aça' txā'sa' idxa' ¿maa sūju'ga? Iidx yaakxni's jiyu wēetha'w jīçxa',

²³ vxite ente ki' pa'jya' neeyūuçxa txāa en āhte', wala kuh pkhaakheçxa pa'jtx Pablo ūsni yatte. Aça' Pablo' kusīi pta'sxçxa kusna kīhpkaçxku pta'sx Dxus jxkaahwa'ja's. Sa' Moises fxi'jni ley vxite' Dxus yuwe pta'sxsa

txãniiteywe'sx fxi'jni ma'wẽçxahne'ta Jesusa's we'wena fxi'j txã'snak ãate kaajiyu'j.

²⁴ Aça' maai' yu' Pablo pta'sxni's wa'lmeetx jxpa'ga, nawa vxite yu' wa'ltxi.

²⁵ Txã'wẽ maai' yu' nwẽese'j wẽemeeçxa tx-uteena u'jweçte', Pablo' na'wẽk txãawe'sxtxi we'we:

—Dxus yuwe pta'sxsa Isaiasa's Dxus Espiritu kwe'we'the', isa yuh na'jĩna pta'sxne' kwe'sx yaçgawe'sxtxi':

²⁶ U'jçxa txãa nasatxi' na'jĩna mpeeta'sx:

I'kwe'sxa' wẽse'jçxawa, jiyumeene'kwe.

Meeçxa' uyuwá'kwe, nawa jiyumeene'kwe.

²⁷ Txãa pa'gatey txãawe'sx ũuste jiyuwa'j yu'sa' ji'phmé yã'tha',

Sa' wẽse'jya'wa wa'lu'tx.

Txãawe'sx yafxá' aphanita', uymeeçxa' nwẽese'jmeetxna.

Sa' ũustewa ew jiyumeetxna.

Sa' adx tasxtewa utxameetxna pkaltxi pel-tunãykahn jĩnak we'we.

²⁸ I'kwe'sxa' mjiyuwe: Åçxhũyã'ja' Dxus ewte nvxiitwa'ja's judiu ji'jmée vxite nasaçxáatx pta'sxwa'ja', aça' txãawe'sxa' nwẽese'jetxna.

²⁹ Txã'wẽ Pablo we'wete', judiuwe'sxa' txãawe'sx pwe'sx wala kuh jwed we'wena u'jtx.

³⁰ Pablo' e'z anxu utak yat pki'jçxa txaahni ũsu', sa' kxte thegya' pa'jsatx jxukaysatxku jxpa'ga'.

³¹ Kxtea' kim yuhwa kuçx yuuniméek fxi'ze' Dxus jxkaahwa'j ena's pta'sxna, txã'wẽy Je-sukristo kaapiya'jni'swa ãatek pta'sxna fxi'ze'.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd